

萬有文庫

第二集七百種

王雲五主編

敬業堂詩集

附續集

(二)

查慎行撰

商務印書館發行



敬業堂詩集

附續集

(二)

查慎行撰

國學基本叢書

敬業堂詩集卷三

慎旃集下

起辛酉正月
盡壬戌四月

辛酉元宵月蝕

顧兔乘鸞事總乖。暗塵誰闕踏燈纒。但期來歲圓還再。肯照人間缺亦佳。金筑舊聞荒野史。玉川奇句抵齊諧。素娥似有刀環約。漸放清光入客懷。

黔陽關燈詞五首

川主廟前喧笑來。花蠻狡獪學裙釵。馬鞭攔入北門去。閒殺新城普定街。不用彎環竹架棚。長條宛轉曳紅繩。月光人影蒙籠裏。一色花籃廿四燈。雄蜂雌蝶擁官衙。先後輪番唱采茶。忽轉歌頭翻四季。聲聲齊和牡丹花。龍尾龍頭五丈餘。苔鱗鏤甲洗兵初。班頭舊出靈官閣。鼓板中間領木魚。赤脚袂徒鬧掃粧。木梳籠髻去隨郎。一年一度蘆笙會。又趁春山跳月場。

滇南從軍行八首

漏臥响町接夜郎。井蛙穴鼠只尋常。開邊使者今頭白。他日嬰兒號竹王。

旨下羊皮督責多。前軍追電出牂牁。城烏三匝重圍外。聽唱先鋒勅勒歌。
捷書夜半刺闥還。再發西山板楯蠻。特賜龍家懸鵠印。土丞新綴總戎班。
金馬關頭毒草春。道傍掩鼓不驚塵。受降老將幽燕種。半是當時獻鏡人。
三道兵威轉戰餘。革囊潛渡計何如。肉屏盡向金沙路。可少姚樞裂帛書。
朝家納粟重輸邊。卜式才高逐賢遷。不是漣中甌脫地。何勞封事策屯田。
天地鴻濛儼再分。別傳科斗出奇文。就中機密無人識。惟見飛書入北軍。
稱帝稱王意自愁。投瓊一咲抵朱三。桔槔烽火同兒戲。兩度燒營到博南。

軍中行樂詞十首

旌旗小隊插竿竿。簾策聲中路百盤。明日山頭移帳去。牛毛鵝毳滿兵欄。
猩猩貼地坐鋪氈。紅點酥油一樣鮮。普洱團茶煎百沸。偏提分賜馬蹄前。
斑鹿黃羊左右孟。射堂割炙盡羶腴。行廚可口烹鮮味。新淪羹湯進鷓鴣。
粵西白獺近來多。項鎖金鈴跳碧波。鷹犬技窮渾不用。旌門別唱打魚歌。
果下名駒愛水西。騎來鬣鬣剪初齊。戰場多少洮河種。骨立秋風向北嘶。
臂鞮小鷓覓窠雛。密箐深榛近却無。駙馬手書跳驛到。羽毛四出比軍符。

仲家苗弩未猶強。機轉銅牙怒蹶張。楛矢舊曾克武庫。特煩中使到炎荒。
衙頭樵牧占官莊。射虎歸來白日藏。夜夜橫屍荆棘地。浪傳車騎出南塘。
萬里京華十日通。雲邊優詔下軍中。錫袍貂帽征南將。拜賜從誇第一功。
五千名籍隸西江。乳臭居然擁節幢。太尉一軍長不調。攜筇蹴踘自雙雙。

邸報二首

曾趨絕域拜昆盧。降將還朝籍未除。博得封侯須好語。太平天子是文殊。
暴露揚灰罪未伸。肯容武庫貯亡新。專車長狄僑如骨。四出猶煩驛騎塵。

卽事二首

爨婦粧成細馬馱。梨園立部曼聲多。太常別有平蠻樂。不取金釵玉樹歌。
幾處開疆議敍同。綠旗歸去亦分功。新加細鎧銜都督。寶頂朱纓隊隊紅。

諸葛武侯祠

割據人才出。眞從運數爭。苦心扶季漢。餘力到南征。廟古寒鴉集。山高薄雪成。
渡瀘緣底事。錯莫咲書生。
自正月以後不得德尹消息。用少陵遠懷舍弟穎觀等一首六韻。

聞汝辭人幕。經時少寄書。兵戈淹別日。梅竹且村居。池草詩爭秀。蠻燈歲逼除。
兩年期易爽。十口計全疎。

殘雪啣雙岫。春冰破一渠。依依游子夢。長自繞林廬。

白櫻桃花歌

空庭瘴消風日春。櫻桃花頭繁且勻。枝南枝北並時放。初月隔窗浮粉雲。梨花無香李太俗。別具幽艷存天真。山胡飛來好毛羽。字清調熟啼聲頻。金鈴風細驚不起。啄花如妬花含嚙。有時一片近人隊。酒面掠過香烟燼。故園開時記寒食。年年讌賞遲芳辰。依稀爲汝評品格。杏花顏色同鮮新。眼前一樹白堆雪。開及二月當初旬。近南已得天氣早。雅態更自離紅塵。有情相對萬里外。一醉何必非前因。明年花時定誰賞。我是今歲吟詩人。

得家信

吉禮除喪後。悲驩意各真。他時憐弱穉。此舉慰先人。與俗寧從儉。傳家合稱貧。一門婚嫁畢。兩姓恰朱陳。
小妹去夏歸朱。季弟今春聘陳。

寒食看海棠

不見鞦韆架。榆烟火又更。轉防花咲客。眞覺雨無情。綺句紅紗護。微風翠幄迎。萬山樵採盡。憐汝獨傾城。

偶遊東山寺

草長忽無路。重來跡已陳。寺貧僧乞食。臺古佛蒙塵。兵火殘碑劫。鶯花絕域春。近南多戰壘。愁殺獨游人。

檳榔

不愁侵瘴癘。開闢得奇功。遠客熏顏醉。蠻孃論口紅。香迴金醴液。清漱玉川風。萬里經相識。誰憐庾信同。
庾子山檳榔詩。莫言行萬里。曾經相識來。

啣酒

蠻酒釣藤名。乾糟滿甕城。茅柴輸更薄。桐酪較差清。暗露懸壺滴。幽泉借竹行。殊方生計拙。一醉費經營。
送彭南陔赴長沙卽次留別原韻二首

晝灰奇計決從戎。入幕何妨許掾嬰。鄭俠圖曾傷目擊。陳琳檄可愈頭風。嘉魚有味江東好。老馬無羣冀北空。車壁擊殘壺口缺。白頭白盡雨聲中。

湘中風物近何如。太息羅含未定居。竹閣語清悲擁髻。芝田春秀夢迴車。頻垂旅橐千金散。獨泛歸舟一葉虛。劫火不燒周易壞。乞音君枕秘發奇書。南陔臨行。授余河洛易數。

三月十五夜夢遊南湖追憶舊好因寄淮江

夢趁歸心得故園。鴛湖遊跡宛然存。濃烟隔浦浮諸塔。春樹分行綠一村。萬里烽烟遊已勗。三年光景向誰論。往來最憶尙書墅。柔櫓伊啞直到門。

四月十六夜喜雨

天苗小砦破春畊。異俗差堪慰客情。萬井雲烟扶小閣。四山雷雨動空城。漏侵書榻移難定。臥想園廬去未成。好是綠針浮水候。陂塘徹夜有蛙鳴。

黔陽卽事口號三首

帳有炊烟戍有樓。山無林木水無舟。王瓜入市家家病。箐雨經梅日日秋。苗婦短裙多赤脚。僦僮尺布慣蒙頭。兵荒滿眼圖誰繪。卉服先教遞速郵。土產丹砂及水銀。若論肥賤自來貧。蠻分烏白皆名鬼。爨合東西略似人。蕝葉分鹽沾鳩舌。檳榔和血點猩唇。水西小馬新來貴。買得偏誇內廐珍。役夫肩背幾曾停。頰尾歌殘忍再聽。劫過流亡初著籍。碑傳德政已鐫銘。羊腸鳥道千盤瘴。馬背牛皮百韜釘。正是西南需餉亟。螳螂川路接蜻蜒。

恭謁陽明書院

不遣先生成謫宦。誰將理學闢荒榛。後來事業皆由此。異俗詩書遂有人。複壁只今留絕徼。劫灰終古怨亡秦。講堂亦與兵戈厄。馬踏空堦萬瓦塵。

送秦望兄東歸

萬里相逢有弟兄。羈孤無那送君行。雨腥雙袖弓刀血。風靜諸山草木兵。夢裏田園重到眼。蠻中兒女自

成聲極南從古無秋雁。歸去休輕議子卿。

懷葉鄧林副使播州

重巒疊嶂鎖空壕。蜀徼孤城近不毛。佛現催晴秋閃閃。鬼車啼雨暮騷騷。官途載涉應知味。鄉夢頻歸可憚勞。計日江南秋信好。黃花酒熟待登高。

得都勻汪明府子參書却寄

劍河秋漲轉山鳴。桂象天低瘴壓城。旅況難辭邊邑苦。蠻人能愛長官清。巖光夜放金蠶蠱。兵氣秋荒木箸耕。此際回頭家萬里。可因捧檄慰毛生。

送李子受往武陵並簡山學禪師

不是無家等罷官。客中卽次取粗安。江青城郭移帆過。戰定桑麻避地難。落日孤鴻廻健翮。西風老馬卸征鞍。鄴侯自具神仙骨。燒芋差宜對嬾殘。

楊大中丞壽讌詩八十韻

宇宙方多壘。英雄必大儒。兩朝懸碩望。一代應貞符。學貫天人策。才鎔造化爐。清名傳四世。賦價儷三都。暫應郎官宿。旋棲禁掖梧。龍鱗批可畏。虎齒探何虞。銳氣真無敵。虛名自不沾。在廷推小諫。有識服訏謨。十載官難調。三遷秩稍渝。納言班漢爵。問命入周書。繼領霜臺豸。重聽柏府烏。花廳行盡避。赤棒或時須。

姻婭論權貴。歡傳溢路衢。異時公望合。一德舊臣孚。再秉金銀管。弘開貢舉途。風流歸吐納。文義闢榛蕪。
桃李公門盛。茶烟瑣院晡。徽猷真藉甚。經術故非迂。撤帳傳衣鉢。臨軒命僕夫。上情深眷注。廷論協都俞。
鎖鑰西南重。恩榮禮數逾。雕鞍紅叱撥。宮宴玉盤盂。朱芾加元老。黃金賜內帑。不應煩侍從。直爲寄彤紱。
赫赫千秋葉。明明萬里塗。三旌紛照耀。單騎歷崎嶇。憶昨初開幕。殘疆尙負嵎。客塵雙短髮。時事一長吁。
深箚鬱調象。叢祠鬼托狐。蒼茫生膽勇。警策戒衣繻。大義攻鳴鼓。先聲算獲俘。壇場收老將。舟楫付丞徒。
轉粟時方亟。屯田計似紆。量沙俄積聚。編戶悉將輸。剖斷才無滯。沈深意每殊。幾時休戰伐。隨處萃逃逋。
間道纔通蜀。前軍已渡瀘。焚巢移渥朴。拔穴徙於菟。及見干戈息。從教政化敷。時危須震厲。地瘠賴支吾。
樓爲籌邊築。弓因克敵呼。經年煩草創。卽事具規模。俗陋雖難化。苗頑亦可忬。羈縻存體統。指摘訝睚盱。
發難相如激。留心鄭俠圖。御囚仍有禮。討罪每矜辜。疾苦逢人問。瘡痍試手扶。心銘關感動。口惠詎驩娛。
春雨膏曾徧。秋風病卒瘳。哀憐看賣劍。痛切請蠲租。澤雁勞初集。吳牛喘漸蘇。陰功多被物。憂國細傾壺。
世儘榮殊遇。公猶孫碩膚。乞歸辭婉委。優詔答勤劬。法曜輝南極。皇威暢兩隅。印金龜轉紐。袍錦鶴呈珠。
側聽中興傳。誰云往事誣。穀城傳指石。鈴閣叶懸弧。俯仰差無負。韶華好自愉。長生花是桂。異域酒名蘆。
野獵登麋鹿。山肴進鷓鴣。黑頭光黼黻。明目艷氍毹。仙骨清方貴。豪家習摠無。風華矜少壯。顧盼指須臾。
瘴癘披襟淨。烟霞滿腹腴。西園催刻燭。東郭濫吹竽。賤子通家舊。頻年幕府趨。孤踪隨泛梗。里耳厭皇芻。

自比依枝鵲。誰憐伏櫪駒。襄陽留叔子。夏口滯元瑜。鄉思年年共。陪遊往往俱。禮優慚上客。才短惜微軀。知己能容拙。開懷必盡愚。但令親几舄。何用苦牽拘。古有輕投筆。人今異執戈。詩狂容杜甫。摻狹笑淳于。感憤尋常失。蹉跎歲月徂。受知非泛泛。述報祗區區。醉酒杯長潤。啣毫墨未枯。平淮碑好在。未敢憶江湖。

九日同赤松上人登黔靈山最高頂四首

絕磴扳躋望已窮。忽穿鳥道入禪宮。雲端方丈娑羅日。井底孤城簷築風。草木連天人骨白。關山滿眼夕陽紅。興亡何與閒僧事。一角枯碁萬劫空。

空谷西風書怒號。山寒九月馬歸槽。路危怪石驚將墜。天縱諸峰勢競高。羅甸一軍深壁壘。滇池千頃沸波濤。勞人何限登臨意。不向糟丘覓二豪。

諸將開邊振鼓鼙。幾聞京觀築鯨鯢。巴賈未脫金牛險。土貢長聞櫪馬嘶。事異汝陽休許魯。謀新曹沫恐輕齊。亂山中有豺狼穴。曲突何人議水西。

渡瀘溝畔闢新阡。瘦棘荒苔半石田。漸有疎烟生郭外。那無一雁到天邊。蠻方對景憐佳節。客路登高感去年。落帽臺孤風雨暗。短裘長路又三千。

十月二十二日接德尹長沙第二信驚聞三叔父訃音旅中爲位而哭悲痛之餘得詩三章

荆南風雨沉南雪。幾處追隨意最親。乍喜遠遊依骨肉。却愁別路沮音塵。人來絕域原拚命。事到傷心每

怕真兩地存亡身萬里。一襟啼血隔江濱。

燈花剝落雨沈沈。昨夜長沙有訃音。薄宦竟虛三徑計。首丘終負九原心。老成頓盡天難問。家運中衰勢不禁。好與精靈扶後起。松楸先兆已成陰。

臯魚路盡獨淒然。此意能生叔父憐。豈謂縗麻辭故國。重將涕泪洒蠻天。孤蹤黯澹成千里。一信蹉跎到半年。也擬招魂歸未得。瘴鄉誰與慰沈絳。

得荆侯姪習安訃信拭泪寫此并寄尊人楷五兄二首

手札頻開破旅愁。訃音此夕黯然收。眼枯倦枕孤燈淚。天偈哀猿萬壑秋。憂患豈知緣識字。男兒真悔覓封侯。一棺難揜平生氣。鬼火高于百尺樓。

黔雨滇風近十年。歸裝臨發尙遷延。浮名誤汝今如許。異域生還洵偶然。贖與孤兒留筆硯。最憐少妾賣花鈿。倚閭別繫高堂望。旅櫬何時到墓田。

老僕東歸寄慰德尹兼示潤木

迢迢萬里途。莽莽三歲隔。離悰兼旅況。雜沓難並釋。欲寬居者情。聊紀獨行跡。前年遠離家。荆南事挾策。中丞天下賢。謁入容揖客。賓徒車服盛。中有麻衣雪。偪臘踰洞庭。羽毛風疹瘵。武陵一春住。山水愛澄碧。尋僧就閒暇。橫草應煩劇。隨師赴辰沅。跋涉隣殞城。麻陽三挂帆。銅仁雙著屐。前軍濟陽戰。破竹勢深入。

偪臘抵貴陽。孤城如破驛。荒署瓦僅存。窗戶悉頽拆。移時開敵篋。稍稍置硯席。主人況巨才。手自樹英烈。蠟丸刺閨至。文案日幾尺。岑范媿幕僚。但坐看擘畫。邇者西征將。繼被中旨責。已合兩粵師。咽喉勢交搯。滇城久未下。攻守力云竭。師久必屯田。其能懸釜鬲。楚僮竄榛莽。廢土曠牟麥。卽事常躊躇。察眉愴捐瘠。那無一尊酒。排遣就務隙。蠻花非時開。犵烏亂格磔。窮愁託吟咏。好語慰行役。束縛得蹉跎。年華坐拋擲。憶昨初來時。針孔冒矢石。憫體委亂草。霧淞雜凝血。馬驚忽騰躍。人意一悽切。亂離民命輕。鷄犬等狼籍。僕夫掖我前。慘慘度軍柵。回思田園樂。歲晏情逾迫。功名捷徑啓。大府破常格。我無卜式貲。寸進計斗石。移文累好友。初約背疇昔。全生爲門戶。識者應見惜。枵然旅囊垂。念爾勤捫捩。家門忝居長。慙愧少擘畫。子言嫂姪貧。何忍分涓滴。不記少小時。推梨恥割宅。開函見子意。至性生感激。族譜教方衰。鐫銖起墻閱。豈知手足恩。具邇異疎迹。卽此慰先靈。庶幾免離析。草堂父書在。千卷皆手澤。西園梅竹林。十畝錯墜陌。得錢了公稅。餘用佐菽帛。讀書兼治生。生理恆苦窄。吾方逐游惰。勉汝終苦說。長鬚隨我久。嬾惰亦成癖。憐渠筋力衰。遣去情脉脉。臨發寫此詩。萬山猿叫夕。

烏山戰象歌 并序

歲六月前軍轉戰于烏木山陣獲三象遂以捷告驅象北行道出貴陽觀者如堵僕爲作歌

烏山轉戰煩饒騎。鴉鳴牙中風捲幟。南人驅象迎我軍。鼓未成行氣中潰。渠豪力盡投深箐。竄鼠奔猿互

顛躓。是時三象屹不動。却立如山鼻垂地。將軍獲象等獲俘。陣上懸金募生致。須臾拔箭膝行入。柱聳圓蹄一十二。臺駝珠玉壓背裝。象也輕身受人制。我聞內廐舊成羣。食俸曾援三品例。牙花雷雨偶一開。何必焚身因挾賄。此行生死隨所置。莫更回思戰場利。君不見功成則聘敗輒降。世上男兒盡如是。

送人赴黔西

羅甸西游影倍孤。亂猿啼入贈行圖。邊城事少餘詩興。幕府花開散酒徒。北鴈久遲鄉信到。南霜偏著客髯枯。封侯不是書生事。投筆無端咲渡瀘。

咏史八首

翻覆興亡閱兩朝。老來劉濩氣逾驕。十年賓客謀何密。四海漁鹽利頗饒。西貢幾曾歸武庫。南琛無復換文貂。徒薪可少長沙策。一擲金甌險得梟。

近說孤鷓死首丘。特煩獻馘入皇州。朝家舊識田橫面。飲器難寬智伯頭。視墓敢容雙騎客。爭功何與什方侯。天南從此無征戰。上苑昆明罷習流。

輓轡綆斷井應枯。襤主休傷押不蘆。粉麝餘香啣語燕。珮環新鬼泣啼烏。殘粧掩鏡雙蛾短。白醜埋沙尺土無。別有紅粧連騎入。金盤銀燭揀明珠。

析骸食肉一城空。阿父空提五尺童。旅火焚巢何自苦。齊書飛矢竟誰功。大臣未必憐朱瑒。故吏寧須問

向雄滿眼殘黎皆僕妾。向來踰縮倚神叢。
風急降旗舊折竿。播州歸甲極凋殘。一時管統援師盡。同日臧洪赴死難。赤手何顏還抱馬。白頭無望復登壇。大斤山下逢隋將。猶作燉煌戍卒看。
襲美官高並入秦。他時聲望起紅巾。豈應東市陳尸客。妄比南唐下第人。記室有文慚勸進。霸才無識啜輕身。鴻毛一燎全家盡。豫讓橋荒鬼火新。
勾漏龍門接壤間。謾勞回首望刀環。銷沈戰壘金沙闊。畫斷關河玉斧閒。季布敢論亡命去。田疇爭許奉書還。滿堂舊日三千客。幾個聞鷄並出關。
大廷一意注安危。充國金城事不疑。滇海有人聞鬼哭。棘門此外盡兒嬉。古來成敗原關數。天下英雄大可知。莫嘆書生無眼力。與君終局試論基。

黔陽元日喜晴

以下
壬戌。

曙色晴光一片明。亂峰銜雪照孤城。未吹北笛梅先落。纔及東風柳便輕。萬里烟霜迴綠鬢。十年兵甲誤蒼生。眼前可少豐年兆。野老多時望太平。

楊南城自鄱陵陞任劔川州牧道出黔陽因病乞休比方養痾黔霧山寺高其勇退之意作詩贈之

如此山深可耐寒。髮絲禪榻且盤桓。日南郡較中州僻。天下官惟牧守難。世路交情雙髻換。春風歸信一帆安。君家舊住吳淞岸。三泖烟波底樣寬。

送友人入蜀

揚鞭倚劍出牂牁。鈎棧盤雲幾驛過。盜賊烽銷諸郡僻。英雄祠入亂山多。卜居未穩寧論地。行路雖難莫放歌。便擬題詩繼夔後。此邦風物比如何。

水西行

烏蠻遺種稱羅鬼。剽悍斷頭能掉尾。傳從濟火年代深。世土居然屬宣慰。我從里俗詢大概。復取興衰質諸史。中古荒茫不足論。淵源請自先朝始。洪武初年禍亂平。遠略僉荒來越巂。是時奢香一巾幘。躍馬金陵謁天子。承恩歸去立奇功。一諾西南九驛通。却喚五丁開不到。亂山高下隔蠶叢。二百餘年太平業。世世分藩比臣妾。後來生聚啓規模。四十八支互蟠結。別開荆莽起臺殿。硃戶碉房高櫺櫺。已分王土作王臣。旋練夸兵護夸穴。剝牛磔犬片言重。聚蟻屯蜂一呼集。布囊籠髮氈覆肩。負弩操刀輕出沒。秦和功烈汾陽亞。神廟中年平播賊。當時亦用水西兵。驅使前行借餘力。釀成殃禍啓禎朝。殺吏圍城氣漸驕。深宮南顧鞭難及。諸將西征功屢邀。土司如狼吏如鼠。八捷餘威棄歸路。內莊一夜隕河魁。明日三軍齊縞素。眼中大創真無幾。可惜偷安旋就撫。閣鴉關外曉傳烽。靄翠營南夜鳴鼓。爾來桑海變須臾。此輩根株未

盡除。夸性陸梁。遠似故朝家。謀略故非疎。經營持借強藩力。辛苦開疆一載餘。至今父老猶能說。墨守輸攻真勁敵。老窠地險石作城。要隘不容雙騎入。銅牙毒矢斃濡縷。竹柄長矛利鉤棘。馬蹄過嶺捷于猿。革甲環身輕似葉。連宵斫陣萬炬明。散入深林曉無跡。蛇神蠱鬼助饕虐。飛食人頭吐人血。砦前路斷臨奔壑。失勢一摧千萬尺。四山伐木斲作廂。裹用牛皮冒生鐵。石椒懸絙下槌門。雷斧轟天巨靈劈。攀藤健兒氣力盡。拍手蠻娘唉投石。重圍坐困又經時。轉粟方愁乏良策。豈知存滅總關天。渠首終成戲下懸。萬嶺提封開四郡。一朝腥穢滌千年。自此巖疆少蜂蠆。餘威遠懾諸苗砦。空留徼外廓清功。自踏人間僭亡罪。此日重勞問罪師。烏飛三匝失棲枝。忽傳耐德生還日。趙氏中山尚有兒。烏蒙犄角稱甥舅。曾是安坤舊婚媾。也挈遺孤代乞哀。復歸故土希恩宥。頗聞軍令競邀驩。滿許閒田復見還。土貢紛紛呈鐵蹄。庚莛往往賜銀盤。寄語封疆諸大吏。從前開闢談何易。莫貪扯手納金錢。此事孤雛有深意。輸糧禽賊爾何功。王會圖成戎索同。不見天心今厭亂。戰場新鬼盡英雄。

中山尼

中山女尼顏似玉。布襪青鞋行彳亍。白日潛形灌莽中。逢人不敢吞聲哭。自言生長本名家。阿父才名宋玉誇。千里飄飄隨遠宦。一家迢遞入三巴。養成嬌女嬌無偶。掌上明珠唾隨口。花前侍妾盡知書。鏡裏新粧時學母。自從觀察去朝天。官署清涼遂可憐。寇盜西南俄阻隔。替氛狼鬣掃東川。孤兒寡婦皆臣僕。翠

袖褰蘿行補屋。賣散平頭計漸貧。嫁分紅粉身何獨。飄零無賴到南遷。夫壻移家遠入滇。幾夜新婚成永訣。旋收戰骨葬江邊。早年淪落多關命。石上三生眼前證。便遣情緣着死灰。行依心月開圓鏡。小鬢何意尙隨身。宛轉青絲手共分。金剪無聲雲委地。寶釵有夢燕依人。扶攜同向中山寺。改口人前喚師弟。別與繡經起法名。慶光舊是閨中婢。皓齒明眸兩比丘。久拚生死等浮漚。香燈繡佛前因在。從此相依擬白頭。晨鐘暮鼓流光易。荏苒今年三十二。骨肉深恩且勿論。滄桑時局關何事。何當六詔又屯師。十月孤城乍解圍。將軍奏凱功無敵。悍卒撥牢勢不支。移巢拔穴驅人起。但是有身無避理。一朝蓄髮強同行。幾度刺刀猶不死。歸程昨夜次徧橋。哀角吹殘令寂寥。却喜道傍俄見棄。草間趺坐度清宵。同行偶傍江東客。指點雲山曉來跡。雙江暫擬尋同伴。半路又驚逢邏卒。太守呼來淚未乾。含啼一一語悲酸。亂來莫說爲官好。兒女姻親那得完。夢裏生還愁故里。依稀記得萊陽是。已作昆明劫後人。托根何必仍桑梓。君不見列帳西來珠翠圍。忿忿粉鏡去如飛。不知皂帽天涯住。何似紅裙馬上歸。

班師行

滇池平。滇水清。滇南曠蕩餘空城。犬無夜吠鷄不鳴。將軍奉詔初拔營。幾姓分旗徧行賞。同時帳下添斷養。何取邊頭戶口繁。十年生聚滋奸黨。白頭翁媪啼且假。棄擲不得收戎行。翻身一仆委溝壑。骨肉滿眼紛飄揚。紅顏如花扶上馬。坡高驚墮珊瑚把。兒郎新嫁羽林軍。山下人逢執鞭者。近前一隊飛塵起。中有

傷心泪偷洒。朝家本意重開邊。劇賊初平近十年。爾等纍纍皆鬼妾。偷生敢復祈哀憐。卽如滇城圍七月。未能下。戍卒壘頻高。書生箸誰借。君不見禁旅一出西南通。煌煌中旨褒膚公。參軍誇謀士。誇勇逢時多。少稱英雄。綠旗只合就裁汰。那許尺寸貪天功。從此歸成垂白叟。賣刀買犢安農畝。猶及生兒際太平。家家相賀持羊酒。

和答彭南陔長沙除夕見寄原韻

薄遊依地主。歸計幾時成。老被妻孥累。貧銜故舊情。綠尊消夜淺。白髮競春生。亂後飄飄跡。能無感北征。黔南署中連接與三子穎右朝手書知德尹已入燕歸計遂決先馳詩以寄

出門儔侶稀。蒼莽七千里。豈不念離羣。徒亂人意耳。素心十餘輩。一散如潑水。同源乃殊流。所到隨坎止。行人半萍梗。居者僅桑梓。所恃氣誼敦。尺書屢見慰。開械試終讀。感歎忽中起。吾棄賦北征。殘冬束行李。嚴程霜雪惡。急往寧得已。雙親尚淺土。舉念每顛泚。幼弱兩三人。田廬詎堪委。我來已天末。欲去難遽爾。鳥道阻且長。戈船塞江汜。主人荷垂諒。告別輒諾唯。僮僕亦欣欣。行期屢屈指。到家幸非遠。計日及秋尾。期子賦同歸。開園召知己。

敬業堂詩集卷四

過歸集

起壬戌五月
盡癸亥九月

客楊中丞幕下且三年。德尹以壬戌正月北游。余在黔聞之。遂束裝過返。與季弟潤木局促里居。甫周一歲。不及待仲歸。又將出而丐於親舊矣。合歸途所作。及家居詩。共成一卷。名曰過歸集。

發貴陽留別大中丞楊公三首

風波纔過又烽烟。一路看山漸近滇。浪跡南雲真萬里。濫竽東郭忽三年。孤熊舐掌粗知分。飛鳥依人正自憐。不覺對公成洒涕。也應容我賦歸田。

鄉社枌榆隔後塵。交情翻借布衣親。勒銘事大才難稱。絕代人稀見始真。寶匣異光刀剖玉。銅盤高燄燭輝銀。他時重話西征績。慚愧曾充幕下賓。

紛紛桃李豔公門。鴛鴦如余尙服轅。明鏡何私顏欲換。清談無用蝨空捫。人來江左名慚項。詩和春陵格紀元。束縛倘酬知己分。敢隨流俗說啣恩。

高寨

綠蕨荒無際。黃茅直到天。祗因鄉路遠。猶自惱啼鵑。

度雲頂關

目極雲生處。到來雲滿身。時清存畏路。興盡有歸人。馬力疲堪惜。禽言聽似真。往來經戰地。白日起陰燐。

將至清平縣馬上作

石秀山漸佳。城荒日將暮。遙見孤烟生。猶知有人住。

晚宿龍里縣署

官舍周圍帶土墻。盆池新漲接方塘。歸人已夢田廬好。只道蛙聲是水鄉。

母豬洞觀瀑

蠻中六月交。山路苦焚爇。臥聞夜雨來。快起尋乳穴。入洞微有聲。足底響鳴咽。出山忽震怒。閃睒不容掣。巖前匯奔流。人駭馬辟易。來如曳組練。一綫注飛白。跌爲淵潭深。湛湛落澄碧。石牙互參錯。吞吐霹靂舌。直從澗潭底。跳沫騰百尺。慘慘天變容。凜凜風作雪。岡頭杜宇叫。萬竹劃然裂。將歸得奇觀。頓解肺肝渴。

冷溪

溪潭三尺雨。馬渡一汀烟。徑轉長防虎。沙平忽有田。斷雲依岫險。亂草得花妍。滿眼悲涼意。新詩記不全。

平越遇雷玉衡索留別之句口占贈之

依舊青衫把一鞭。紛紛白面看談邊。冷官未了從軍志。岐路猶餘話別緣。急雨淋浪茅店外。亂山高下馬

蹄前得歸吾已無餘恨。只欠游蹤未到滇。雷演人也。

黎峨城北福泉山張三丰禮斗亭尙存

清池照影樹扶疎。亭前有浴仙池。長生桂。書靜廊空想步虛。閱世人來棋散後。出山雲澹雨晴初。窮塵滾滾孤亭在。

浩劫茫茫百戰餘。華表鶴歸應有泪。舊時城郭半丘墟。

題興隆衛聖母閣

隔斷荒城別一丘。蟬聲寂歷鳥鈎輈。忽來風雨疑無暑。如此林巒合有樓。塵刹留僧還竿奕。瘴鄉有路莫回頭。澹忘未必同靈運。直爲清暉作少留。

寓樓晚坐

一聲清磬出柴關。庵主軍持乞米還。暝色羣羣栖樹鳥。夕陽朶朶隔城山。

偏橋田家行

結茅住山顛。種田在山麓。田荒費牛力。僅得播種穀。七年際離亂。饑饉死相屬。稍思歲一稔。生命絲或續。師旅比凱旋。騶嘶百萬足。黔山無水草。何以充首藉。成羣走阡陌。泥淖沒馬腹。食葉嚼其根。螟蟻等荼毒。秣芻一朝盡。婦子終歲哭。天下自昇平。民生有蹉跎。我爲老農語。物理視反覆。來年期好收。重看秧田綠。

晚登偏橋玄都觀後閣

承平推舊鎮。設險控西南。水勢全趨楚。山形尙帶黔。壞城平似掌。古觀廢成庵。卽事多興廢。兵戈實厭談。
重宿舞陽中山寺贈紫橋長老

水色山光淨。眼前下臨無地有蒼烟。長虹自亘西來路。峭壁剛支北面天。開士偶逢堪一咲。舊游重到已
經年。亂離風景勞生夢。可少秋堂借榻眠。

舟發沙灣入沅州境

烟村紅日吐初晴。野泊桐槽促早程。秋水澄鮮魚味美。曉山葱蒨鳥言清。城連槃瓠形猶壯。灘過鷓鴣怒
未平。我是沅南留滯客。舊游一一總關情。

天星灘

明星的的吐飛湍。石勢參差亂眼看。莫擬乘槎到天外。偶從奇險博奇觀。

神堂灣村家

布裙翩翩短幅高。髻亭亭古粧。望看人成翁媪。不知世有姬姜。

辰溪縣晚泊

夕陽孤塔表辰溪。江面初寬地漸低。從此一舟平似掌。萬峰回首夜郎西。

瀘溪

傍穴壘。架樹梢。懸崖百丈俯江坳。小舟恰傍山根過。長恐風狂墮鳥巢。

兩頭織織曲二首

兩頭織織欸子船。送郎只到洞庭邊。四時雪浪灘前石。白日雷霆枕底天。
兩頭織織月上弦。中秋屈指又今年。歸路二三百里近。別家四十一回圓。

晚過界亭

晚景融怡剪渡還。鳧鷖隨我過前灣。半江風色參差浪。臥聽猿啼夾岸山。

桃源訪胡孔志不值

漢陽分袂已多年。閒說遊蹤久入燕。歸路我經秦客峒。故人貧就廣文氈。桑麻舊俗今誰主。首蓓荒齋醉少緣。秋雨暮帆惆悵在。可堪回首洞庭烟。

沅江縣治濱湖居民皆漁戶水盛時舉家乘舟入湖秋冬水縮則結茅沿岸住

官舍無城傍水濱。鷓鴣鵝鴨半居民。疎燈幾點夜呼渡。老屋百家秋結隣。岸曲蘆深長響雨。船頭魚健欲驚人。饒他小縣輸漁課。賦歛湖湘俗久貧。

將之長沙留別沈將雲

武陵溪口手重揮。獨向長沙未得歸。憑寄家書傳客況。爲言弱羽又分飛。

青草湖

淼淼湖光天盡頭。曠曠初日起蘆洲。小船百折行難到。一片蒼雲白露秋。

長沙舟次聞德尹入黔之信二首

去年此地君思我。君到黔中我又歸。世路茫茫誰料得。離人黯黯意多違。兩萍湖海原難遇。獨雁瀟湘正
懶飛。此夜夢回姜被冷。殘燈疎雨倍依依。

岐路匆匆過朗州。弟去常德緣五日而余至菊花初約誤林丘。音塵京國書遲達。詩草炎荒客善愁。道路半年成萬里。
德尹于正月自故鄉入都今又來黔故云江湖一信到孤舟。跼鵞浪泊來何爲。歸去吾方羨少游。

長沙喜遇彭南陔

鷺立蘆花淺水。鰾肥稻壟新霜。夢去故鄉秋好。一尊閒話瀟湘。

長沙雜感四首

水遠山平極望賒。湖南風物一長嗟。屈原已去終亡國。吳芮如存可世家。湘竹舊痕啼夢雨。薜蘿新鬼怨
囊沙。孤城自繞殘陽岸。風急秋清急暮笳。
鯨角關山百戰過。征南精銳竟如何。牛羊隊逐移營盡。犀兕人傳棄甲多。蜀虎連年勞悵望。黔驢無技任
譏訶。孟明一臂功無敵。別路今聽唱凱歌。

窮年供億奈兵荒。穀賤傷農力莫償。地遠舟車還絡繹。時清圖繪有流亡。勞魚未必忘煦沫。集鴈何當穩稻梁。十萬人家君勿問。如今瘠土是三湘。卑濕南遷事可哀。鬼神宣室召空回。君臣如此猶嗟命。絳灌何人乃忌才。史漢高文光照耀。江山故宅客徘徊。治安敢擬長沙策。直爲先生痛哭來。

同南陔九畹遊嶽麓中途遇雨興盡而返

細帙曾披北海碑。南游雅興素心期。好奇歷險人皆笑。冒雨尋山興又癡。雙屐泥痕苔剝落。一江帆影浪參差。衡山咫尺猶難到。敢望雲開似退之。

八月十四夜洞庭舟中風雨再寄德尹黔南

扁舟小泊最蒼涼。那更回頭望夜郎。浪跡久經烟瘴地。懷人今在水雲鄉。燈紅極浦秋何際。月黑寥天夜有光。滿眼江湖飛不到。始憐羽短道途長。

洞庭阻風歌

湘陰去岳陽。湖面一日程。雲從北來風色惡。吾力敢與吾命爭。船頭紙錢撒白雨。舟子酬神致私語。老鴉啄肉掠水飛。廟祝鳴鐘月東吐。大哉神靈本至公。憑私詎可祈感通。不如繫船整篷索。南北東西預難度。明朝風便從爾行。莫使有風帆力弱。

中秋夜洞庭對月歌

長風霾雲莽千里。雲氣蓬蓬天冒水。風收雲散波乍平。倒轉青天作湖底。初看落日沈波紅。素月欲升天歛容。舟人回首盡東望。吞吐故在馮夸宮。須臾忽自波心上。鏡面橫開十餘丈。月光浸水水浸天。一派空明互廻盪。此時驪龍潛最深。目炫不得銜珠吟。巨魚無知作騰蹕。鱗甲一動千黃金。人間此境知難必。快意翻從偶然得。遙聞漁父唱歌來。始覺中秋是今夕。

湘江舟晚

清湘清徹底。人影淨征衫。秋水漸歸汊。遠舟惟見帆。荒洲無雁到。落日被龍銜。一樣天邊月。今宵迥不凡。

岳州

湖腹平吞爾許貪。湖唇一噴勢難拑。力爭全楚功誰最。讖應孤城戶已三。客夢堦長還堦短。夕陽山北又山南。太平設險非無意。漁獵丸泥敢尙探。湖中盜賊充斥故云。

赤壁

一戰三分定英雄。洵有神。古今才不偶。天地局長新。故壘秋吹角。荒江晚問津。祭風臺下路。惆悵是歸人。

夜宿簾洲驛

洞庭晨出險。小驛宿兼程。漁火遠村沒。雁沙殘月明。萑苻荒大澤。賦歛窘餘生。不敢論時事。乾坤及罷兵。

過湖口作

楚水吳烟一覽收。新移鎖鑰控中流。誰興桑孔緡錢利。盡算江湖大小舟。山脚酒旗孤店晚。縣南風色亂帆秋。詩囊壓擔琴扶膝。關吏何妨啜薄游。

登蕪湖浮圖

落帽家山記幾巡。弟兄南北各傷神。茱萸明日重陽酒。五處登高各一人。尹時家次谷在粵。荆州在燕德。尹在黔。惟韜荒家居故云。

木末亭謁方文正景忠烈兩公祠

一姓興亡際。忠臣尙力爭。百年公論定。兩字易名成。山雨晴蒸氣。江雷怒作聲。君看南渡後。降表出書生。

發儀真

綠楊城郭碧蘿洲。夾岸紅燈映酒樓。爲愛吳船聽軟語。買帆連夜下真州。

欲登金山不果

也有登山興。中流去不多。眼中江路盡。翻覺畏風波。

梁溪秋晚

繞郭林塘淨晚烟。放閒黃犢水平田。吳霜未剪江南綠。猶有菱歌動敏舷。

初到家得陳六謙書并見寄詩二章。期余作北遊馳聲以報。

睽違不在久，依依念儔侶。與子惜分陰，矧乃遞寒暑。六年五寄書，故人在肺腑。才華我何有，藻賞終見許。久要期勿負，感子心獨苦。師門一回首，過眼如風雨。初約貧漸渝，旁觀惜毛羽。青衫行謁選，此意吾諒汝。昂藏七尺軀，行與衰老伍。念念簿領下，英氣恐少沮。并州地苦寒，臘盡雪片舞。蹇驢數十驛，遠宦等羈旅。此邦經五季，地險全用武。連延二千年，往往警鞮鼓。海內今連兵，閩粵接秦楚。河東耕鑿安，天道合存撫。安邑古帝墟，唐俗仍樸魯。官清資俸薄，折柬到鄉土。也擬上羊腸，得君作賢主。

哭王右朝四首

還家約略中秋後，長路風波恨稍遲。六日不詹君尙望，三年重到我成悲。魂來蘋末蛟龍駭，泪殺燈花枕席知。恠得吳江催噩夢，喚廻孤帳雨飄絲。九月十二夜舟泊吳江，夢中忽有人大呼曰：三日內汝當有奇禍，一時驚寤，明日到家，遂聞兄重陽訃信。

卅載交親氣誼中，蓋棺事了太匆匆。擬從頽俗存家法，不願諸甥有舅風。冰雪一枝憐菀鵲，圖書四壁哽秋蟲。東山便是西州路，欲學羊曇計轉窮。

勿論死別與生離，存歿心傷無盡期。鮑叔有情貧敢諱，尙平多累出偏遲。向來語笑猶堪憶，從此肝腸好付誰。海角天南諸弟散，訃音欲寄苦差池。

未改頭銜屬望虛，手題丹旆又躊躇。携來萬里千行泪，檢得三年五度書。余出門以後，兄凡五寄書。好事誰還評月旦，餘生吾久負居諸。文壇詩社飛揚氣，百念俱灰一慟餘。

除夕與潤木分韻二首

曾爲茆堂乞少資。不成覓地向西枝。弟兄蹤跡團圓少。兒女心情指顧移。扣角騎牛聊復爾。設置守兔定何爲。升沈此際知誰是。欲悔身謀又自疑。

燈花檐雨夜沈沈。慰我淪飄得故林。久別翻驚相對影。急裝誰諒倦游心。時清壯士才難盡。俗薄貧交望苦深。稍喜來年春帶閏。未應相對廢聯吟。

不見外舅陸射山先生屈指六年今春奉謁里門旋有吳行兼以送別二首

以下癸亥作

鬢霜髯雪走天涯。拂袖歸來記歲華。海內詩文無手敵。座中筋力許誰誇。談深世態多經眼。老喜遊踪漸近家。五柳有情難繫別。勿論鄉思米囊花。

亂餘三徑長蓬蒿。栗里田荒尙屬陶。逸興人扶雙屐健。名山天斬一星高。春濃遠市紅燈月。烟泛輕帆白鷺濤。恠底尊前還戀戀。六年書疏阻江臯。

重過聽鶯齋與徐淮江話舊

風雨高齋別幾春。小池佳樹碧添鱗。兩湖地主憐君在。三月鶯花笑客頻。夢裏何曾忘對榻。畫中只合著閒人。倦游莫訝歸心切。知己無如稊子真。

三月晦日陳元亮家看海棠

一番陰雨花期盡。難得君家尚有春。路隔西川無好句。眼明南郭又芳辰。濃雲薄霧憐香意。翠袖紅紗絕代人。還有掛帆惆悵在。滿湖烟水夢何因。與顯武別有約而未遂故云。

傳經堂歌卓次厚屬賦

後生學術無授受。往往談天哆衍口。春華秋實古難兼。氣節文章誰不朽。塘西卓氏本望族。遜國名臣侍郎後。天教一姓留典型。幾輩蟬聯起諸叟。西京篋衍探源委。北宋儒林辨誰某。煌煌藜火燃太乙。種種琅函發大酉。雕龍餘技矢穿楊。石鼓舊文魚貫柳。一經三世屬名家。兩字千秋推作手。頗聞名儒後必大。賢嗣文孫洵非偶。百年棧桷尚如新。別築祠堂寬十畝。已看歌頌美輪奐。更蒔花竹貽長久。藏經閣闕曉繙書。族譜亭成夜呼酒。才名後先滿南國。不比虛名指箕斗。余家盈盈隔帶水。累世交情誼稱厚。三十年前枯菀分。家運速遭遘。陽九艱籤兵火蕩餘劫。陶逕柴桑慚世守。老成頓盡人所嘆。小子無承良自醜。竭來塵壙逐游惰。筆墨祇用供奔走。祖父遺書讀未成。官堂官構夫何有。詩成對君三太息。獨抱殘經莽回首。

同淮江登東湖弄珠樓

但令興到便移船。我得同游亦偶然。疎磬晚潮孤影墮。暖雲濃樹四垂天。稱心圖畫憑欄外。經眼亭臺落照前。却笑詩成無傑句。驪龍依舊抱珠眠。

過吳漢槎禾城寓樓

快事相看一笑真。忽傳絕域有歸人。劫灰已掃文星燦。黨禁初寬士氣伸。佳客偶逢如有約。時陳寄齋俞盛名長恐見無因。廿年冰雪思鄉夢。纔向田園過一春。漢槎將攜家入燕。

吳門喜晤梁藥亭

僕家海東君海南。海道相距三千三。有時憶君發遐想。直欲芒屨遊瓊儋。故人謂魏禹平金閨傳好語。知是久客猶停驂。買帆兩日風色順。百花洲外波潭潭。風塵在顏刺銜袖。咲口一豁心俱甘。披襟更覺有深致。黃鬚綠髮垂鬢鬢。名言霏微齒牙潔。絕勝香味飄迦楠。小儒窘步不踰闕。訓詁馴繞如衣蟬。讀書已破十萬卷。可使蹤跡無窮探。吳中此來凡兩度。一一紗壁留精藍。山塘四月天氣好。輕衫拂領來晴嵐。家家綠陰囀黃鳥。曷不載酒携雙柑。閉門却掃吟獨苦。郢雪屬和何人堪。平生美好百不入。正坐好古成奇貪。知君力欲追正始。三唐兩宋須互參。皮毛洗盡血性在。願及有志深劇勘。拙詩與君不同調。小言未可誇詹詹。數篇見賞自京洛。君愈降氣余彌慚。匆匆人事促輕別。欲去暫止嚙清談。紅綿花開鷓鴣叫。歸夢定繞枕榔庵。

聲山姪自都下歸相見閩門舟次出荊州兄手札期余北游戲作一詩以答

春冰一騎蹴淖沱。柳色蘇臺握手過。鹵莽不須慚計拙。驅馳真欲悔才多。吟紅日晏誰同調。變徵聲移急和歌。每遇南轅頻問訊。長安米價近如何。

同祝豹臣及家西崴叔飲韜荒兄齋

高樹柴門景又遷。小堂南北綠遮天。偶然不速來三客。如此相思閱五年。居近人應疑卜晝。路難吾轉愛歸田。棟花風急村橋暮。欲散閒愁仗酒顛。

養蠶行

去年收絲利倍三。村中家家貪養蠶。蠶多桑少葉騰貴。千錢一筐賣未甘。溫風吹蠶蠶易老。滿箔三眠上山早。蠶娘一月不梳頭。懶惰却輸辛苦好。東家採得繭如脂。線向檐前索索吹。西家繭頭薄於紙。一樣蠶桑兩樣絲。將絲換錢索官串。無者價昂有者賤。貧家衣食天所慳。別許居奇營巧宦。卽今閩海尙興師。爭利人人學賈兒。聞道樓船皆市舶。貿絲豈必盡蚩蚩。

麥無秋行

三春雨多二麥荒。鬱卷盡萎田中央。大麥莖長穗未起。小麥莖短葉早黃。棟花風過纜車傍。憶得年時麥上場。場乾日烈聲拍拍。打麥作糜湯餅香。腰鎌往刈纔盈尺。雉尾攤襪藏不得。驚人角角渡水鳴。別向原頭草間活。可憐鴉鵲不知時。羣下荒疇覓餘粒。我爲老農語鴉鵲。明年好收從爾食。明年好收理則那。只愁無種將奈何。

西園書屋。順治丙戌燬於火。瓦礫之場。長養茨棘。垂四十年。比方有事於墾闢。旣惜地力。且以習

僮僕之勤焉。用東坡七首韻。與潤木同作。

池亭剩曩基。長養藜與蒿。中更四十載。未盡荏刺勞。貧家供賦歛。尺寸無所逃。焉能守石田。鬱鬱希陰膏。益利興由人。棄捐成不毛。旬來拾瓦礫。積比頽垣高。

赤日薰我顏。白汗沾我背。鋤荒如去病。快得三年艾。伊昔締構初。春秋想高會。滄桑變時局。草土少完塊。誰歌蟋蟀詩。蹶蹶職思外。南山方朝隲。厥象占蔚蒼。百年雖莫保。三徑幸猶在。給口茶蓼閒。其甘等炙膾。生涯失習勞。貴賤誰比數。優游不堪事。尙記前賢語。主人既率先。僮僕趾齊舉。給餐稱勤惰。功力積毫縷。種豆畦橫從。種瓜架支柱。所憂歲將早。六月竟無雨。澮畝一歉收。何由載筐筥。力惡不出身。貨惡不出土。尙恐機事牽。高人未全許。

陶家有田園。三徑忍就荒。籬落缺粗補。東西互相望。叢牙覆塊生。一片蒼雲蒼。地力久不効。新萌必繁昌。未飽啄粟鴈。先防踏蔬羊。望腹聊忍饑。先疇胡敢忘。

土性既有宜。人情亦有適。養材待椅桐。孰若樹榛栗。移根尋丈內。本向鄰家乞。落實庶可期。拙謀作乃逸。舉贏力不逮。何敢議築室。灌園豈無人。戢影勿輕出。此中足生事。吾計今已必。

惡木次第除。丁丁響斤斲。析薪祈克荷。生子願愚慙。我貧天所憐。田舍免風雹。用北史王蒙傳事隨爺課晨夕。老

圃庶可學。先公垂訓在。遠蹟企商嶽。黽勉奉前編。偏傍敢駁犖。勿言世業盡。五畝澤已渥。兄弟且同居。相

容在蝸角。

用庾信小園賦中語。

仲子性好遊。旅食辭南村。叔子嬾甘寢。鼻息鳴西垣。我介兩者間。奇士羞王孫。有時事游惰。挾瑟隨雍門。有時賦歸來。及見松菊存。行者咏陟岡。居者勸加殮。營身各有役。出處且勿論。若較杜樊川。季強慚令昆。

杜牧望故園賦云。昆令季強兮鄉黨附。

題朱子蓉六丈所藏張穆畫馬用黃山谷韻

綠楊風起驕不行。低頭嚼環如有聲。乾坤一線塵縱橫。肉中帶骨筆力透。不比東郊詩咏瘦。苦憶尋常棧間豆。青絲漫絡高家驄。龍眠妙手亦老翁。誰能更貌桃花紅。

送唐殿宣之浦江學博任

琴書壓擔曉風清。別路山行復澗行。青髻功名秦博士。白頭經義魯諸生。月泉詩好篇篇秀。寶掌峰奇面面晴。勿對空枰嗟首着。如今驥足是初程。

同韜荒兄飲鄭春薦齋

雲巖醉別忽經春。重向吳山問主人。陶侃登堂還拜母。茅容爲具也留賓。迴風卻扇渾無暑。急雨催詩若有神。鸚鵡莫誇才子賦。鄭家名擅鷓鴣新。坐側有鸚鵡。故戲及之。

七夕同鶴江孝績序仔集淮江聽鶯齋

紅蓼蒼葭水一方。到門松桂已迎涼。燈前歧路天南北。時鶴江初從山右歸。孝績又將遊江右。屋角雙星夜短長。雅集幾回逢好友。離情多半話他鄉。當筵有客傷存歿。不忍臨風發酒狂。思右朝也。

次谷兄自粵西扶先伯父櫬歸里二首

萬里行何畏。歸來始泫然。亂離成子孝。危苦得天憐。泪盡干戈外。魂驚瘴癘邊。路難經死地。初不計生還。自古蒼梧道。征人半舁棺。獐豕啼赤子。父老賙清官。竟返天南魄。翻疑夢裏看。附書吾久望。執手雜悲驢。

彭南陔長沙寄書知其長郎越千已於去冬物故一詩當哭兼以相慰

鵬賦長沙痛未窮。短書緘泪寄西風。隔年別酒征衣爛。幾日歸帆旅櫬同。善病我曾憐久客。未亡人又累衰翁。畏途盡室成何事。頭白君應悔斷蓬。

雨中過董靜思山居

十里沿洄暮靄昏。熟衣天氣半清溫。菰蒲響雨烟沈浦。蘆荻迴船水到門。躍網忽驚魚尾健。墜簷初見橘頭繁。好山偏阻登高屐。笑指郎家半日村。

題陳允文圮橋授書圖小影

戰鬪功輸運籌亞。英雄勇退神仙舍。誰招四皓出商山。我信留侯本儒者。奇謨祕策乃天授。老父一編事聊假。不然韜畧世所知。豈必傳從圮橋下。陳生爾意非好奇。那將此景供圖寫。志大何妨學賢聖。時清未

許談王霸披圖商畧意何如。傳習師門計有餘。余與允文俱出姚江先生之門眼前經術皆經濟。莫問人間未見書。

同人中秋集陳寄齋宅

南游我昨逢佳節。兩度中秋瘴如墨。去年過酒洞庭湖。萬頃平波鋪練雪。電光一瞬等閒過。倏忽還家又
今夕。良朋折柬邀共醉。憐我匆匆復行色。晚來微雨過城西。影落人衣月東出。明河一洗秋容淨。海氣天
光較然劃。街頭無人市聲斂。相國門前月尤白。門前看月堂上歌。白月紅燈互相射。繡屏屈膝團嬌面。赴
節紅牙夜深拍。沈沈簫管索索絲。微動梁塵墮猶澁。清商一線徐引去。桂樹流颺葉初脫。此時中庭月停
午。窈窕穿簾巧相覓。須臾腰鼓忽勾闌。假面西涼羣嘖嘖。歡場冷落年數久。對此翻令感蕭瑟。卻憶江湖
載酒時。蘆花深岸聞吹笛。故人顏色就歸夢。羽短途長莽飛越。此來會合殆天幸。竿木逢場看跳擲。徵歌
自笑膽氣粗。起舞偏驚耳輪熱。東南盤敦君眼見。供帳如雲掃無迹。獨留好景付我曹。莫向瑤臺話塵陌。
只愁客散月易斜。人事蒼茫難料得。來年作客知何地。此地來年召何客。南枝棲鵲催五更。東野寒蛩號
四壁。殷勤酌月還一杯。珍重清光照離別。

過曹希文齋

恠底移家忽入城。小堂幽事頗關情。琴牀近海潮添潤。茶榻分泉火就烹。摩詰園亭依畫棗。建安人物入
詩評。也知習嬾便支戶。不廢塔除有送迎。

有感戲寄韜荒兄

格新曾被老元偷。此外何堪說唱酬。但到西園應秉燭。不逢東野肯低頭。故交牛耳成孤憤。棄婦蛾眉托四愁。指一邑子。博得美人開口笑。暫時跛足也風流。兄以酒後傷足。故戲及之。

去夏余自黔東下與德尹相左。於辰沉道中。今德尹嶺外將歸。余又有西江之役。二詩留寄。

薄遊踪跡久沈吟。準擬歸飛息故林。別去無端隨末俗。窮來何事愜初心。書籤日過塵窺隙。茶竈風迴響和琴。一笑飄然仍作客。竹窻閒殺是清陰。

二頃田知戀洛陽。眼中岐路等亡羊。江風海雨愁頻結。桂樹荆花感又長。草草歸程雙爪跡。勞勞別夢五星霜。恠來出入如相避。鄉國何時鴈作行。

留別朱日觀祝豹臣朱與三陳寄齋王南屏家西莓叔韜荒兄眉山姪二首

綠髻西風幾遍吹。許巢貧過少年時。用方千詩中語。好官氣色車裘壯。獨客心情故舊疑。近月江雲偏綯采。未霜淮柳尙搖絲。名場此日誰高步。消得樊川贈別詩。

渭城歌酒最纏綿。存歿關心一點然。落日故人長笛賦。右朝歿已一年。曉星同調斷鴻天。夢回露白移橙候。路入秋紅剝棗邊。任是登高何地好。青帘那不憶羊川。

西江集起癸亥十月。止甲子三月。

萬里歸來。繼逢儉歲。家憲副伯。方攝西江臬。邀余入署。自冬涉春。周旋六閱月。爲治遊學之裝。到家五日北行。不欲浮沈鄉曲。傷長者之惠也。

將有南昌之行示兒建

我年二十九。足不出鄉閭。南舟阻錢塘。北轅限姑胥。循循守矩矱。尺寸敢少渝。汝祖見背日。戊午暮春初。銜恤在終天。有生不如無。實擬奉成訓。終身依墓廬。黽勉同汝叔。食蒿甘薺如。此意難自保。饑寒旋相驅。初心忽中變。末俗誰諒余。麻鞋走從軍。凶服尙未除。自傷越禮教。臨去還躊躇。汝時年十二。戀戀來牽祛。汝母病在牀。強起縫衣襦。爲我擇吉日。勸我姑徐徐。山林忍窮餓。此事古有諸。奈何逐浪遊。浪游計終迂。我雖口不答。含意鬱未攄。恐喪丈夫勇。一笑起跨驢。寇盜滿西南。殺人棄土苴。書生爾何恃。急往不暫須。輕命踏危疆。鹵莽拚羈孤。雖無司馬才。肯戀終軍繻。近避關西公。憐才等璫璣。留我置幕府。開誠使懷扞。初來荊州城。漸入西南隅。蹉跎戰爭地。四載過隙駒。憶自前年冬。洞庭上雙魚。吾叔又捐館。訃音傳豈虛。蠻燈黯淡花。相對慘不舒。天低嘯哀猿。月黑號訓狐。開書忍再讀。百感併集枯。上念兩先靈。窀穸未歸居。下念汝曹長。失學猶從渠。告歸策始決。寧獨懷樵漁。中丞知我真。贈言借吹噓。坐覺瘴癘掃。清風拂長途。檢點篋中裝。百金頗有餘。束書戒行李。觸熱我僕痛。故人灑陽守。開館留籃輿。不惜分俸錢。寄歸慰妻孥。命窮氣方傲。卻去同揮鋤。行行百餘日。始得還菰蘆。夜半叩柴扉。犬吠雞羣呼。門前五株樹。綠槐間黃榆。

亂葉落我前。忽驚秋又徂。入門拜靈几。血淚交模糊。舉頭汝在旁。依稀記形模。汝弟急欲見。喚起髮未梳。見爺不識面。反走牽娘裾。對之重泗涕。存沒傷心俱。別離經喪亂。泛若浮海鳧。得歸特天憐。未歸敢自圖。稍欣世業在。斷蓬復依株。繞屋十畝園。桑下可種蔬。卽此勤學圃。貧士有故吾。都緣懶惰久。力不任菑畬。室人免交適。官稅多積逋。倦羽又辭巢。飄飄徠洪都。仲氏久去家。南北音塵疎。季子資性矯。青氀誤爲儒。齷齪小兒曹。款段下澤車。蟲蝦恣跳躍。蝸涎活停瀦。翻唉尺水艱。蛟龍困泥塗。男兒誇富有。豈在堆倉庾。願汝勤孝弟。餘事到讀書。孝弟乃本根。根完花葉敷。章句粗能通。已勝耕田夫。煌煌京兆後。子孫雜賢愚。五世澤未斬。有生夫豈徒。不聞王僧虔。鳳凰綴蠟珠。崢嶸覘頭角。少小志本殊。十五號成童。何況十六與。當時同隊者。轉眼分龍豬。眷毋學汝父。風塵厭微軀。厲人恐似己。取火夜看雛。悔心用自警。作詩焉敢誣。

輓呂晚村徵君

屠龍餘技到雕蟲。賣藝文成事事工。晚就人誰推入室。蚤衰君自合稱翁。才今漸少衣冠外。名果難逃出處中。身後有書休論價。也應少作愧楊雄。

黃晦木先生從魏青城憲副乞買山資將卜居河渚有詩十章志喜邀余同作欣然次韻亦如先生之數

黃竹先生今夏黃。自離商嶽走跟蹤。青錢易長苔莓路。畫藁頻移薜荔牆。未就丹砂顏屢換。欲尋白社願

難償。身經開寶流離後。那問西川舊草堂。

覆巢事過儼他生。回首風波噩夢驚。碩果兩朝誰鬪健。白頭一意自孤行。縱橫鈎黨清流禍。峭嶮風期月。且評幾爲借柯憐病鶴。羽毛如雪照人明。

力圃雖艱勝力耘。多時吟嶠望停雲。未完婚嫁何多累。投老關河正失羣。菜把恩羞叨地主。薦章名幸脫徵君。故人高義傾頽俗。薄俸能爲卜築分。

方丈蓬萊事不經。收心風物到園亭。紅蕖豔後蟬遺蛻。黃菊開時鴈拂翎。感遇詩還工屬對。垂簾卜屢驗奇零。少微越國真高士。移向吳天只一星。

松木場遙路向西。人言罨畫似西溪。雨中綠樹雞豚柵。霜後黃雲秔秫畦。琴筑鏗鏘聲落澗。風花高下踏成蹊。憑君指點神先王。可待游人爲品題。

數折溪橋兩版門。也須插槿植籬樊。閒攜翠竹紅籐杖。晴晒牛衣犢鼻褌。耕讀新功兒解課。漁樵故事客能援。名香老研隨身具。目擊誰知道亦存。

樂事從來出苦辛。錯將勞尾比枯鱗。眼空身世殘碁劫。日漏軒牕過隙塵。方外衣冠驚俗客。夢中墳墓抵歸人。碧幢紅堵村村徧。肯咲繁華不稱貧。

釣臺何必盡桐江。牀下人來拜老龐。隱凡湖山歸四壁。捲簾風雨到西牕。花源舊隱今何代。白鶴新居卽

此邦已約隣翁勤斬竹。與排蟹椹林魚樁。

一痕龜墨食江郊。從此深居遠市朝。椰子冠從方士借。筍皮鞵赴老僧招。定巢屋角晨依鵲。挾彈林端夜逐鴉。馬跡車輪何處覓。遁仙名籍在丹霄。

槃澗時清且寤歌。欠伸光景底消磨。年豐米穀登場賤。水闊魚蝦漏網多。勿藥肯教眠食減。不祥端賴鬼神呵。鷄豚預有登堂約。慰我歸來興若何。

武林哭萬充宗二首

武功十葉變儒風。理學君家創甬東。謂甬東安先生動爵初除緣國破。饑寒不出勝途窮。傳家同異叅三禮。君所

著有學禮質疑絕筆春秋關兩公。近註春秋惟定哀未就耳四十九年君勿負。蓋棺餘恨未成翁。

忘年交誼許忘形。君自殷殷見古情。看竹款門纔一宿。去秋余自黔歸充宗同主一畝之見過一宿而別篝燈襖被每孤城。充宗下榻海昌每入城未嘗不快對也無端泪落期難續。前一日人遠書來有與如此人亡夢亦驚回首師門誰領袖慈湖風月可憐生。

宿梨洲夫子武林寓舍卽次先生丙辰九日同遊舊韻二首

湖山憔悴哭新阡。謂萬充宗何意蕭齋榻許連。燈火夜長楓葉雨。杖藜秋老菊花天。孤踪汗漫三年外。萬事荒

唐一笑前。話到昆明殘劫罷。又緣久別卻凄然。

徑路先須辨陌阡。眼中榛莽正鈎連。骨携芸蠹隨書局。任放醯鷄覆壘天。出處心情三聘後。滄桑人物兩朝前。先生高臥貧何礙。流俗知音恐未然。

富春道中

烏柏林中霜撒華。千樹萬樹圍村家。門前紅葉掃還落。白子著枝如白花。寒雅成羣啄不盡。幾處飛出聲啞啞。荒灣敗葦江忽轉。鴈陣欲落整復斜。青山正缺天一面。澹入無迹雲拖沙。十年夢想富春渚。指點圖畫空嗟呀。豈知去家纔百里。足所未到如天涯。人情貴遠每忽近。往往耳目遺煙霞。他年卜居恐未穩。此際覓句差堪誇。江山秀絕客懷俗。母使擾擾同魚蝦。

雨過桐廬

江勢西來灣復灣。乍驚風物異鄉關。百家小聚還成縣。三面無城卻倚山。帆影依依楓葉外。灘聲汨汨碓牀間。雨簑烟笠嚴陵近。慚媿清流照客顏。

睦州

過城灘更急。直下匯分流。樹色銜雙塔。山形豁一州。炭烟濃傍塢。樵逕細通舟。風日晴尤好。初冬似晚秋。

泊茶園

危樓高百尺。水落岸如山。村市尙開店。檣燈別占灣。喜無塵點髻。那用酒熏顏。漁笛能相就。飄飄壓浪還。

淳安謁海忠介祠

桐鄉遺愛在。民自不忘公。一邑清名著。三朝直節同。衣冠瞻古貌。俎豆感村翁。此日流離意。誰憐在野鴻。

青溪口號八首

裊裊荇帶風。疎疎浪花雨。吳客過淳安。逾人少鄉語。
隔水聞語聲。空中應來肖。行到響山潭。人人發清嘯。
溪女不畫眉。愛聽畫眉鳥。夾岸一聲啼。曉山青未了。
來舩桅竿高。去舩櫓聲好。上水厭灘多。下水惜灘少。
家住溪東西。共飲門前水。對面不聞聲。長灘響十里。十里長灘在界口司上。

漁家小兒女。見郎嬌不避。日莫並舟歸。鷓鷯方晒翅。
橋壞竿繫繩。水淺牛可跨。牛背渡溪人。須眉綠如畫。
屯溪船上客。前度去裝茶。娶得東村婦。經年一到家。

威平鎮舊名青溪洞韓蘄王擒方臘處

舊日青溪洞。英雄一戰歸。江關留故壘。草木震餘威。路僻烽烟靜。時平盜賊稀。悲笳吹薄暮。峭壁冷斜暉。

入歙州界

青山寒更高。白日冬易暮。篷脚影初斜。濛濛入烟霧。

鮎魚口中流。一山俗名小普陀。絕頂佛閣頗盡結攬之勝。

神山海外絕經過。此地名傳小普陀。兩岸樓臺疑蜃氣。中流日月隘驚波。桑田有劫終成幻。松頂盤空老作窩。我是游人憐偶到。鐘聲回首夕陽多。

從屯溪坐竹筏至休寧縣

江路西來盡輕裝。稱竹船。人家新屋宇。村落好山川。沙場魚跳岸。蘆荒鴈下田。怕談兵火事。猶記八年前。

遊休寧城南落石臺

一片蒼雲護。無端墮碧空。離奇存石性。刻畫憎人功。巖間刻石多俚鄙語。只有朝陽到。偏宜曲水通。峭寒難久住。酒醒忽西風。

過齊雲山麓

亂峯尊白嶽。一水接青溪。雲自香爐出。天盤石磴低。勝游憑指顧。倦路失攀躋。游子匆匆意。征途只向西。

晚至漁亭

小步聞名好。到來頗覺煩。鈴聲驢背背。篳戶水窮村。旅食豐年便。方言晚市喧。黃茅山百折。此路指祁門。

祁門

二水走江湖。下流極瀾翻。濫觴不盈尺。小縣同發源。一支下錢唐。余家東海壘。直從朝宗處。溯洄到山根。西流入鄱陽。鯨口豁然吞。飄飄孤帆色。帶雨辭烟屯。水流自相背。客意難並論。五丁誰能馭。頑石劃輿坤。鏟除恐不勝。徒費斧鑿痕。浩浩江湖流。一道疾於奔。關梁近增稅。亦如石塞津。寧觸石磯怒。莫逢關吏噴。君看商賈路。辛苦趨祁門。

發猴潭出倒湖

石惡狀爭變。波喧勢就低。小舟輕畏路。百折下危溪。雪意雅先覺。寒光霧易迷。似聞魚米賤。已過浙江西。

浮梁縣

苦霧吞江去。茫茫出遠津。長程催短晷。白骨散青燐。城小初經亂。民愚久疾貧。琵琶臨老妓。容易嫁商人。

景德鎮觀御窑瓷器歌

浮梁縣西開畫棟。御廠燒瓷供輦送。江天漠漠生黑雲。百竈烟浮日光動。初看兩眼炫青紅。夜入孤舟夢龍鳳。文成璀璨羽毛活。勢健開張牙爪弄。畫彩新添寶石岫。異光欲走黃金汞。頗聞中使出三年。十斛缸成選難中。至尊服御崇節儉。珍錯屢卻退方貢。卽看嗜好非異物。器象雖精本日用。同時玉瓚注黃流。古玩金魚配清供。君不見宣成嘉萬舊官窯。散落民間價自高。博古圖成曾進御。猶容款識傲前朝。

登饒州鄱陽樓八韻

東北山根削。西南地軸摧。豫章帆不斷。彭蠡鴈初廻。再見孤城闕。翻憐往日災。江湖銷戰伐。荆棘妬亭臺。旅望天邊豁。雄心亂後灰。殺霜冬旭暖。釀雪曉雲開。欲去猶延佇。無聊奈獨來。未除豪氣盡。飄蕩媿詩才。

曉渡鄱陽湖

三更我夢滕王閣。東北風高響簷鐸。覺來舟子已開篷。澹月微痕天一角。須臾湖面過如飛。霜氣撲舩人攬衣。蒼茫烟霧來時路。水底紅輪吐半規。也知此景殊不惡。失意翻令感牢落。少文四壁有江山。何苦年年事飄泊。

送又微姪自豫章東歸兼示德尹

垂老雙親驗鬢絲。薄游仍欠草堂貲。關河最左勞人計。猿鶴能寬閉戶期。落拓生涯吾自笑。滯留情事爾應知。從教物論分優劣。點檢初心也旋疑。

錢玉友自嶺南來

萬里歸裝一葉身。何緣相見卽相親。世無元九知音少。客到東方自譽頻。南北弟兄愁急雪。關山踪跡悔勞薪。權輿殂落皆天意。羽獵賦萬物權輿於內殂落於外眼底休輕我輩人。

玉友別後寄詩二首次韻奉答

會合洵有緣。此會乃絕奇。數言甫投分。鼓勵兼箝錘。同調世少人。高論宜卑之。平生喜聞過。指摘真吾師。

啓我腹筒草。當君囊中錐。刺骨實中病。苦口俄含飴。自笑狂奴狂。況抱癡叔癡。來詩內一首示全身受針砭。豈獨論文詞。勉強學新粧。未必盛副笄。沈吟攬古鏡。又恐噓違時。

浪游無近遠。同作風塵面。相顧眼雙青。相期心一片。勿嫌去住乖。各要眠食健。布颿冰雪候。風色五更戰。青燈豫章城。幾夜猶夢見。書來感深愛。金石矢不變。因君激壯志。鍛羽敢辭倦。來書期余同作都門之行

杜肇余侍郎巡海閩粵故人嚴子愿在其幕中道出南昌詩以贈別

短裘夜犯章江雪。快馬嘶風三十驛。梅花催促使臣鞍。楊柳春旂看一色。平生未識侍郎面。才子翩翩杜陵客。與君昔別年月深。約略歲書更六七。余行絕徼偶生還。舌在途人那堪說。半生出處禍亂定。萬事蹉跎謀算拙。喜聞田橫出海鳥。旋見盧循免羈縲。昔之滄海今桑田。萬戶春耕破甌脫。如君此去真壯遊。幕府從容借籌畫。乾坤昇平我何樂。差勝危彊事行役。敵廬家世東海濱。禁網佃漁寬水國。遲爾同歸作飽餐。巨魚雪點吳鹽白。時初開海禁

喜陳允文自故鄉至

十日春風釋硯冰。客邊詩句擬催徵。愛題僧舍紗籠壁。恨事江城雪打燈。壓擔書兼行李重。飄蓬感爲故人增。西山晴色差堪望。高閣何因載酒登。

題聲山姪仗劍擁書圖

君不聞王喬厭世方盛年。飄飄笙鶴縵山巔。神仙尙須致身蚤。何況富貴如流泉。爾生負奇學書劍。三十頭顱行可見。毛錐禿穎刀善藏。毋乃多才累窮賤。竭來汗漫事遠游。劍首一映徧九州。下澤車中羞識面。跼蹐豈必皆封侯。歸來勸游凡幾日。好酒好書兼好色。明朝一笑又出門。惘惘都非可憐別。時清氣壯驕不得。依舊收身弄文墨。有田不耕男已長。無米能炊婦非拙。何緣此日遂支扉。難免他年聊捉鼻。柳條風軟記騎馬。木榻香清夢調瑟。余亦東西南北人。圖中光景增太息。

元宵前一夕家觀察伯署齋小集次允文原韻

以下甲子

又作春燈宴。他鄉共此筵。盤分柑味美。時有以四會柑相餉者月傍燭花妍。故態逢人發。新愁被酒捐。南州有懸榻。我醉且同眠。

與劉北海

君與令季太史俱先大父門下士故篇中及之

我降庚寅月建午。襦襟含飴及見祖。升沈未定矩矱移。荏冉今年三十五。客塵南北浪奔走。家學淵源迷步武。先子音容漸藐茫。典型何處追王父。小時猶記竊餘論。文集諸劉指堪數。翰林風度杳莫卽。伯仲聲華憶明府。布帆夜下十八灘。幾日春風到南浦。頗聞人頌神明宰。章貢循聲比卓魯。劉時宰贛縣一城烟樹起樓臺。千里關河靜鞞鼓。官閒往往飛鳧出。緱嶺軒軒見霞舉。此時我作豫章遊。却恠知名緣獨沮。卽論世講屬前輩。小子投謁固其所。懷中一刺署姓名。雙屐逡巡阻春雨。先生忘年復忘分。先枉高軒訪羈旅。下

車相揖亦有人。此事今亡乃聞古。修名不立行可媿。半臂重交義奚取。謂余當有祖父風。不料頭顱尙如許。長身三世求形似。毋乃籛戚嗟仰俯。入門一笑想欲狂。注目含情兩無語。

章江舟次送李斯年赴湖南幕府二首

同學紛紛起布衣。文章聲價剩珠璣。怪來五十高常侍。猶自隨人側翅飛。
瀟湘歸櫂我匆匆。重到如君又不同。若對亂前談亂後。不知誰識李元忠。

楚黃陶忠毅公以世胄協守寧前衛癸未城陷公殉節焉事具合肥宗伯行略其冢子上辛出公

畫像索題用舊韻

已陷金城破玉門。瓜沙河渭總啼痕。捐軀幾輩曾當局。抵掌何人不大言。五代鐵鎗傳畫像。百年江月醉清尊。李家降表尋常事。話到書生惱夢魂。

黃泥山村看桃同錢道耕倪上韓家兄子敬南城友日姪聲山

春洲雲煖烟濛濛。天勢四垂濃霧中。一望千橋萬橋外。綠楊芳草交青葱。沿洄曲岸行數里。小艇閣沙水
忽窮。捨舟聯袂赴村落。勝境引入桃花叢。迷離景光耀平野。爛熳高燄燒晴空。穠華似慳微雨著。繁蕊欲
拆朝陽烘。居民補綴好圖畫。屋茅籬竹家家同。沙灣汀澗限南北。徑路曲折迷西東。老人衣冠稱古貌。往
往負戴隨兒童。隔花姹姪自呼伴。笑語已斷迎迴風。牛羊未歸隘巷靜。雞犬亂走柴門通。武陵光景在人

世但患放棹無漁翁。兩頭絃管百壺酒。醉夢一醒風塵胸。江村草堂我亦有。頗笑此景他鄉逢。韶華經眼況偶到。有意留戀終匆匆。章江夕陽催晚渡。水面回看紅雲紅。

新柳詞和允文二首

輕烟和雨着梢頭。萬縷千條作態柔。落得游人春興懶。遠遮鄉路近遮樓。桃花輕浪過花朝。溪女提魚渡板橋。一種紅腮多貫柳。阿誰先挽最長條。

次韵酬別聲山姪

讀書恨不搜大酉。結客每慚稱小友。命窮共落磨蝎宮。木偶尋常嘲土偶。身輕勸翼尙江湖。力困常鱗等淵藪。蚤知去住兩牢落。曷不杜門乃奔走。章江二月春風顛。橫管孤吹折楊柳。愁來襤被思決去。貧戀家居恐難久。青燈聽雨且鳴雞。白眼看雲又蒼狗。醉眠夜夜長加股。欲出朝朝還被肘。行裝偶到急雪前。歸棹纔移禁烟後。有生光景爾許過。懷抱逢人詎堪剖。酒尊一澆壘塊空。如刳魚鱉去乙丑。山妻不須視儀舌。俗子合訝哆衍口。子今高堂況白髮。好去稱觴酌大斗。天倫樂事古所難。鬱鬱猶能居此否。

疊前韵酬別友日兄

弟生庚寅兄乙酉。五歲肩隨稱棣友。兒時嬉戲失同羣。稍長衣冠就參偶。雞豚近局接南北。烟火深村望林藪。余游故知生理拙。君亦何爲轉蓬走。夜雨燈挑江上花。春風夢繞門前柳。男兒有懷莽未遂。僂指半

生時已久。未能扣角事騎牛。抑且埋名作屠狗。不爾合甘原憲分。鶉結從渠見襟肘。誰令志氣自摧頽。漫著征衣隨短後。君平季主世少人。眼底升沈向誰剖。頭盤叫噪抒狂憤。笑聽更籌移子丑。忽然顧影還自憐。氣塞神傷箝在口。豈應美好長貧賤。定有光芒射牛斗。勸君自信當益堅。適野不須謀可否。

三疊前韵留別恭庵兄

黃雞白日移卯酉。失學無端負師友。名微自甘時所棄。命隻敢嗟吾不偶。

出李廣傳注

惟兄諒我謂我真。野鳥

心終戀郊藪。君家如圃大可憶。斲石開池煩下走。竭來搔首動鄉思。想像春天好花柳。阿翁官高諸子秀。世業平泉必長久。余也先疇漸拋棄。熊虎何當子命狗。從教久瘦帶寬圍。遑問長貧衣露肘。低顏分出古人下。尙冀鞭羊視其後。愛君玉樹臨風前。老蚌明珠一雙剖。杜陵兩男養無益。少長何堪集癸丑。八百桑株十具牛。經營無物貽黃口。願君綵衣侍歸駕。莫謾折腰爲五斗。某丘某水記釣遊。許我題詩草堂否。

四疊前韵酬別允文

與君訂交從己酉。鄉社無多推益友。文瀾一篇論警策。詩格千言誇對偶。白眉三馬人所畏。

北史馬子廉兄弟三人皆

能文時有三馬皆白眉之譽

昆友聯翩出才藪。余時懷槩初出遊。未免籍湜汗且走。蘭苕翡翠爭秀句。何異飄風孺垂

柳。登場鹵莽拙用長。墜壁逡巡困持久。契舟已往莫求劍。畫虎雖成終類狗。君今落筆更老成。斂手蓋芽看運肘。但思上第慰眼前。肯顧虛名計身後。精金百鍊行自惜。璞玉一圭猶待剖。丁年行笈記癸辛。甲族

科名豔丁丑。謂允文從祖素菴相國。未能飽飯便汝腹。也學饑驅餬我口。客中告別別倍難。濁酒直須傾一斗。暫留
幾日辦歸裝。長說倦遊今果否。

同聲山姪過羅飯牛禮洲草堂別後賦寄用昌黎寄盧仝韵

先生老向塵埃裏。有志竟成高蹈矣。衣冠已與世人同。猶自芒鞋高屐齒。竹溪羅舊居地名茶園寬十畝。春雨
分膏給妻子。清風七椀生冠石。寧都冠石茶出飯牛手製者品在顧渚上絕跡杜門凡二紀。買山定有賣山人。窮乃辭鄉奚足
恥。舊莊唱和傳表迪。亂國流離傷董祀。巢由逃世事果難。身未出山名滿耳。一聲長嘯落天半。散作雲烟
隨處土。都無猿鶴愧林巒。絕少鷄豚餽鄰里。獨攜筆墨與人際。堅臥有時呼不起。南州懸榻尋常下。小技
似可供驅使。彼皆金夫勢力求。未許感恩況知己。豈惟落筆不輕易。立品潔身從此始。淨明菴主石田翁。
前輩風期看未已。半生衣食天故吝。稍稍芻薪給驟駟。硯田一片歲有秋。食力聊用代耘耔。先生猶云吾
負疚。懶惰無端釋良耜。故人往赴河陽幕。本不希心榮膺仕。先生療貧策又奇。獨往孤行竟誰恃。禮洲草
堂地清絕。見說賃春連圯址。易堂人物近無多。把臂此來君準擬。萍踪怪底成相左。雨雪殘冬悵無似。朝
朝江口望歸帆。百日奚童覓生趾。春深沙溆停烟榜。有客忽傳君至止。廿年馳想結深企。欲致高人我何
以。急呼阿咸聲。徑造門。渴馬奔泉勢難俟。先生應門無五尺。反鎖柴荆入村市。歸來蕭寺忽相逢。一臂初
交乃狂喜。招呼雙屐過江閣。草草杯槃有真理。乞君畫稿幸不辭。謂我頗可尋涯涘。斯人不因筆墨重。獨

行自足傳野史。卽從畫品論高下。清矯寧讓營丘李。我詩不工何足酬。別後空慚寄雙鯉。

芙蓉庵水亭

徑轉春陰午未移。小亭如蓋俯漣漪。柳邊風到鱗鱗活。鏡裏欄開面面宜。欲去與狂呼酒伴。重來緣淺看花時。此間著我真塵俗。何用多留疥壁詩。

清明風雨舟發南昌允文聲山追送於江干更以數言留別

竹鷄啼苦催清明。滕王閣前春水生。西山高入雲霧裏。雨勢下壓洪州城。桃花杏花半狼籍。岸柳自拂孤舟輕。連朝有約同買棹。二子未果余徑行。雲山欣欣赴歸路。烟樹漠漠愁離程。布帆風急不肯住。到家正及聽新鶯。

康郎山功臣廟十四韻

疇昔驅除會英雄。想像間驛移青雀舫。酒灑白茅灣。鷹隼搏空擊。鯨鯢授首還。波濤經虎尾。矢石避龍顏。一戰西南定。羣公策力閒。死方開國運。生不點朝班。紀信無遺恨。曹成本世官。顯榮褒後裔。茅土愴重頒。奕葉將軍樹。廟前古槐。相傳明太祖破僞漢時封爲將軍。中流砥柱山。炎風焚鐵券。石馬嚼金環。黃屋今無跡。朱旗閃尙殷。太平何事業。要害此江關。廟貌瞻嚴肅。時情易險艱。興亡他日事。清泪獨潺湲。

餘干道中

新烟幾點散晴霞。遠岸殘桃晒網家。莎草一汀長帶鷺。湖田二月已鳴蛙。葱葱曉日銜山秀。裊裊春風赴柳斜。自咲薄遊緣底事。漲痕空記去年沙。

昌江竹枝詞八首

浮梁縣西山漸平。浮梁縣東水更清。濛濛天氣長如雨。臥聽前灣水碓聲。
甕石碾碾轉轆轤。舂砂淘釉有精粗。年來御廠添窰戶。不種山田另起租。
機欄葉瘦芭蕉肥。菜花半開桃李稀。背山園圃蜜蜂出。近水人家燕子飛。
穀雨前頭茶事新。提筐少女摘來勻。長成嫁作隣家婦。勝似風波盪槳人。
船頭船尾不多高。盡日爭先走怒濤。博得夜來春睡熟。一篷烟雨半枝篙。
小兒灘頭水沒磯。幾點雨著行人衣。草煙迎岸翠撲撲。牧笛未歸鵝鴨歸。
一繩飛界兩山頭。積石排椿抵截流。驚起野鷓鴣箇個。五更風浪網初收。
村殺山家唱四時。本鄉歌好少人知。愛他曲水如巴字。別與新詞譜竹枝。

齊雲山六絕句

仄徑丹梯萬仞懸。石楠擁蓋不知年。不因鐵笛吹山裂。那得游人到洞天。
雨織龍梭香作涎。四時不斷吐飛泉。藕絲簾子玲瓏影。捲起晴雲別有天。

右門。右天。右水。右洞。

兩峰獅象對崢嶸。鐘鼓聲中玉座清。夜夜河魁瞻北關。羽衣天半坐吹笙。右真武殿
禹鼎神姦散九州。誰教一柱峙丹丘。白雲已鎖塵寰斷。還有香烟在上頭。右香爐峰
急歸悔不上匡廬。辜負峰南大小孤。恠事此來仍滿願。已看五老又三姑。右五老三姑峰
輕身直上挾天風。雨外天都望或封。安得近南長見日。與排三十六芙蓉。右紫霄崖

武林寓樓與德尹夜話

迎面蛛絲落幾番。每從遠信報平安。各驚顏狀他鄉換。一落江湖戢影難。犵烏蠻花天萬里。朔雲邊雪路千盤。六年踪跡連牀話。大似羌村夢夜闌。

立夏前三日集汪寓昭願學堂兼留別姚天寰顧九恒沈昭嗣陳廣陵章豈績馮文子嚴定隅及家德尹時余將入燕二首

一櫂江城又隔年。春雲春樹記尊前。故鄉樂事留高會。獨客關心奈別筵。興罷豔歌重按拍。酒闌孤月正當天。年來事事輸人後。齒序慚居六子先。同會十人。余齒在第四。

綠酒紅燈促坐深。無多同調況知音。琢磨頗望成全璧。激烈何須到碎琴。起舞自憐中夜影。急觴難緩此時心。軟塵十丈騎驢去。怕被人傳倚樹吟。出莊子注

西水讌集留別姚夢虹宋受谷張王士張介山邵翼雲金子由吳震一卓次厚九如

南路風濤北路塵。歸艎纔泊復征輪。三秋斷梗如遊跡。一座清風抵故人。壁壘降旗文戰罷。乾坤攬轡客懷新。天涯珍重臨歧意。只有貧交不諱貧。

敬業堂詩集卷五

諭淮集起甲子四年

甲子夏遊學京師。始渡淮而北。客有賦涉淮以壯余行色者。敬謝之曰。君不聞橘踰淮且化爲枳乎。余方虞余之失其橘性。而與枳爲類也。

歸自江右。隨有燕山之行。示別家人。

南北勞勞但可嗤。流光瞥過少年時。祇緣累世留門戶。那得此生無別離。斗酒且禁連夕醉。長箋難和送春詞。勿論向後愁深淺。已覺燈前鬢有絲。

錫山舟次遇外舅陸射山先生自淮南歸

落帆當溆浦。曲岸轉擊音。已感骨肉語。兼傷去住心。斷雲晴出岫。老鶴暮歸林。莫作俱飄泊。翁今白髮深。過二瞻兄維揚寓齋。兄有贈行詩次韻酬別。

征衫初換且停橈。一日江程兩信潮。欲去郵亭塵滾滾。乍來岐路馬蕭蕭。詩文價定人爭購。書畫船輕客待邀。劈紙風流看好在。綠楊回首記紅橋。

雨發宿遷

苦被林鳩喚雨多。北風獵獵渡黃河。不辭滑路衝泥去。且免驚沙刮面過。一騎鱗魚仍入貢。十年瓠子尙聞歌。饑荒接壤人方說。愁見城南豕涉波。

郟城道中

蹇驢三四驛。平野入飛沙。白日孤城閉。清沂一道斜。井疆郟子國。風物魯人家。漸與淮南異。村村枳棘花。

沂州送錢玉友往新城

又作殊方別。春衫客泪收。但須眠食健。莫話短長愁。鄉夢經蠶月。人情望麥秋。黃雲天四合。何處辨青州。

伴城旅店次徐子大壁間韻

淺草平陂極望通。客程漸入亂山中。坐消脾肉全無爲。貧檢詩囊幸未空。沙磧涼生蕎麥雨。茅檐香過棗花風。却愁長日行難到。又指斜陽一抹紅。

齊河

關城餘霸氣。雞犬入齊風。山豁平沙外。天低小縣東。魚鹽知俗古。豚酒祝年豐。別有雄繁意。休誇管晏功。

晚抵晏城次壁間韻

目力窮邊酒旆生。熟梅天愛偶然晴。高樓吹角風無賴。壞壁留詩客有情。紅日忽沈烟起處。白楊長遞雨來聲。萬山回首如屏障。一片平蕪接晏城。

渡蘆溝橋

草草漁梁枕水邊。石湖詩裏想當年。誰教磬石通南北。鐵軸銀蹄一例穿。金史章宗明昌元年始建蘆溝石橋。

京師中元詞二首

萬柄紅燈裹綠紗。亭亭輕蓋受風斜。滿城荷葉高錢價。不數中原洗手花。
銅盤小拍坐張燈。手指城東滿月升。從此夜遊涼似水。漸無人賣擔頭冰。

憫農詩和朱恒齋比部

幽風本王業。稼穡知艱難。立政務明農。化理自古然。我從田間來。疾苦粗能言。請陳東南事。約略得其端。
初冬下菽麥。深溝及春前。根株栽培護。益使土力堅。麥黃未及秋。晚蠶又催眠。祈晴三四月。雨水翻連綿。
針水分稻秧。襜褕行耨田。時方仰膏雨。杲杲恒當天。炎威一熏灼。泥淖同熬煎。委身沸湯中。辛苦少所便。
好風槐柳下。欲往不暫閒。老穉亦靡寧。桔槔遠吸川。或防霧損花。又恐蟲傷根。半年壟畝畔。力竭心亦殫。
如此冀西成。食報理或存。但令畝一鍾。歲事幸告竣。私租入富室。公稅輸縣官。所餘尙無幾。未足償勤拳。
況逢水旱加。往往多顛連。逃亡等無地。芻牧肯見憐。高位有仁人。垂聽宜惻焉。所以古大臣。農事恒惓惓。
流移進圖繪。咨儆陳風愆。有時亟施賑。詔旨輒擅專。有時撫瘡痍。逋賦請悉蠲。不上封禪書。不獻羽獵篇。
乾坤生生機。君相操微權。一念苟憫卹。惠風自遐宣。矧今天子聖。綏邦必豐年。

將有西山之遊次謝方山員外見貽原韻

勞生莽莽喚塵機。又向燕臺換袂衣。出郭人如秋澹蕩。入山天愛雨霏微。閒拖竹杖尋詩瘦。賤買村醪覓伴稀。贏得謝家新句好。澹忘隨處領清暉。

松林寺

含烟含露一梢梢。花果禪扉鎖合牢。野鳥不知園有禁。隔牆啣出紫蒲桃。

晚抵退谷與大司空朱右君先生露坐啜泉

晚色秋光帶遠坳。眼明初喜見涼螢。泱流噴石渾疑雨。老樹交陰合有亭。照影豈能忘盥漱。出山誰復辨清泠。閒僧尙記曾來客。一縷茶烟話酒醒。公不到西山二十八年矣。老僧猶能說舊遊時事。

宿隆教寺僧房

最愛塔墀細雨中。瓦盆高下列芳叢。白花紅子皆秋意。斟酌西窗一夜風。

從水盡頭步上五花寺閣

數折溪橋接水源。亂鴉高樹又村前。路危礮阻千重石。山偪窗開一面天。佛界偶來宜白晝。帝城難辨是蒼烟。留詩莫作匆匆去。勝境吾將借榻眠。

臥佛寺

古寺無僧佛倚墻。臥聽蝙蝠掠空廊。晚來光景尤蕭瑟。葉葉西風戰白楊。

金章宗手植松在壽安山西嶺上

壽安山頭一老松。從下仰視青童童。羽衣仙人擁蓋立。柄短却作偃僂容。我思躡屨苦無伴。范老性華與到許我從。婆娑初自枝亞入。中乃可置一畝宮。四傍四枝分四面。側理橫出交蓬鬆。東西南北不相顧。意到各自成虬龍。中間大枝裘挈領。高勢一攬收羣雄。其旁峭壁截牙角。直下千尺方藏鋒。蒼髯翠尾掉空際。蜿蜒飲澗天投虹。千山萬山似搖動。鱗甲未斂雲濛濛。須臾夕陽轉西麓。脇下旻旻生微風。一聲老鶴忽飛出。竽籟散入隣菴鐘。老僧指似時代古。手植傳自金章宗。是時朔南罷兵革。貢使一一舟車通。明昌泰和號極治。擊毬詐馬習俗同。近郊亭館恣遊宴。逐獸不入深榛叢。遺山野史有深意。國亡事去忍更攻。孤臣飲泣記舊恨。肯畏後世譏不公。洗粧樓空春月白。射柳園廢秋花紅。一朝故物獨留此。鬱鬱幸自蟠蒼穹。爾來四百四十載。坐閱桑海如飄蓬。輪困差堪伍社櫟。瀟灑猶足驕秦封。君不見報國門前數株樹。托根悔落塵埃中。

碧雲寺後一山。皆內監葬域。中有豐碑二統。刻魏忠賢里居官爵甚詳。守僧云。忠賢自爲生壙。本朝初年。忠賢名下。葬其衣冠於此。恨無有力者。培其石也。

碧雲臺殿倚雲端。香火旛幢屬內官。一代賢奸青史定。兩朝黨籍白碑殘。松杉暮雨鶡音革。羊馬秋風石

骨寒却喚山靈無藉在。猶容廁鬼瘞衣冠。

冒雨至香山晚宿來青軒

曲磴初從鳥道攀。短牆東面抱灣環。九重城闕微茫外。一氣風雲吐納間。暝色浮鐘來別寺。秋聲分雨過前山。紅塵那許高千尺。任放層軒擁翠鬟。

同吳六皆陳叔毅湯西厓宿摩訶菴

禪榻吹燈睡不成。棲烏枝上已三更。紙窗一面朦朧月。只道秋聲是雨聲。

白鸚鵡次魏環極先生原韻

古有雕籠戒。今看負質奇。縞衣窗外月。白雪隴頭枝。大潔從人忌。能言被俗疑。商山留羽翼。皓首托風期。
原詩有秋陰高漠漠。是爾入林期之句。蓋公歸志已決矣。

重陽前六日同翁元音彭椒岳錢玉友朱遠度吳六皆陳允大叔毅沈客子湯西崖談未菴家荊州聲山小集分韻

青袍紅燭影相銜。劈紙心情故不凡。柿葉庭空聞朔雁。蘆花水淺夢南帆。探驪有客曾驚坐。歸燕無詩亦畏讒。開口勿輕談世事。尊前除飲便須緘。

過顧培園編修新寓

不遣輕塵點鬢華。斯人直比玉無瑕。蜘蛛屋角垂垂露。蟋蟀塔除豔豔花。半枕茶烟清晝閣。一窗香篆煖文紗。從今唱和貪多暇。底用題詩苦憶家。

九日讌朱大司空花莊次韻

漠漠秋蕪一望開。驚心節物帝城隈。閒招南國騎驢客。來上西風戲馬臺。人與黃花同白社。鳥隨紅葉下蒼苔。六年此度天南北。己未在荊州。庚申在銅仁。辛酉在貴陽。壬戌在蕪湖。癸亥在西湖。惆悵名園又舉杯。

送六皆歸杭並寄章豈績馮文子嚴定隅二首

風急馳鳴沙外村。轉蓬何意復歸根。多時白髮思遊子。依舊青衫出國門。光範三書原失策。渭城一曲最銷魂。買田只合山莊住。珍重天涯贈別言。

黃葉黃花媚晚晴。酒旗茅店一程程。稍嫌壓鬢邊沙重。不礙衝寒布被輕。夢短臙留他夜話。計偕稀上故人名。得歸我亦抽鞭去。忍向桑乾聽雁聲。

嚴籬菴侍御招同惠研溪吳天章王咸中王孟穀朱西峻喬無功陳叔毅湯西崖小集卽席分賦相逢塵埃中。交臂面不熟。雅人著懷抱。有如瞳在目。侍御鄉國賢。未見意久屬。司闡戒勿拒。徑造少躑躅。一月三過從。看到秋殘菊。長安多讌會。熱客後先續。長揖容吾曹。情深感君獨。紅豆致蕭淡。河東才屈曲。石隴光走珠。漢陽璞藏玉。髯陳好儀表。大喬絕谿谷。小朱及瘦湯。秀發秋眉綠。廁我數子間。備保坐擊筑。

淋漓取盡興。豪爽一破俗。逃觴或竟去。下榻或信宿。戲具雜博籩。古音披簡牘。狂言醒不禁。好句互傳讀。坐令布衣交。放誕惟所欲。甘從平原遊。不學步兵哭。吾生莽無涯。疲甕信兩足。玉川洛城居。并少數間屋。未能逃空虛。時復累口腹。所嗟才地劣。徑路故窄蹙。諸君湖海士。相輳適如幅。倘不鄙迂疎。前期幸交勗。

與研谿別後疊前韻寄之

我從湯子交。耳君名已熟。初來長安城。欲見塵眯目。名園一杯酒。邂逅情未屬。余識研溪於趙恒夫農部席上。別時蓮蕊

紅。懷刺久躊躕。忽忽秋向老。花期過黃菊。晚赴嚴公招。名流趾相續。森然授几席。後至惟爾獨。衆中造膝談。稍稍致款曲。湯言不我欺。伊人果如玉。似從坡陁遊。迤邐入崖谷。松篁幽徑轉。照我鬚鬢綠。石潤斂雲霞。泉清作琴筑。對之浮氣盡。亟取藥吾俗。曲尺移木床。醉畱同一宿。男兒屬有才。未了三千牘。買田歸可種。買書行可讀。委身俛仰中。初念固不欲。況當搖落候。有痛忍輕哭。涼燈一穗花。夜半開未足。浙瀝風洒窗。淋浪雨鳴屋。明朝門外路。泥淖驢沒腹。連鞍共君出。寸步苦局蹙。紛紛疾走兒。馬騁車脫輻。卽此慎所之。久要互相勗。

汪東川宮贊屬題秋林讀書圖時汪給假將歸

似曾依樣買林臯。只愛攤書不蓋茅。榦老從添鴉點葉。影疎初見鵲成巢。好風開卷聲相遞。古墨分香手借抄。怪得先生官況懶。畫中光景十年拋。

送大司寇魏環極先生予告還蔚州二首

曳履星辰二十年。尙書襮被故蕭然。勇能自斷天難奪。清畏人知世已傳。白社竟成娛老地。黃金不貯買山錢。閒雲一片秋寥廓。何限風光倚杖前。

嶽嶽寒松表御書。寒松堂公臨行時御書賜額也。新堂歸到好懸車。身名似此真無媿。進退何人綽有餘。報國文章傳後

起。謂無偽中翰。立朝風骨想當初。不因祖帳東門道。太息方煩比二疏。

送陸蓬叟之井陘

不道西遊爾許難。万峯高下渡桑乾。亂鴉雪緊荒程暮。叢雁天低斷角寒。燕市莫尋當日伴。并州且作故鄉看。到時尺素煩馳寄。及與梅花報歲闌。

叔毅見示初度述懷詩有感而作

與君世好幼同里。其室則邇其人遐。年踰三十未識面。各被衣食驅天涯。余顏顛頓變黑瘦。攬鏡未免頻咨嗟。子髯毳毳長一尺。瀟灑亦復沾塵沙。燕山此來忽交臂。相視莫逆心靡他。衝風冒雨屢相過。朗吟狂吟聲謹譁。行時肩從坐齒序。愛比兄弟豈有加。一朝顧我歛不樂。刺眼怕看重陽花。叔毅生辰在九月九日。新詩一篇把似我。音調慘裂如秋笳。對之思苦難卒讀。冰雪入口冷戰牙。看君炯炯具至性。母喪未闋衣仍麻。泪痕往往在枕席。皐魚岐路憐京華。憶余浪跡走絕徼。未夏四月初辭家。先君下世纔一載。面目赧汗逢人

遮平生相知奉禮教。豈敢自外傷芸瓜。至今肝腸抱至痛。視息毋乃同豚豕。歸田但祈免溝壑。此願易給原非奢。天於我輩胡獨忍。故令具體蒙疵瑕。子今襟期頗澹漠。西溪片瓦已可賒。塵埃洞瀕一回首。便欲策蹇乘柴車。幾時真約結隣去。對門老樹枝槎枒。

研溪索題紅豆齋詩冊二首

東田西澗勢相叅。此本如今恰有三。一點丹砂非俗物。居然鼎足占江南。吳中紅豆三本。一在拂水山莊。一在王奉嘗東田。一在青溪堂。

即研溪近居也。

薄遊久欠買山資。齋笏初安負一枝。但使主人長閉戶。樹名何取號相思。

題惠研谿嶧嶸集次汪蛟門原韻三首

不成吟上紫薇亭。翡翠琉璃并作屏。一事比渠差較勝。自編佳句付樵青。

紕繆論才本不多。詩家勁敵許誰過。不須綽板尊前度。搖膝聽君喚奈何。

硯齋吟吻暖生春。推爾堯峯步後塵。賴是老元偷格律。知音此外斷無人。每被老元偷格律。樂天語也。蛟門舉似研谿。故借作轉語。

燕臺雜興次學正劉雨峯原韻十首

九關王氣鬱千秋。如此風光蕩客愁。東路雲垂遼海闊。北條山勒太行收。天蟠宮闕瞻螭尾。地擁塵沙散馬頭。老柳不禁吹笛意。夕陽疎影傍高樓。

千古荆丹事最奇。誰教秦騎竟橫馳。漁陽鼓動天方醉。督亢圖窮悔已遲。他日酒徒猶擊筑。向來博道抵爭碁。無聊尙有酣歌會。不似東方但苦饑。

北史流傳樂未央。上都幾處鬪球場。幕南地空聞傳箭。花外樓高見洗粧。紫色蛙聲雄八族。烏衣馬糞笑諸王。分明裂帛湖邊月。及照三朝舉國狂。

十三陵古隔巖關。往事低摧父老顏。黃鳥哀歌經國恤。紅巾新籍點朝班。金戈運啓驅除會。玉匣書留想像間。斫却冬青人盡識。祿恩羊虎尙斑斑。

直放江湖日夜東。異時黨論比狂風。清流禍起名賢盡。甘露謀疎國運終。一紙興亡看覆鹿。千年灰劫付冥鴻。時平翻幸吾生晚。不見郊原戰血紅。

班馬文從一代編。世家人物數華顛。藏書已獻言何諱。焚藁無期客問年。莫道汗青從蠹蝕。好憑頭白寫蠶眠。諸公袞袞皆才彥。珍重須教信史傳。

帳殿崔嵬令閭寥。凱歌連歲奏鉦鐃。雲深雁路朝盤馬。雪點狐裘夜射雕。都護玉門關不設。將軍銅柱界重標。職方別載魚龍國。唉指烽烟薄海銷。

恩波一夕滿江湖。下詔蠲租例久無。忽見鯨黎成感涕。始知草野愛微軀。龍船旗鼓三江戍。馬轡雲霞五岳圖。盡道登封儀注古。秦松容易比貞符。

朱門榮戟列東華。金谷筵開辦咄嗟。雪甕分漿噉楮樵。霜刀剪韭妬萌芽。歌喉欲斷從絃續。舞袖能長聽客誇。贏得狂生無藉在。欲捻書籍問東家。

百分一棹過航艖。何限關河載酒前。投筆生涯經絕域。定巢歸計失驚絃。縱橫野馬羣飛路。跋扈風箏一綫天。曾是征南舊賓客。摩挲腴肉也潸然。

冬日張園雅集同姜西溟彭椒岳顧九恆惠研谿錢玉友魏禹平蔣聿修王孟毅張漢瞻汪寓昭陳叔毅湯西厓馮文子談震方家荊州聲山限韻

丈夫置身非廟廊。便合食力勤耕桑。誰教鹵莽走京洛。去住兩策無一長。天公似憐太坎壈。一事獨許平生償。招呼朋好作痛飲。逸足快脫籠頭韁。城南小莊如畫裏。樹頭一扇風旗張。忽從空曠入叢薄。積雪寒峭屏山傍。籬根涸池受落葉。窗面破紙穿斜陽。圍爐坐密氣漸煖。稍覺冬律回春光。大杵蒸菜芣薑辣。滿甕印酒開泥香。蒲萄已充筵上果。但見枯蔓牽隣牆。初拈險韻鬪傑句。旋徵雅令搜枯腸。須臾耳熱更豪劇。角逐兩兩爭低昂。傍人却問何所樂。我亦自咲狂夫狂。三年隻身走萬里。絲路裊裊衝蠻鄉。豈無釣藤壘名。拚獨酌。意緒冷淡難禁當。翻身勇決作歸計。又被饑餓驅遊裝。別人騎馬我徒步。鍛羽無分追高翔。行藏眼底但如許。有意排遣終悲涼。風流見賞古不乏。跌蕩慎勿矜辭章。明朝定傳好事口。指點此地成驢場。安知酒徒積放意。不欲與世衡鋒鋟。城頭鴉啼客盡散。獨立四顧神蒼茫。

與張漢瞻次侯大年韻

竹垞今名家。從君賞文格。每逢最佳處。輒爲浮大白。自抱萬卷書。羞隨五侯客。養親冀一第。歲月去已積。變體爲時文。頻遭按劍斥。皇天老眼暗。才地每相厄。何妨掃娥眉。稍稍傅粉澤。肯違靜者性。彼好此不易。送少詹王阮亭先生祭告南海

祝融南都水環匯。赤龍渴飲九州外。扶桑日枝萬丈高。吞吐晨昏變明晦。颶風磨旋鬣帆片。蜚雨珠沈蛟室珠。幻呈綵縷現蜃樓。淡入蒼烟失鷺背。不知靈封畫何境。禹鼎無從辨疆界。元和一老去作碑。廟貌千秋遂稱最。茫茫元氣收不盡。好手何人復堪代。康熙甲子帝東巡。特遣輜車告時邁。瑯邪先生啣命往。嶺嶠星明指華蓋。祠官奉幣紛趨跲。天使陳辭虔跪拜。靈旗肅肅雲蓬蓬。一氣流通百神萃。向風海鳥聽鐘鼓。有眼蠻人識冠帶。時清邊徼無烽燧。道遠詞臣多紀載。公之文章在館閣。每借名區發雄槩。曩時蜀道今海邦。盡洩光芒天不愛。後先人物諒無幾。才地彼此恆相待。所傷或從遷謫到。終恐才鋒束機械。如公擁傳真壯遊。直放胸期寫豪快。豈徒榮遇際曠典。已見風流壓前輩。佛桑花發啼鈎鞞。幾日歸航下瀟瀨。還朝快示紀行篇。浩浩洪波納千派。旁人若問陸賈裝。徑尺珊瑚手親碎。

題田綸霞少叅山薑詩後

得從京國數追隨。真愛山薑一卷詩。佳處不嫌千遍讀。識君翻恨十年遲。古人可作心相許。同調無多論

稍卑。便欲借抄煩乞子。手彈紅燭寫烏絲。

小除夜椒舛招同沈韓錫陳叔毅談未菴家聲山集王巖士樞部齋限韻

蠟燈垂燼夜厭厭。寒薄重裘雪滿簾。得路才華同輩少。椒舛刻管
瑜集初成畏人心跡擇交嚴。座中放論歸長悔。醉

裏題詩醒自嫌。等是關山牢落意。年年馬齒路傍添。

次椒舛寒夜書感見示原韻

多生積習未全除。烏有何勞問子虛。四壁燈明孤影外。一官霜偪二毛初。也知作客年年慣。若論謀身種種疎。比似無家還較勝。叩門連夜得兒書。

除夕飲許時菴先生寓齋二首

南衝烟瘴北風沙。每到殘宵輒憶家。土銕光陰飛石火。瓦盆消息候梅花。百觚濁酒澆愁緩。一杵疎鐘警夢賒。草草行藏十年事。寒鐙影裏又京華。

小閣圍爐薄雪侵。坐移宮漏夜方深。最憐入座聞吳語。轉遣思鄉動越吟。射虎殘年留想像。亡羊歧路判升沈。對床未易論前事。倚賴鳴雞激壯心。

敬業堂詩集卷六

假館集上

起乙丑正月盡一年

甲子秋闈被放。將出都。適黔撫楊公。內擢少司馬。相留邸舍。丙寅冬。公以養親告歸。臨別檢點詩笈。得若干首。蓋從公唱者。無過數篇。餘皆應酬雜作。分上下兩卷。

乙丑元日立春

忽於此地逢元旦。況復斯晨屬早春。萬里關河雙眼雪。半年衣袖六街塵。閉門客少詩初就。老硯冰堅墨未勻。擬遣家僮擇歸日。曆頭愁換一行新。

人日和朱大司空作

纔到春晴馬意驕。金溝流水玉河橋。東風吹綠鱗鱗活。倒捲餘寒上柳條。

錢幼鯤將遊江右以詩留別和送一首

西江吾舊到。爲爾唱驪駒。山縣稀逢驛。風帆健過湖。別離無善狀。貧賤有長途。草色春衫外。飄零奈酒徒。

鳳城新年詞八首

萬歲山前百戲陳。內城排日作新春。金錢多少纏頭費。半出朝元會裏人。

綺羅珠翠極鮮新。襦袴誰憐雪裏貧。一樣昇平好時節。兩宮春帖進詞臣。
杏黃韁配紫貂鞍。天子親祠祈穀壇。前隊不教傳警蹕。萬人齊傍馬頭看。
纔了歌場便賣燈。三條五劇一層層。東華舊市名空在。靈祐宮前另結棚。
雀翎風細遞傳呼。三日君恩有賜酺。飛放泊前騎馬入。文官班次執金吾。
巧裁幡勝試新羅。畫綵描金作鬧蛾。從此剪刀閒一月。閨中針線歲前多。
添得樓中幾日忙。簇新裙帕紫姑裝。一年休咎憑伊卜。拍手齊歌馬糞鄉。
繭紙輕敲作鼓聲。啣環絡索鐵錚錚。踏歌連臂同兒戲。何限年光付送迎。

花朝前四日朱大司空招遊南莊同田荆巖編修作

馬首年光柳色新。郊原一棹去尋春。題詩我是重來客。稱意花如舊識人。
青嶂捲簾晴帶雪。好風攬袖座除塵。公如早爲蒼生出。絲竹陪遊得幾巡。

石隴山莊爲王咸中賦卽送其南歸

十載才名滿帝都。明朝襦被竟歸吳。重穿曲逕尋蒼隴。獨上高樓望太湖。
放艇有人春載酒。打門無吏夜催租。眼前此境殊難得。或恐桃源但畫圖。

疊舊韻送研谿南歸三首

軟塵堆裏出都亭。却指家山入畫屏。筭到清明沙路盡。一鞭淮岸柳條青。
陌上重聽緩緩歌。家如傳舍偶經過。一身有母尤應惜。負米終如欲出何。
辛苦京華二十春。枉緣篝火勘窮塵。有才如此吾猶惜。未必天終老是人。

春分前一日再遊南莊

每從遊賞發詩端。草色烟光漸滿欄。興到不辭連日醉。春分猶剩幾朝寒。
晴邊苑路差宜馬。低處花枝欲礙冠。二十四番風信在。與公一度一來看。

刑曹關內馬公出知杭州謹呈古體一首

名賢展經綸。動與事權會。何當量才地。屑屑較儕輩。明公蘊蓄奇。出手世無對。
關中昨寇亂。豕突掩不戒。公時在鄉閭。倉卒發雄槩。一呼集義勇。指畫定向背。登陴氣勢壯。
強賊遽巡退。守土非無人。儒生握成敗。上功待州牧。報績果稱最。廻翔歷曹郎。
再使聲華沛。蔚州老司寇。許予少置喙。推公賢且能。謂足壓當代。昨來權北關。
吾杭扼要害。流風揖士子。積弊剔黜僧。至今蔽芾棠。勿剪頌遺愛。大廷崇吏治。
一例視中外。此郡復煩公。托付意有在。府治統九城。東南江海匯。連山際西北。
中畫吳越界。繁華昔或然。疾苦今百倍。婦女力蠶桑。丁男勤耜耒。先時辦公稅。
絲穀長早賣。供億苦多門。奸胥巧科派。弱同几上肉。色有豐年菜。況今兵燹餘。
水旱互痼療。千里水陸衝。六年轉輸艱。稍期甦喘息。亟望爬瘡疥。租從巡幸蠲。
圖覲流亡繪。

公今乘傳出膏雨。行當霈兒童。騎竹迎父老。扶杖拜賤子。本部民饑驅走邊。塞歸耕自茲決。直欲從公邁。
上已後二日同楊耑木出彰義門次日抵涿州馬上口占

放慢遊韁信意行。不教馬力困兼程。草低天遠盧龍塞。柳暗烟濃涿鹿城。遷次心情移客夢。蹉跎鄉社負躬耕。杏花開過清明節。猶記橫簫聽賣餠。

奉陪朱大司空松林看杏花同吳楞香許時菴王薛澱吳匪菴諸公分韻二首

偶逐肩輿出郭行。蹇驢斜照一鞭橫。平分節物歸僧舍。背指風沙帶帝城。好鳥啼能添野趣。晚花開及向春晴。作詩自取排吟興。何必留題識姓名。

煖烟濃霧互交加。樹裏孤亭四面遮。杏酪已調初改火。松濤忽瀉正烹茶。內官老作茆菴主。遠客閒看禁苑花。果園已屬內廷多謝東風不相笑。一枝歸壓帽簷斜。

鳳阿山房詩爲侯大年題冊

畫葉吟多手自芟。桐花昨夜夢千巖。羽毛大好君應惜。從此歸飛正不凡。

送徐毅庵歸梅里

綠槐陰下一條街。五度東風感計偕。路盡始知村舍好。調孤肯與俗工諧。雲開馬首重經嶽。毅菴歸途將登泰山絮暖鰲魚恰渡淮。想到溪南好風日。家人已製笋皮鞵。毅菴不喜著鞵故云

送祝彥方落第南還

來何艸艸去匆匆。帝里春殘悵別同。歸燕吟成芳草外。跨驢人老落花中。枉緣腰扇遮西日。悔逐烏裘障北風。略賓王詩。烏勸爾一杯須作達。畫眉何取入時工。

次德尹見懷原韻二首

倦飛無力出風塵。每對來書輒損神。失路又成三歲別。賣文何補一家貧。浮生泛梗仍孤影。上苑攀花偶故人。多少五陵裘馬地。等閒狼籍路傍春。

爛醉旗亭得幾場。鄉愁如海詎勝量。花紅村社巢邊燕。草綠春陂雨後羊。每送歸人因得句。漸消奇氣不成狂。便思短策飄然去。檢點征袍已八霜。

送楊崱木歸里兼寄朱日觀錢昭平朱與三王子穎陳補思寄齋諸同學

悵斷河梁又一回。留真無策去徘徊。唉能傾國時方妬。曲到知音調始哀。別語感君如骨肉。故人疑我竟塵埃。相逢爲話狂猶昔。只是生疎酒伴來。

端陽後一日同人集朱竹垞表兄齋分韻

愛君庭戶清絕。比似長松夏塞。荷柄香含風幔。櫻珠紅吐冰盤。聞人不妨鬪酒。樂事無如去官。同是江湖倦翼。可憐萍聚長安。

送郭臯旭歸平湖

屢卜行期又屢愆。一官空憶廣文氈。鮑經世味貪歸路。老傍時名狎少年。席帽白堆蓬髮雪。布帆青入柘湖天。倦遊未必非良策。萬頃烟波待釣船。

畢鐵嵐僉事將督學貴州枉問黔中風土短章奉荅兼以送行

浪遊我昨趨黔境。一線乾坤歎踰躄。辱公就我來問塗。臨別能無片言贈。此邦風物口能說。筆墨形容反難罄。但從記憶得大凡。一一舟車往堪證。荒程杳邈六千里。冷署蒼涼十三郡。荒山無樹茅紛披。亂水分溪石綿亘。金蠶閃閃夜放蠹。苦霧濛濛晝埋窅。經過密箐偶逢人。雙眼睚眦語難聽。裹頭黑獮氈覆膝。赤脚花苗裙及脛。呼同山鳥似有名。籍隸官司總無姓。其中一二稍秀拔。畧解詩書誦賢聖。憑將流寓較土著。有似蓬麻草中勁。卅年況復兩遭亂。子子殘黎偶然剩。此時收斂加冠巾。亟賴名賢計安定。先生制菽傳海內。櫟括家家奉龜鏡。昨年選曹得兩浙。私爲鄉人喜稱慶。公赴銓選初除浙江學使已而改授朝廷有意變成格。使者移官膺後命。勿輕荒徼愁遠宦。此去依然執文柄。五丁力在山爲開。尙闢蠶叢作蹊徑。苗民雖頑亦人類。向化何嘗絕天性。從來教養視人事。豈謂聲呼無響應。幕中浦郎傳功。況才士唱和溪山好乘興。公聞此語當颯然。快束行裝倚鞭鏡。

送葛受箕赴建陽丞

南行風土近鄉關。路轉三衢第幾灣。簿領老除新佐貳。幔亭天與好溪山。松間日影哦詩過。花下文書判尾還。葛工楷書如此襟期原不俗。宦途有味是蕭閒。

喜外舅陸射山先生至都六月望後爲先生初度同學數子置酒容園爲壽敬賦長句四首以侑觴

幾遍芒鞋踏帝畿。星埃頭上片雲飛。漸除豪氣終違俗。纔卸行裝便憶歸。晚節尙餘文筆在。舊遊併覺酒人稀。清時肯擅徵君目。收取聲名待拂衣。

夜夜星明處。士天青山高臥奈無緣。癸辛志每隨行笈。甲子詩多入紀年。未定草堂天寶後。就荒松徑義熙前。身爲甫里先生裔。莫咲貧無一稜田。陸魯望詩。我本曾無一稜田。

小別回頭又隔年。重瞻鬚髻轉蒼然。探芝園綺今無伴。善飯江湖老亦仙。簾閣日長棋算劫。荷陰人去鶴看船。過從最憶須雲閣。老樹濃陰庇亂蟬。尊酒名園借榻餘。眼中泉石自清腴。同來我亦辭巢燕。暫止人猶愛屋烏。新沐頭輕從髮禿。穿花步穩倩藜扶。尙平此日差無累。懷袖親攜五岳圖。

送李蒙山回嘉禾任次外舅韻二首

敏弦歌罷水風涼。碧野秋遲未剪霜。報道今年官酒賤。公畦小稜秔花香。

衣裘容易改寒暄。來往無端閱使軒。歸夢隨君到蘋末。白鷗飛處是田園。

苦雨次少司馬楊以齋先生原韻二首

連旬暑雨不曾休。邸舍焚香兀自愁。猶勝萬重烟瘴裏。五年三伏滯炎州。
剝啄聲稀退食堂。生衣十日透新涼。閒中筆墨能添潤。一桁簾波潑硯光。

東朱竹垞表兄時移居古藤書屋

整妮牙籤萬卷餘。誰言家具少于車。僦居會向春明宅。好借君家善本書。
宋次道居春明坊家多藏書皆校三五編推爲善本土大夫喜

讀書者多居其側以便借抄當時春明宅子比他號僦直常高一倍

酬別鄭寒村

闌風伏雨兼旬臥。晴路一鈎新月破。簾前暑退得新涼。門外泥深成埒坳。此時有客過言別。蹙蹙毛驢壓
歸馱。囊空隣酒賒不來。醒眼相看但愁坐。一篇削藁辱佳序。
寒村臨行爲余序慎旃二集 七字留詩慙屬和。余才龔陋

非爾敵。強以珠璣承咳唾。甬東同學屈指論。往往傳經接師座。
余與寒村俱出黃門 故人再與瀛洲選。
謂介眉治一柱兩太史 一

鄭榮陽尙摧挫。失羣行李獨淹泊。有價文章久傳播。燕山此度六往來。未免征衫被塵澆。干時少術非爾

病。當路無援是誰過。向來人盡棄所長。遠到君能見其大。古人可作迺殊代。同調相求凡幾箇。勿將時命

較窮通。只許才名出寒餓。羨君有志成果決。笑我無端逐游惰。偶逢知己私自嘆。每送歸人輒相賀。荆榛

滿地羊觸藩。日月周天蟻旋磨。故鄉樂事殊可憶。欲往從之正無那。秋風一騎不可留。八月江田熟香稞。
范性華徵君屬題陳憐小影

小像沉香手自熏。前期如夢却疑真。五湖忍負閒風月。爲少扁舟共載人。

送聲山姪之湖口二首

自憐萍梗尙京華。勸爾江湖飯好加。南北豈堪頻送別。去留等是未還家。遠書到眼秋垂泪。時間韜荒兄長沙計信

隻影挑燈夜落花。如許流光真痛惜。校量何計穩生涯。

萬頃波心坐白鷗。一天涼雨到扁舟。三年廬阜虛前約。往在南昌與聲山相約入匡廬度歲不果兩度潯陽感舊遊。帆葉依依

重入夢。蘆花瑟瑟正交秋。青衫尙洒琵琶泣。那得平銷我輩愁。

墮馬歌爲朱悔人賦用李茶陵集中韻

朱髯別家久不歸。如鳥羽倦猶孤飛。踵決曾穿雪中履。綫綻未補秋來衣。長安城中多第宅。年少翩翩好裙屐。青絲絡馬裝馬鞍。騎出從誇新買得。髻乎足不出戶庭。塵高十丈看橫行。忽然欲詣良友酌。正坐倚壁空餅罌。蹇驢力小不任重。性命敢謂男兒輕。牽來未識北馬性。借得大感東家情。掀髯却上跨鶻坐。掣電流星一鞭過。此時逸足縱莫收。造父旁觀巧難佐。踈馳駕馭良匪易。馬上人從馬前墮。鏡中欲博齟齬。唉。賦裏偏憎插花賀。康莊大道城西阿。失足何必皆坡陁。有生所事非意料。未許輕薄相嘲訶。當年頗怪

王處仲。曾爲伏櫪生。悲歌虎頭失。計始投筆。猿臂何物誇橫戈。不如漢陰歸閉戶。安穩生涯信徒步。未成
矯矯鶴南飛。那免焚焚兔西顧。夕陽牛背輸牧豎。夜雨蘆中負漁父。故人乘車爾戴笠。此作叅軍彼主簿。
天生爾以不羈才。困躓風塵是誰誤。眼前只作墮馬看。一跌無端豈終仆。印須肯赴舟子招。將伯誰爲輔。
車助。我生鹵莽事奔走。屈指嶽崎經畏路。尙逐他人肥馬塵。浪遊此出凡三度。似聞樊圃限狂夫。便合因
君警晨暮。

上少司成徐蘋村先生二首

數仞宮牆入望新。鼓鐘相應在成均。何期當路心猶折。如此憐才意始真。魚鬣欲騰燒後尾。琴材偏賞爨
餘薪。百川東下何須問。賴有狂瀾手障人。
韓愈猶居博士員。風流此外孰隨肩。來叅講幄三千士。及聽聲華四十年。樂地不踰名教外。人才都定咲
談前。讀書射獵論初志。直爲從公願執鞭。

送周雪客赴太原藩幕兼訊安邑丞陳六謙

半年裙屐軟紅塵。旅橐多緣好事貧。手板老方除佐領。幕僚古亦屈才人。巖關夜度荒雞月。絕塞秋高一
雁賓。投轄舊遊豪氣在。莫將俗吏視陳遵。

題張漢瞻望雲圖兼送其歸膠城

風流取相賞。至性關感動。我交天下賢。孝友得張仲。學成家轉貧。母在身愈重。長因負米出。屢缺晨昏奉。天如憐斯人。不忍付寒凍。但令邀一第。薄少分半俸。逋尾戀慈烏。奇毛刷雛鳳。中情稍自慰。白髮免尸饗。如何舉子場。久抑禮部貢。賣文給衣食。頽首逐儕衆。三年長安城。側足塵瀆洞。布衣慈母綫。風裂秋來縫。坐遣望雲心。時時結飛夢。誰從筆墨下。寫此肝腸痛。披圖見君意。我乃有餘恫。平生蓼莪詩。廢置忍再誦。菽水不逮親。偷生復奚用。君今及歸養。此樂世罕共。板輿隨春遊。金經侍晨諷。好與鬪雲根。靈護手親種。

送汪寓昭南歸

國家制科設。取士數亦夥。苟非得其人。臚仕真瑣瑣。子來試南宮。命中弦激箏。千言屬廷對。一一明珠顆。謂宜遂騰上。帽壓宮花朵。羣飛或刺天。而子足猶裹。束書欲南下。躑躅每未果。草草薄遊裝。昏昏短檠火。半年仍旅食。今始買歸舸。一涉仕宦途。古人比韞鎖。子方富年力。抱負況磊砢。更讀十年書。識老才亦頗。井然見經濟。歷試靡不可。得第未得官。於遇非轆軻。子如歎失意。何地更處我。

送何雪神宰溧陽

嶺表才名久軼倫。一官江界去逡巡。五千里外飛鳧地。三十年來謁選人。可有孟郊爲縣尉。長容閱貢作州民。謂宋梅知鳴琴以外無公事。花氣能銷簿領塵。

周廣庵編修席上分賦秋蘆十六韻

秋入江湖濶。天連葭菼荒。懷人方渺渺。極目但蒼蒼。搖落空洲畔。參差枉渚傍。拂莖看漸老。抽笋記初長。露壓梢梢重。聲添葉葉涼。戰風廻折戟。溜雨得沈槍。寒水依痕靜。殘暉弄影忙。白疑先挾雪。青愛乍經霜。暗浦菰交暝。沙田稻嘆黃。就橋迷蟹簾。引路入漁莊。錯莫招窮士。延緣阻一方。寒蟬遺晚蛻。遠雁落斜行。鶯築悲辭漢。琵琶怨嫁商。托根隨地有。薄植過時傷。織箔思蠶事。編簾隔草堂。刺船如有約。吾與在滄浪。

秋夜集古藤書屋時梁藥亭將歸南海聯句送行

此首亦刻曝書亭集

露葉倦未飄。雲鴻遠相引。朱竹垞星埃感蓬勃。物候變淒緊。湯西厓怪怪八達達。有客發修軫。梅餘僕夫在郊

坵。稌黍被隰畛。梁藥亭柅車浮淪瀾。舍權度巖嶙。朱雷殷風息颺。海大魚見驚。湯峽猿有時歸。南雪終不賈。

查。八九月之交。六千里而近。梁。懷居興雖洽。判袂情詎忍。朱置酒青藤陰。入門走蛇虺。湯颺颺涼颺動。灩灩纖月隱。查。山杯深窪匏。野蕨脆嚼菌。梁。迎寒笳卷葉。戒夜鼓鳴篋。朱談鋒騁趨雄。詩械破窳窘。湯毫毛秋穎脫。墨光古香吮。查。臨當黯然別。且復莞爾哂。梁。炎瘴固所便。眠食勗惟謹。朱行看早梅墊。到及蟄蟲蠢。湯。前期久勿忘。鄉夢今迺準。查。穆如清風篇。持以示均尹。梁。

再送梁藥亭次大冶司農原韻

草低天遠見牛羊。九月燕山早得霜。去國一樽秋惜別。入時雙黛老羞長。飛鴻與作書空字。落葉輕如度嶺裝。一物差堪銷客況。難拋鄉味是賓郎。

王黃湄給諫屬題紅袖烏絲圖二首

十級丹梯百媚城。小欄高下得芳情。美人一笑花齊放。爲報毫端鍊句成。
橫幅看題幼婦辭。箇中多識背時宜。只除一事曾瞞却。諫草焚來不遣知。

重陽後一日長椿寺讌集聯句

此首已刻曝書亭集今附錄

九日倏已過。

姜西溟

濕雲漫四郊。森森長雨垂。

朱竹垞

颯颯虛檐捎。病葉戀冷枝。

梁藥亭

驚鳥盤空巢。晨興踐夙

約。

陸射山

攬袂皆貧交。勝引雙樹林。

魏禹平

宛若深山坳。藤綰三秋蛇。

張漢瞻

槐舞千歲蛟。頽柿迸露實。

英坼霜苞紅的的。吳萸

陳叔毅

碧茸茸。秦丸瓦溝竄。鼯

湯四匡

戶網牽蠹蝓。蘚深最屬伏。

查梅餘

篆古蒲牢哮。

粥魚晝浩浩。

俞大文

墻雞午膠膠。光景歛明晦。

姜眺

覽窮檜櫂。新酌綠滿罍。

朱晚菘

黃充庖。豈意青豆房。

俄頃羅嘉肴。鳴薑贖紫蟹。陸題糕餘彩。貓子鵝新韭。配魏鮮。鮑枯荷包。已見雉膏登。

玉鈎射朱角。力骹盤拋急。觴易沈頓。

陳緩

帶便爬抓。一飲動一石。馮載號或載。嗽同聲。唱者和。查含意。漆

在膠。五言乍安貼。俞十手爭傳鈔。雖乏韶濩音。姜肯使下里。殺合并洵匪易。

朱顧我

中心恆。歸帆艤舫。

梁別騎籠鞅。韜邇陟荒岡。陸邪許。擗長笈。免泣卞和璞。

魏且誅

宋玉茅中縛。不借履。張泉酌。喁然匏。檳

榔蕉椰荔。朱都蔗菱菰。莢雞頭。祖竹萌。陳翠羽。官梅梢。熱知江鄉樂。

湯莫厭

潮田礲。招隱丘中琴。查勵志

賁上爻。豈必馬足塵。俞逐逐營斗筭。姜

送侯大年歸膠城

惠子春深跨白驢

惠元龍歸吳

季鷹秋晚憶蓴鱸

張漢瞻歸嘉定

窮歸甌粵吟詩客

高雲客還閩

老奉龍舒養母圖

方田伯返桐城

過關梁鴻仍感噫

梁鴻亭歸櫬外

多才王勃尙江湖

王孟穀自楚入漢

君今又掛南帆去寂莫黃公舊酒壚

顧培園宮贊寓齋燈下賞菊探韻限爲字

劈牋重和去秋詩。葉底花前榻未移。却對清尊驚候晚。尙留名種愛開遲。閒情特許攜燈就。晝藁猶煩蘸筆爲。莫話陶家三徑事。年年此景負東籬。

劉雨峯兼隱齋小集

四門稱博士。五載住京華。客醉新支俸。庭開手種花。塵埃何處着。書帙逐年加。不道成兼隱。官清只似家。

禹平南歸詩以志別

辛苦論交地。追歡得幾回。却忘吾久滯。翻望爾重來。才恐隨年退。眉還仗酒開。知音真有數。流俗任相猜。

燕臺歲寒雅集同王后張錢越江顧九恒彭椒岳吳萬子孫愷似王崑繩錢玉友徐子貞高遠修

孫子未王巖士陳叔毅湯西厓談未菴馮文子俞大文家荊州作二首

一天殘雪冷晴暉。高會金臺近已稀。我輩論交終落落。他鄉對酒倍依依。蒼茫敢信前期在。輕薄翻疑古道非。得路何人能折節。向來同學儘輕肥。

檐花檐雨夜沈沈。猶憶年時載酒尋。忽漫回頭成昨夢。每從失路檢初心。殘碁吳越尊前壘。短褐冰霜歲晚吟。同調尙留公等在。敢憑餘子說知音。

偶過史胄司編修齋賦贈

每從朝退得閒情。深巷稀傳剝啄聲。視草才矜編集富。簪花格愛學書成。苗來玉樹枝枝秀。賞到冰壺事事清。怪得官清能下士。五年前是一諸生。

敬業堂詩集卷七

假館集下起丙寅正月盡十月

寄題宋漫堂觀察園亭六絕句

村烟雨外青。沙草坵頭碧。欲知春淺深。風到鱗鱗活。

綠波村

菱角初翻刺。雞頭未剝圓。涼風吹酒醒。人上過溪船。

芰梁

春水綠于頭。春花紅似掌。漸次去人遙。鳧鷖雜三兩。

放鴨亭

團瓢不鬚茅。擁蓋松陰下。茶熟正吟詩。風濤入懷瀉。

和松菴

魚篷閣淺灘。閒却絲綸手。長被酒家翁。紅腮偷買柳。

釣家

白鳥點蒼葭，沿流略釣斜。愛他丞相第，簾箔似村家。即文康公舊居也。

緯蕭草堂

送顧九恆南歸

柳汁春回翠滴衣，羽毛雖好奈孤飛。行期屢改今才決，同調無多去轉稀。換眼舊遊隨夢散，掃眉新樣入宮非。杏園已是攀花客，終勝初程下第歸。

俞大文出都同人祖席分韻得郎字

客中送客春茫茫，投牀夜夢得故鄉。前五日九恒別去。旬來怕聽叩門別，君又結束匆匆裝。出都贈行例有句，況

我與子情難忘。我時正坐作詩瘦，不耐冷淡搜枯腸。典衣且復就劇飲，醉後亂發如風狂。憶君年當十五

六，談笑目已無盧王。曾蒙佳什盛許予，駘駘質下非敢當。辛亥秋，大文賦駿馬篇見贈。厚意寧能久不報，積逋耿耿今

粗償。識君最早莫如我，只恨岐路趨殊方。萍踪一散十三載，兩曜轉轂驅星霜。班荆故國再相見，孝廉船

繫禾城傍。才人生還話絕域，詞客遠別歌河梁。以上敘癸亥春與大文搗謙同集吳漢槎鷺湖寓樓事。片帆湖口浪滾滾，匹馬薊北

冰碾碾。竭來酒市並儻舍，我極潦倒君飛揚。故人聯翩貢禮部，屈指仇滄柱。顧九恆、徐子貞、陳廣陵、汪禹

昭君於其間最年少，爭看白面俞家郎。風擡袍袖綠陰合，花壓帽影紅綾香。文章自足取高第，仕宦何必

皆巖廊。旁觀愛才或太息，達士安命無摧傷。鑿輿昨者東幸魯，曠典百代傳輝煌。君今應聘往纂述，豈異

扈蹕來登堂。直從國書探鉅麗。不比家乘搜散亡。誰云小試著作手。會見奎壁垂天章。時大文應衍聖公聘纂修幸魯盛典
偶然便道一返里。山青雲白遙相望。眼前合併那易得。歸興未抵離愁長。鞭鞘已出軟塵外。裊裊絲路穿垂楊。

移居詩爲姜西溟作

自我來都城。三見君移居。前年街東住。夕陽到庭除。殘冬徙巷南。北戶風攬裾。今臨大街西。朝日明窗疏。短生寄長世。天地猶蘧廬。矧乃一楊安。藹藹良有餘。君才本絕代。應召來公車。姓名上史館。著作登石渠。太倉五升米。旣飽同驩娛。漆光拭修髯。外澤中不枯。有時典裘褐。閒架如期輸。卷軸不用籤。錯置圖與書。偶從移居候。整妮驅蟬魚。經旬復成堆。零亂巾箱廚。卽此見真率。寧能事奔趨。朱門曠蕩開。無地置爾軀。請看名山業。終古歸繩樞。

王忍亭主事招遊相國宛平公怡園二首

沙路開三徑。名園甲九州。不緣君愛士。那得客同遊。好鳥來宮樹。春冰落御溝。野人雙眼豁。初見賜書樓。見說門前路。鳴騶日日来。簇燈春宴罷。踏鼓早朝回。華萼居相望。平泉第對開。從來論相業。原不廢亭臺。
上大司成翁鐵菴先生

虞山龍蜿蜒。昂首挹海若。匯爲人文藪。壇輿代有作。我公實名家。問世出騰躍。却將波瀾勢。捲起向寥廓。

國家取士途。櫟括制仍昨。後生奉師程。體裁就拘縛。蠶叢蝟負困。斤斧孰開鑿。巨手得韓歐。呀然啓鑄鑪。文昌一星曜。餘若螢火燭。以此結主知。廻翔上館閣。十年執文枋。出入兩不忤。東郡昔掄材。雲羅恣搜索。遂令齊魯風。一變起積弱。至今劍光在。識者辨干莫。文運際中天。四方視太學。頗聞長老語。斯地久寂寞。簾篋器空懸。豆籩禮猶託。春秋割羊豕。朔望奠罍爵。四門官俸輕。六館廩餼削。惟留古時栢。枝榦尙盤礴。花輒饑啄鷹。鬪棋暮巢雀。庭荒狐狸竄。人去蝙蝠掠。壁書畫摧殘。獵碣字剝落。偏傍按點黠。星隕不可攬。自從萬乘臨。廟貌再丹雘。臯比位祭酒。此座不輕著。新城轉官去。士氣孰聯絡。公來一震聳。造就指不各。外貌謙以和。中懷嚴且恪。從公日于邁。人有執經樂。圓橋看濟濟。在泮咏躑躑。方當發資鏞。豈獨警逾鐸。三千萃絃誦。餘地故綽綽。移時具規櫛。次第布條約。經術植本根。史書覽大略。詞章及文藝。餘事樹承萼。必若計栽培。先須破根格。力圖古制復。事異虛名博。賤者春達萌。釋如秋解擗。時情重成例。清議動多格。憐才出至性。此意感非薄。賤子望塵來。三年客京洛。門墻雖濫廁。鞭策稍知懼。公于汲引塗。取予必斟酌。何期納百谷。亦復收一勺。傾僚方自茲。惟公鑒葵藿。

清明日同玉友荊州出右安門就旗亭買醉晚至朱大司空花莊復留劇飲卽事四首

新烟淡淡柳梳梳。雨洗輕塵出郭初。遠客不知京國好。酒旗風裏話田廬。
三鷄岐路小車歸。一曲花遊簇作圍。春色盡隨紅艷隊。明朝蛺蝶滿城飛。

聯鞍緩鞚去逡巡。覓句沈吟苦鬪新。忽漫詩成狂拍手。墮鞭驚起馬頭塵。
典衣偶出爲尋春。重向名園敍主賓。慙愧公卿傳好事。一時狂號屬三人。

摩訶菴看杏花次司空公原韻

壺盧酒熟烏摧提。路轉松廼別有蹊。艷入繁枝停畫鼓。淡教微雨洗花泥。開遲翻悔來看早。興好方嫌飲
量低。却被閒僧嗤好事。一雙蠟屐舊曾攜。

三月三日朱大司空招集南莊限三字

一句雨雪春淹淹。餘寒尙帶三月三。滿城花信近桃李。客舍冷落思江南。司空園亭傍水際。初已有約來
停驂。郊原霽色忽入眼。豁若明鏡初開函。草凝露光翠撲撲。柳挾風勢青氤氳。檐牙燕巢看新補。枝亞雀
殼免可探。蘭亭勝事俗久廢。京洛良會情尤耽。轆轤轉水百尺底。繞砌曲折歸澄潭。不須絲竹發豪興。自
有風雅供清談。銅壺靜傳竹箭響。蠻榼遠費桃枝擔。先生名高暫解組。公子官好能抽簪。閒從門生諸公皆先
生門下士。奉几杖。猶許野服來相參。古道力持公自厚。羣賢不鄙余懷慙。久留帝鄉亦何爲。土俗節次差能諳。
放鐘撇叩等兒戲。歲月過隙真奚堪。大杯一澆壘塊散。得飲且復捧沈酣。前期更有聽鶯約。預辦斗酒攜
雙柑。

喬石林侍讀一峰草堂看花同外舅陸先生朱十表兄錢越江周青士孫愷似湯西厓分韻

愛花成癖不待招。春來徧踏東西郊。起聞啼鳩送春去。猶跨短韉搖吟鞞。斜街草堂地清絕。瘦藤當戶挈
老蛟。土墻面面紅窰堵。沙徑曲曲青盤坳。礬頭暗皺高下石。亭子乍翦離披茅。巧從陰借桃李杏。惜少水
養菰蘆菱。棠梨素粧太淺澹。繁蕊亂拆丁香苞。新開海棠好顏色。兩樹氣壓千花梢。主人爲言初買得。舊
根帶土枯蒲包。擔頭親爲解其縛。位置特許依書巢。栽培本關造物意。人事未盡休輕嘲。澗泉口嘗手自
灌。及見紅艷青葱交。他人買園身不到。君乃傲屋情難拋。花時連日得休沐。剝啄有客門頻敲。行攜几榻
隨分設。野蔌蒸薺樽窪匏。偶然興到觸佳句。已被萬手爭傳抄。我詩不工強屬和。出語毋乃同號呶。不成
甘受金谷罰。忍負新月垂弓弰。

是夕再飲嚴嬖菴侍御鸞枝花下二首

賣花聲裏過斜街。不記招尋月幾回。只有繡衣真愛客。印泥封酒必同開。
傲居喜近慈仁寺。移得鸞枝隔歲栽。報道退朝今日早。東欄昨夜有花開。
矇矓眼纈隔窗紗。曾入東隣學士家。一醉竟須煩二主。可憐頻對客邊花。

送叔毅南歸卽次留別原韻二首

到處誰當却掃迎。去留此際計非輕。自收詩上還山集。何取人傳入洛名。三世羨君猶共爨。百年爲客總
勞生。豈應陳孺長貧賤。如許鬚眉徹骨清。

竭來挾瑟並燕中。廡下猶欣傍伯通。謂樓儘有狂言容數子。每從高會廁諸公。淋漓醉射東方覆。躑躅羣
看北野空。恰恰酒人從此散。一天無賴柳綿風。九恒。大文。未菴。四
敵廬好在龍山下。藤蔓花梢一一垂。春草池塘空入夢。德尹復瀧岡窀穸杳無期。封書病檢山妻藥。陳策
慵探季子錐。百念因君多撥觸。最愁人是望鄉時。

重過摩訶菴老僧以新茶見餉

細色網從馬上催。筠籠先爲老僧開。鬢絲禪榻前因在。直愛茶烟又一來。

慈壽寺

摩訶菴西慈壽寺。老樹盤礴爭奇雄。當門古塔少梯級。合沓直上烟霄空。廻廊二千五百步。一一畫壁堆
青紅。仙山鬼府靡不有。搜神志怪殊末工。雲旗飄飄翳白日。闕殿肅肅來陰風。不知茲寺創何代。負墻古
佛塵相蒙。居僧兩三乞食去。好事欲問嗟無從。手揩雙眼看碑碣。歲月却記明神宗。是時海內際清晏。嗣
皇冕藻年方冲。雞鳴問寢駐銅輦。瑞蓮獻賦歸新宮。萬曆初年。瑞蓮產慈寧新宮。閣臣申時行。王錫爵俱作賦。一朝家法古無匹。聖母
不在垂簾中。偶營紺宇祝萬壽。未可概議物力窮。百餘年來就頽廢。鐘鼓尙與隣菴通。君不見內官葬城
抱山麓。異時祠廟還穹窿。

夜宿養素堂東偏

曼曼一枝藤。疎疎幾行柳。籬落吐燈光。鄰家猶賣酒。

祕魔崖古栢長二尺許俗傳隋仁壽中盧師手植

連岡東北轉。鬼物托幽祕。瞰空飛一片。石縫舒右臂。老鴉銜栢子。偶向駢拇墜。飛泉難仰流。長此攀拳翠。相傳閱千載。僅可二尺計。勒龜誇佛力。此語吾所鄙。猥蒙雨露恩。竟負栽培意。兒童斤斧脫。大匠棟梁棄。寧非干霄姿。吁嗟守憔悴。

從磨石口至翠雲菴

亂山中有崎嶇路。時聽征車撼石聲。行過翠雲塵乍少。馬頭麥浪綠初成。

立夏前一夕大雷雨宿西山麓

臥聞風雨聲。惜此花間路。沙路不成泥。披披曉窗霧。猶嫌入山淺。未到雲生處。

日涉園送春

驚雷掣電夜窗明。忽轉雲頭又放晴。夢裏似曾聽雨過。曉來不礙看山行。紅衣匝地枝枝瘦。翠幄支天葉葉清。遊興有餘春向盡。暫時經眼倍關情。

早發杏子口暮至香山

西山灣環勢向東。兩角到地形垂弓。客從山南走山北。耳畔箭激颼颼風。茗遙一程晚始達。喘汗未定馬

力窮入門翻愁磴。曲折落澗已愛泉。琤琤居僧指點最高頂。十里近與前岡通。冥冥一綫縈萬丈。蜀鳥飛去啼春紅。人間何處無捷徑。失足怕落荆榛叢。吾寧迂遲就坦道。肯試奇險爭樵童。殿西一軒得空曠。雲根倒插下積空。夕陽將墜尙未墜。數峰晴意憑欄中。回頭却望來處路。已被遠樹遮溟濛。

再宿來青軒

景物蒼茫感舊秋。

甲子曾宿此軒

還將筋力試重遊。行穿下下高高路。題徧山山寺。寺樓捲幔微風香。忽到瞰床

新月雨初收。洗空塵土三年夢。

一夜鳴泉傍枕流。山下有泉名甘露。

永安寺頻婆花下

啼鳩聲中日向斜。閉門春盡似村家。黃蜂飛過短牆去。零落頻婆兩樹花。

從洪光寺下十八盤取道而歸

洪光我昨到。石徑盤曉窺。不知眼界寬。但覺足力費。茲遊及晴爽。勝境天所乞。去聲。泠泠松上風。倒洒泉淅淅。路窮寺門出。氣象非昔謂。關河劃然分。有若列涇渭。平疇基布野。萬象經錯緯。舊遊領新得。噉蔗飫餘味。重尋周歷處。畫像儼中貴。寺爲正統朝太監鄭同所建。按碑記約費七十萬。輝輝金碧光。尙壓一山氣。峰高此爲最。興盡我猶未。何當躡其巔。西覽韓趙魏。

謝陳子文安邑見懷之作

新詩讀罷一摧顏。何限心期悵望間。塞柳關榆遮不斷。數峰春雪太行山。

白芍藥和孔心一少參二首

扶頭一笑粉生光。鏡裏匆匆看改粧。金餅賺來初罷浴。瑤塔行過但聞香。含嬌似爾情難禁。太潔從人忌不妨。莫向中書誇故事。素心羞對紫薇郎。

便從姑射擬肌膚。那許餘容伴鼠姑。美酒對傾金鑿落。佳名果稱玉盤盂。鶴翎舞拂新時樣。獺髓痕消舊日圖。珍重一襟冰雪意。殘紅掃地近來無。

送湯西厓南歸兼寄嚴定隅

古寺槐交陰。微陽轉冰簾。上與君初握手。片語示肝膽。來當傾蓋新。久覺忘形漸。相過日不隔。懷抱兩無忝。狂言我難緘。嬾病子未減。彌縫補其闕。瑕類肯互掩。子才隨地湧。百斛走激澗。屈首舉子場。十年困習坎。隻身沂瀟湘。盛氣生勇敢。歸來翻一笑。函匣劍光閃。未免爲時名。束身就繩檢。酒徒遇燕市。搖落自多感。兒曹太輕薄。載鬼白日壓。榆搶斥鷃如。冠著沐猴儼。彼頑何足校。我白故無玷。稍恨素心人。晨星散疎點。金溝送別處。屢見風柳颭。子來辭我行。忽若猿出檻。足矜行卷富。何礙歸裘儉。溪堂行補苴。湖舫待剡刻。開籬受竹色。擇石置崖廣。青芟鴨脚葵。白剝鴨頭芡。隣沽貰新熟。詩韻鬪奇險。此樂吾久疎。歲月徒荏苒。雨堂倘問訊。應惜緇塵染。

閨夏飲竹垞表兄古藤書屋限藤種二字各成五律二首

曲巷居相近，廻欄到每憑。爽開尋丈地，陰合兩邊藤。幽事披襟愜，新詩計卷增。時竹垞騰醉探杯底綠，涼影落層層。喚集初成

碧草柔牽蔓，紅花細着種。客稀成雅集，屋老稱佳名。淄淄雲催暮，疎疎雨放晴。家園風景似，只是少啼鶯。

雨後龔蘅圃攜酒古藤書屋分韻得能字

結隣君最好，旁舍綠陰增。榻愛同時設，門教一僕應。異書便借看，新句急催徵。許我時相就，衝泥到亦能。

曲阜顏母朱太夫人壽讌詩修來吏部屬賦四首

玉女峰連泰岱青，人傳翁主是前星。朱門昨夢滄桑變，白首餘年患難經。榆翟恩曾邀北闕，扶搖風又徙南溟。勿論陋巷家聲在，母德還堪作典刑。

郝鍾禮法尙嫌疎，比較門風正不如。壽母有詩存魯頌，世家無例闕班書。五雲扇底分儀仗，八座花前侍起居。慙愧潘輿輕作賦，金根還有嫁時車。唐德宗朝趙國公主下嫁始用金根車

霞帔重加舊日冠，慈顏一咲一加餐。從看舞袖迎花語，猶記傳經傍杏壇。吏部文章今卓卓，翰林風骨久珊珊。謂淡菴太史同時丹穴雛皆秀，世澤方知擬似難。

水天閒話屬葭葦，異數曾聞拜舅姑。娣姪紛紛齊庶士，門墻一一魯諸儒。王姬老去樓仍鳳，顏氏歸來巷

有鳥不爲尋常誇燕喜。八千親寫壽慶圖。

飛蝗行和少司馬楊公

去冬臘雪不蓋土。今歲天行旱畿輔。門前有客來故鄉。爲言千里皆飛蝗。綠陂青野一時失。但見黃雲蔽白日。我聞此語方長歎。愁坐不知天宇寬。有聲藪藪自南至。驟聽乍疑風雨勢。舉頭杲杲燒火輪。中庭過影何紛繽。蟻蜒蚱蟻亦羣舞。倏度宮城齊振羽。宮城十丈高巍巍。誰能禁爾漫天飛。

武陵楊長蒼重來都下感舊有贈

建業相逢記一樽。飛蓬心跡感重論。舊家春燕烏衣巷。故國秋瓜覆盎門。愁倚白頭絲減髻。閒繙青史泪交痕。可堪潦倒風塵際。還見元和一品孫。

送孫少司空督濬下河

神京建西北。歲走東南漕。去聲轉粟上青天。黃河扼其要。元時用海運。年久有成效。此議今難行。將毋物力耗。宣房十年築。宵旰煩廊廟。千村收竹榿。十郡供柳埽。百萬糜金錢。一支歸故道。吾君如唐堯。勳德在覆幬。百神皆受職。河伯敢陵暴。猶復念民勞。南巡趾親到。下流得地勢。海口計疏導。紛紛異同論。破例寧意料。學士居禁林。十年不輕調。汝往作朕虞。欽哉奉明詔。歲輸發內帑。恩澤蒙再造。畚鍤興如雲。邪許相慰勞。和衷事斯集。正氣神可召。芃芃黍苗歌。可乏陰雨膏。渠成萬世利。績待基年報。

送楊筠湄通參赴任奉天

國家都燕京。遼左本根倚。東西營鎬洛。周制正如此。城闕遙相望。關隘紛可指。設官重保障。未可猛政理。阡陌屯田開。戶口豪右徙。卅年盡土著。烟火變墟里。仁人來撫循。爾輩皆赤子。

呈少宰董默菴先生二首

丹霄地望絕攀躋。尺五城南萬仞梯。日月文章韓吏部。天人經術董膠西。都無半刺通干謁。却媿凡才出品題。此日黃金臺畔路。不聞伏櫪盡長嘶。

注籍紛紛屬貫魚。積薪時論近何如。尙煩啓事從容入。及見銓曹次第疏。閣下銜仍兼學士。殿頭班欲領尙書。文章得路如公少。還恐爲儒計或疎。

吳門徐彥通來都得惠研溪近問疊紅豆冊舊韵荅之三首

勞勞別夢短長亭。兩度秋風冷畫屏。忽聽故人傳尺素。夜長添對一燈青。屢屢愁聽室人歌。拚却長程歲月過。我已髭毛秋換綠。不知君髮更如何。名園婪尾醉燒春。豪氣曾陪末座塵。此日青衫尙留滯。蹇驢腰扇怕逢人。

次馮文子南歸留別韵

高視沈寥天。俛瞰廣莫野。斂才就實地。始信得力寡。文章技尙卑。矧乃論騷雅。方期木雞養。不礙伏虎嘯。

讀書滕口說。正坐氣難下。築臺逃文債。支戶辭吟社。靜觀得妙理。擾擾何爲者。因君又多言。餘習吾未舍。當湖王復園索贈次沈繹堂先生原韻卽送其歸。

寂寞名山業。蹉跎始自憐。長途添白髮。老眼望青天。夜雨新豐市。秋風下涇田。夢中歸路近。帆卸郭東船。與顧梁汾舍人次閣學韓公韻。

不是微之定牧之。紫薇亭擅舍人辭。十年未就歸田賦。衆口猶傳赴洛詩。往事相關碁已散。秋風纔到鬢先知。怪來東閣留賓地。難遣深情是酒卮。時舍人有亡友之痛。

九日飲朱大司空南莊二首

雲物蒼涼感鳳城。良辰難遇是晴明。同時那得人借集。是日西溟輩集禽柳堂余不及赴。去日渾如客餞行。大漠寒烟凝朔氣。空林殘葉墮秋聲。籬邊舊是餐英客。省對黃花倍有情。

不是藍田別有莊。三年此地作重陽。先生出郭仍攜酒。獨客登臺又望鄉。天闊一鵬盤遠勢。風高羣雁起斜行。茱萸諸弟遙相憶。應料新來鬢點霜。

少司馬楊公見和前詩有登臺把酒之句追憶落帽臺舊遊已八年矣再次前韻奉酬二首

迢遞關山隔楚城。亂猿啼處記分明。瘴花瘴草重陽候。秋雨秋風絕徼行。匹馬幾回經戰壘。荒臺三面走江聲。再來京洛追陪地。望遠猶含萬里情。

青楓白菊夢漁莊。驚起窗卣正夕陽。賴有新詩酬好節。敢云游子戀他鄉。風聲捲地迴遼海。山色迎寒入太行。一片清砧聽不得。敝裘容易改星霜。

得談未菴沙河書却寄

涼燈四壁光。燦此一雙葢。終宵不能寐。詰旦占有喜。起接故人書。窗日穿故紙。披襟再三讀。感慨忽中起。憶昨初訂交。秋風燕市裏。余時新落第。邂逅得吾子。子名雖早成。尙索長安米。才高氣激直。罵座酒頻使。我故失意人。謂子不宜爾。子行將筮仕。鸞鳳棲棘枳。縣令古難爲。位在百僚底。上官任喜怒。下吏望風旨。剛者號木強。弱恐隨波靡。不卑亦不抗。斟酌具至理。子才百事能。所少或在此。今年子謁選。畿輔得百里。是時方旱蝗。黽勉到官始。單車行就道。奴僕躩生趾。近聞沙河城。喜績紛可紀。賦蛇餘毒去。政虎隣邑徙。保障安流移。枹柝靜奸宄。神明咏來暮。父母歌樂只。租稅如期輸。蒲鞭免撻捶。民譽慰攸歸。官聲被褒美。寧非讀書力。出手見根抵。乃知賢豪人。未可私意擬。向來吾錯料。失語徒抱耻。感子諒我真。肝膽終見委。得路念貧交。幾人堪屈指。自傷志力薄。無以赴知己。行當賦歸耕。塵俗庶一洗。願子益自愛。友道在永矢。前期不遐遺。折柬到桑梓。

次大冶司農韻送顧與田還金陵二首

及見開東閣。俄聞把別觴。沙痕雙鬢雪。寒色一裘霜。老覺游情倦。貧銜故意長。獨留青眼在。此外任炎涼。

一片隨陽雁。郵程取次過。馬頭回紫塞。冰面渡黃河。手寫還丹訣。神傷過闕歌。承平風物似。遺老剩元和。

奉送少司馬楊公予告養親四首

聖朝孝治在敦倫。詔許還鄉爲養親。平格已推黃閣老。公今年適周花甲行期先報白頭人。卷舒在我何關命。進

退無慙好乞身。此日魏舒仍襦被。卻從去國始知貧。

從開絕域震餘威。悵望多年子舍違。退自急流從古少。老猶孺慕似公稀。東門祖帳傾城出。北闕恩光拜

表歸。晝錦堂開春晝永。咲將綵服換朝衣。

萬事長安一局碁。角巾私第未嫌遲。卽論世道寧無補。欲報君恩況有期。春服暫寬腰下組。茶烟初驗鬢

邊絲。枌榆父老來迎謁。應羨精神似舊時。

油幕追隨萬里過。兩年假館又蹉跎。吟聯樺燭枝枝跋。酒上塵顏夜夜酩。含意每爲知己盡。不才眞怕受

恩多。公歸我客全無爲。誰聽荆南寡和歌。時余將移館北門

敬業堂詩集卷八

人海集

起丙寅十一月
盡戊辰正月

故人吳漢槎歿後。有以不肖姓名。達於明相國左右者。遂延置門館。令子若孫受業焉。下榻府西偏。去南城十里而遙。人事罕接。間有吟咏。率出傳題酬應。自丙寅仲冬。迄戊辰初春。凡十五月。所得詩不滿百篇。合爲一卷。卽用人海記之名以名集。

移館北門寒夜不寐起來霜月滿庭有懷諸弟

寒城宮漏永。孤館耿無寐。起看殘月升。稜稜挾霜氣。徘徊夜將半。惜此姜肱被。獨客不可爲。無端感憔悴。題喬石林侍讀梅花莊圖兼送其罷官南歸

湖陂種柳不種梅。梅花合向陽陂栽。買園舊在最高處。尙怕水泛春冰開。沙頭一篙刺歸路。清淺今堪跨半渡。父老來看侍直圖。先生喚入花間去。

趙秋谷編修見示并門集輒題其後

趙侯曠世才。礪發新刃初。十八取高第。姓名登石渠。紛紛冠蓋交。僮馬填門閭。抗懷對儕俗。折節讀古書。我友潛江髯。朱悔人。數數來告余。余時懷一刺。欲往還趨趨。從來負盛名。相見長恐虛。何期就館舍。先枉君

子輿示我并門詩。璀璨瓊瑤瑤。清光溢兩目。瀏覽無停臚。不忍遽卒讀。掩卷姑徐徐。留之遣夜長。霜月臨窗。既地爐煖宿酒。繼晷編重舒。十首醜一杯。頃刻百首餘。何堪飲戶小。徑醉同蘧蘧。隱几似有人。導我蓬萊居。李杜踞高坐。兩旁列仙儒。依稀潮州韓。髣髴眉山蘇。中有青丘子。拍肩大聲呼。醒來几案傍。蜂蠟開芙蓉。悠然接詩境。鼠穴非乘車。我欲數子間。位君復踟躇。君今富才力。著作承明廬。詞章技特卑。未足垂聲譽。卽此見根柢。振步捐土苴。神仙才有數。此語古有諸。我賤不足論。願君勉相於。

得聲山姪揚州信

隋隄柳又拂歸艖。安穩傳書報渡江。却寄新詩猶索和。轉憐遊屐不成雙。霜欺獨雁寒衝塞。月帶疎鐘夜到窗。此際相思倍悵。燈花何喜燦冬缸。

任坦公以趙松雪留犢圖索題留竹垞齋中聞爲偷兒取去戲作絕句荅之

一啣貪泉盡跼徒。壽春遺事近應無。探囊莫怪工相妬。占斷清名是畫圖。

題禹平水村圖二首

蓼洲疎雨荻洲烟。一扇低篷水拍天。不礙主人長作客。披圖還有鶴看船。春波十字水西東。草淺廻塘有路通。着個歸人應更好。倒騎烏帽柳陰中。

除夕前八日立春

驚心看舊曆。三十八回春。去日成何事。流光惜此辰。好風廻淑氣。殘雪洗窮塵。便擬騎驢出。旗亭覓酒人。

元日出東便門

以下
丁卯

朝出國東門。言循潞河涓。層冰裂厚地。雪光照曜之。草短沒燒痕。老楊交枯枝。晨曦暖我顏。我髮初有絲。自從客京洛。三遍東風吹。藏身人海中。發興乃更奇。誰能當此日。一鞭出尋詩。

少司馬楊公潞河寓齋夜話得村字

去京三十里。城郭只如村。老樹排沙磧。春帆次水門。談深孤館靜。酒罷一爐溫。已覺連宵夢。依依近故園。春夜同外舅陸先生陳夔獻呂彤文許時菴朱悔人魏禹平王令貽王赤抒吳震一張損持家荆州兄集朱大司空齋分韻二首

春燈春夕宴。一到一回歎。不赴先生約。寧知禮法寬。酒痕雙短袖。歲事五辛盤。合坐無生客。長安此會難。畫簾開雪後。新月到花西。雅令投瓊得。清歌按拍齊。鼓催今夜醉。詩記隔年題。預恐鴉啼曙。門前散馬蹄。龔蘅圃屬題攝山秋望圖

昔我道金陵。西南出江關。船頭東北望。秀色堆烟鬢。長年爲指似。此山名繖山。古寺入棲霞。松老苔斑斑。玲瓏刻千佛。石骨靈不頑。上有天開岩。鏡平圓若環。從茲陟高頂。一覽收人寰。孫吳事業荒。南渡衣冠孱。詞客弔興亡。動云清淚潛。探懷發深趣。此事天寧慳。如何雷同聲。萬口若是班。我友詩力健。清奇寫崢嶸。

好風颯然來。滿眼除榛菅。按詩記年月。我在蠻溪灣。重披一幅圖。點染紛斑斕。杖藜者數輩。謂竹垞青風士諸君。骨俱珊瑚。同時失同遊。悵望空往還。憑君添一葉。置我烟波間。

王甥漢臯南歸詩以示別二首

草草嫌輕出。依依戀此辰。也知歸橐儉。應諒客囊貧。家教分諸弟。身謀累所親。臨期雙淚落。併念爾先人。汝去真長策。吾留轉寂寥。雪燈分袂影。風柳斷腸條。客久人情覺。春寒酒力消。自今長短夢。無夜不河橋。

送吳青壇侍御歸里

來乘驄馬來。去駕柴車去。烟光綠上垂楊梢。春淺東門送行處。東門多少罷官人。太息何煩感直臣。但使朝廷無闕事。不妨歸作太平民。

北城寒食有懷南郊舊遊寄呈朱大司空並索玉友荊州和二首

早桃開後倦游情。春事無端閱鳳城。忽聽賣花聲到耳。始知明日又清明。名園狂醉已經年。永定門坊記墮鞭。想得出郊重繫馬。一行新柳變新烟。

相國明公新築別業於海淀傍旣度地矣邀余同遊詩以紀之

路指沙堤外。園開海淀東。好山西嶺接。曲水御溝通。綠野名相稱。華林興頗同。種花兼種樹。還費十年功。

陳元亮至得令兄搗謙近問

海棠雨墮胭脂紅。一尊醉別禾城東。旗亭袞袞柳綿白。握手驚從薊門北。烏蟾顧影倏忽移。已過五度春風期。看君湖海發豪氣。嘆我頭髮生微絲。爲言索遊非得已。爾乃胡爲亦來此。一門甲第矜貴盛。王謝堂前燕添壘。藏書萬卷澤尙新。負郭二頃業未徙。少游但思騎欵段。儘可浮沉老鄉里。天生爾以不羈才。伏櫪豈得長徘徊。朝秣吳芻暮燕市。聲價自長黃金臺。君家髯兄才不細。勇決翻成倦游計。粗傳近況喜可知。只怪新篇不相寄。故園漸少杜門人。往往席帽趨黃塵。因君根觸草堂夢。綠樹正接詩翁隣。

送宋牧仲提刑山東

名封十二接關城。繡斧前頭父老迎。問俗潛移齊右姓。下車先揖魯諸生。天開烏日三更白。濟入河流一道清。歷下亭邊名士會。騷壇行見續詩盟。

壽陸菊隱前輩七十二首

熙甫陶菴傳述久。百年君又起嚶城。學能忘世名偏重。老愛讐書眼倍明。在璞不妨留玉彩。出山依舊覺泉清。龍門子弟俱英絕。及見淵源有二生。謂孫愷似侯大年採芝欲去每相羊。開閣猶留老仲翔。時下榻大治相國家共許康成多著述。誰言安世有遺亡。老人祝杖鳩無恙。處士歸田菊未荒。十丈風埃遮不得。少微爭指客星芒。

送時菴先生典試四川

驛路曉發聞秋鈴。千山萬山疊翠屏。秦關百二閱天險。蜀道一雙占使星。同行者爲林戶曹地遠人才指可數。亂餘風物愁初經。同行有約吾竟負。讓爾劍閣題新銘。

櫻拂子示兩及門

竟得驅除力。羣蠅不敢貪。清幽吾最羨。束縛爾何堪。自愛依書幌。差宜挂草菴。誤人消底物。江左只清談。

送田綸霞由大鴻臚巡撫江蘇二首

東南地重推吳會。開府新煩典客卿。暫出人皆榮八座。再來公已領三旌。霜清斧鉞稜稜見。風靜驂騑尾

尾行。桃李一蹊看好在。道傍伏謁半諸生。田曾爲江南學使

詔恩連歲蠲逋賦。管內民情大可知。柵鼓尙傳迎輦曲。竹枝多上去思碑。兩賢治蹟原難繼。謂大宗伯湯公少司馬趙

公。一代人才更屬誰。此去但須持簡要。不妨小吏日抄詩。

呈玉峯少宗伯徐公四首

書局頻開邸第中。桓廚鄰架許誰同。一朝典策分明在。未有高文不屬公。宏博今無沈晦倫。御書端爲寵儒臣。講堂及聽宣和論。感激能容下座人。弟子韓門盛一時。投書却悔少年爲。官高不改憐才意。人道先生似退之。一御何當重李膺。對公方媿百無能。相逢盡屬龍門客。只是常鱗不敢登。

次張超然見懷原韻

昨夜楸庭雨洗埃。病餘酒戒擬重開。正欣涼自披襟得。忽有風吹好句來。榕浦人才君磊落。蕙江歸夢我沿洄。此情除共詩翁說。謂竹垞先生預約藤陰掃碧苔。

與時菴別五句計程當入閩中矣。七月十六夜夢其渡桔栢江。有詩見寄醒而作此。

相送西南去。離心不可降。亂山懸客路。孤夢墮疎窗。暮雨葭萌驛。秋風桔栢江。此時占益部。真有使星雙。

夜宿傳經書屋枕上喜雨

爲少芭蕉樹。初來竟不知。及聞簷滴後。已是酒醒時。靜覺書幃爽。涼侵布被宜。殘燈如客況。不厭作花遲。

送周青士南歸

人間不是少知音。愛爾蕭然抱素襟。潮似歸期還有信。雲雖出岫本無心。戰回酒敵黃花老。收取詩名白髮深。此去浮家烟水際。五湖一葉許誰尋。

丁卯秋闈報罷呈諸先輩五首

明明跛脚有青雲。安上門前路忽分。湖海伏龍雷起蟄。關山斷雁雨呼羣。裘茸欲落霜花吐。燭跋初消漏點聞。慙愧上書頻見斥。僅留舌在敢論文。

夜雨鳴雞事不同。也曾投筆學從戎。早知有命應藏拙。不是無家轉諱窮。楓葉飄殘砧杵月。槐花吹過鬢

絲風。故人底用慙高第。

謂后張仲襲令詒四匡輩

我比劉蕢策未工。

憔悴青衫感弟兄。勿將時論擬縱橫。五經何負掄材意。萬口先傳下第名。

時家荆州以五經被薦

但使低顏對僮僕。

猶容長揖見公卿。祇嫌鏡裏流光速。白髮新抽一兩莖。

兩眉愁思一含顰。情到無繆去住均。短筇聲淒霜後竹。孤桐絃冷爨餘薪。那能造物皆如意。不信憐才竟

少人。任是亡羊吾勿悔。燈前故策試重陳。

三年光景易蹉跎。又偈登高節物過。燕子生涯如客棧。菊花天氣奈霜何。狂名幸免聊隨俗。野性無拘一

放歌。已買吟瓢租蹇衛。西山遊興近來多。

九日同荊州兄遊趙恆夫給練寄園

縈成曲磴疊成岡。高着樓臺短着牆。花氣清如初過雨。樹陰濃愛未經霜。熟遊不受園丁拒。放眼從驚客路長。亦有東籬歸不得。四年京洛共重陽。

題宋石門畫松

蒼髯翠鬣搖向空。老榦蟠作青虬龍。雙睛未點飛不得。時有雲氣來相從。開時高陰散林麓。捲起生綃纔尺幅。人間何處着秋風。昨夜城南拔喬木。

秋夜紀事

城頭落星大於斗。羣犬吠怪都狂走。或云此星作狗形。犬不見星惟見狗。初如地震如雷鳴。頃刻閭寂天無聲。但見明河亘天月。西沒宮漏杳杳傳三更。明朝屬車行射鹿。旌幟照山馬量谷。不須更載獫狁驕。驅爾向前飛食肉。

送朱千仞之任舒城

龍舒傳舊俗。淳朴羨民風。官稅如期納。山田比歲豐。月依琴榻靜。花傍印牀紅。却咲眉山老。無緣作寓公。

相國明公壽謙詩四章

海嶽遙瞻壽域開。喬松直上表崔嵬。立鰲一柱承中極。戴斗三星指上台。雨露恩深和鼎地。風雲力展濟時才。穆清垂拱邊烽靜。誰挽昇平氣象廻。

千古明良不數逢。天教元老際時雍。和衷事事歸無我。雅量人人服有容。地峻不須銘客座。官清豈在却堂封。但看退食委蛇度。賸得丹心荅九重。

未應風月屬平章。綠野仍開舊日堂。玉燭年調光宅里。沙隄柳合善和坊。門無鈴鼓軒車靜。架有圖書御墨香。一桁朝衣雙進酒。森森玉樹又成行。

八千歲裏紀春秋。平格端從運會留。寶鼎有光騰玉鉉。皇圖無闕指金甌。朝家望久尊黃髮。事業公今尙黑頭。慙愧受知同國士。嵩高一頌恐難酬。

喜唐實君至

風埃易隔經年面。忽聽車音喜不勝。才氣讓君高百尺。酒腸寬我過三升。薄寒坐轉霜天月。往事談深雪屋燈。記取鳳城西北頰。竹床相對兩如僧。

得家信

遲滯經三載。平安報一門。開從廻雁磧。寄自擣衣村。身賤歸難料。家貧恨每吞。兩親猶未葬。先計了兒婚。荅衛源翼先生見寄之什

蘇門仙籍在。長嘯出風塵。頗怪高賢意。偏憐失路人。宦情歸後澹。詩境老來真。靈藥如堪斲。吾將就結隣。西溟竹垞同遊房山余不及踐約口占送之

斜陽聯騎去。影落好山中。古寺尋碑入。幽泉撥葉通。勝遊關俗念。閒趣就詩翁。隔斷桑乾水。黃沙白草風。

哭朱大司空六首

忽得彌留信。驚疑欲問天。更誰承絕學。公爲紫陽裔孫忍遽奪名賢。存歿真關運。行藏好筭年。茫茫國西路。白日

迫虞淵。

正色持朝議。從人指異同。不聞廷辨語。真有大臣風。局定閒居後。名高薄譴中。肯留毫髮恨。物論久方公。罷官賓客盛。不署下邳門。萬卷藏書第。孤雲倚杖村。履聲今寂莫。花氣舊綢繆。從此西州泪。都銷醉後魂。

衣褐初相見。雲泥不啻過。自蒙公賞識。一任俗譏訶。才退江花夢。神傷薤露歌。轉緣期許厚。脈脈負慙多。
悵斷西山路。曾陪兩度游。雲峯奇入夏。泉味冷經秋。酒許王弘送。詩同魏野留。篋中高唱在。讀罷泪交流。
天不留耆舊。人皆惜老成。風流餘畫像。官號定銘旌。年譜門生輯。文編國史評。恬侯恭謹似。重望起家聲。

禹尙基屬題水村圖小照二首

縈青繚白埭。西東門掩檀欒倒。影中千片白鷗波。萬頃釣竿只占一絲風。
朝衫猶絆未歸人。畫裏鬚眉淡有神。已辦青鞵青箬笠。問渠何路出黃塵。

聞周青士淮南訃信

苦口勸君去。筋骸看頗強。祇云當暮齒。不合久他鄉。病忽中途得。神翻永訣傷。餘生還自歎。歸計尙茫茫。
楊耑木來都出示涿州道上見懷八絕句次韻奉荅

荒程野店暗戎戎。灰洞連雲小驛通。辛苦琉璃河畔路。一天冰雪兩征鴻。
時與家德尹偕行

短衣篤速又重來。雙眼摩挲試一開。拚得故人驚黑瘦。斷腸誰似賀方回。
舊來書札屢相存。難遣離愁閱曉昏。今夕和歌燕市裏。不知何事尙銷魂。

南園一醉夢難消。新指陂池丈五高。迸落客中知己淚。刺梅花下長蓬蒿。
乙丑初夏同赴朱司空南園之約今司空已下世

蛾眉里族艷同時。錦瑟雖工俗豈知。比似孝標還曠達。上年歸燕併無詩。
指耑木乙丑禮閣報罷事

橫草才情好在無。鬪體猶記血模糊。征南賓客今淪落。怕展藍田射虎圖。

冰泮西沽喚槳師。

春初送司馬公南歸

久留生計太無奇。白駒只合逃空谷。一食場苗便繫維。

行期爲爾少遲留。南酒新香出竹筍。楊柳作鞭花壓帽。此時去住兩無愁。

時余方計南歸

喜德尹至都卽用道中見寄韻八首

花南硯北屋西東。先築都荒想像中。此意十年應共惜。一般根蒂兩飄蓬。

別是尋常會却奇。鵲鴿沙外影離離。可憐半世爲兄弟。兩度相逢在路歧。

敝裘寒色國西門。刮面西風太少恩。不是雪花如掌大。豈知姜被果奇溫。

匪莪蓼蓼感伊蒿。此際方知父母勞。三尺孤墳何日築。敢將門戶委兒曹。

添丁從小絕堪哀。抱向花前得幾回。

弟去年始得一子名驪虞

可但生兒憐絡秀。有人推髻望歸來。

少賤長貧那得辭。浪遊真愧作男兒。只除中酒聯吟夕。不似長安下第時。

八齡工賦庾肩吾。五十能詩高達夫。勿羨早成輕晚就。天心原不薄窮途。

三畝原爲種稻留。私逋官稅苦難酬。翻因細悉家中事。從此思家又起頭。

曉出西華門逢吳震一

九陌紛紛路向岐。毛驢馱客立多時。一冬風力今朝橫。吹折街南賣酒旗。

盆梅同唐實君揆愷功賦以下戊辰初春作

不借東風力。全憑火候催。夢隨馳驛到。香自渡江來。物性違移植。人情惜早開。草堂留老幹。冰雪戰春回。

探春花再索實君和

本是丁香種。先從臘尾開。一叢疑積雪。繁蕊欲欺梅。南客今初見。新詩悶強裁。君看凡草木。猶帶好春來。

水仙次韻

梳額檀心韻。青裙縞袂姿。洛波迎宓女。越網得西施。用義山詩中語脈脈含情遠。盈盈欲語遲。月中曾解珮。爭許俗人知。

壽大司馬梁玉立先生四首

南朝元老出名賢。身繫安危四十年。同日蒼生多屬目。向來黃髮少隨肩。金甌社稷銷兵裏。玉斧關河聚米前。如此皇圖資坐鎮。何煩書案更籌邊。

萬騎塵清萬里風。殿廷次第與論功。兒童往往知司馬。賈使年年問相公。排闥山光迎劍戟。傍簾燭燄吐長虹。太平別有經綸業。無用陰符置篋中。

盛事雕橋紀一時。壽槐千歲尙虬枝。贊皇世業平泉記。樞密新堂畫錦詩。無價鼎彝歸賞識。有人書畫乞題辭。官高依舊風流在。不愧人稱海鶴姿。

尺五天低韋杜城。文星長傍禁垣明。每因餘論諳前事。雅有虛懷接後生。閣上麒麟圖早識。座中鸚鵡賦難成。謂丙寅春公召飲事從今一上生申頌。感激曾蒙記姓名。

送黼皇姪出宰大浦

青溪一條水。發源自白嶽。千里赴海豐。赭龕爲鎖鑰。余家赭山口。子住齊雲脚。阮巷南北分。裴眷東西拓。雖云支派別。夫豈淵源各。先朝際盛隆。中葉顯儒學。煌煌兩開府。先中丞京兆事業恍如昨。外吏實起家。致身上臺閣。綿延君子澤。十世不爲薄。汝叔秦望州牧賢。掛冠去笻筴。吾宗老觀察。王望伯近亦返丘壑。坐惜數年來。衰宗正中落。家聲望子振。有若水救涸。子才洵超羣。氣勢矜騰躍。胸藏五千卷。試手高第博。簇簇刀發礪。團團弩張曠。謂當鸞兩翅。一舉上寥廓。何期赴南宮。六度困東郭。季子金婁罄。東方米徒索。俛首作選人。初心豈所樂。之官嶺海外。道遠塵漠漠。臨分當贈言。古人例有作。與君屬關切。聊爲舉其略。邑宰職親民。顧名思義托。如何千百輩。疾苦視隔膜。寧多才地遠。或少寬嚴酌。子今抱經濟。枳棘棲鸞鶴。百弊不足釐。餘情故綽綽。潮州本善地。貢賦雜海錯。大浦居其間。頗自異煩劇。兵餘奈凋瘵。戶口十半削。往者征南師。驚駭到蛟鱷。剪除兇暴盡。政虎尙餘虐。仁人行撫綏。所亟在民瘼。大僚恣指揮。小吏承唯諾。省事先省心。自然破捩格。人散訟庭閒。官清條教約。蒲鞭併可去。況乃痛敲扑。譬如百孔瘡。難得萬金藥。徐徐養元氣。稍稍起積弱。民風旣已佳。土物矧不惡。榕樹清陰留。佛桑紅燄著。文禽好毛羽。中有羅浮雀。漿分荔

子甘茶代檳榔嚼。珊瑚及珠璣。過眼風掃蕩。方將寶清名。未肯計裘囊。從來賢達意。定不俗吏若。屈指三年期。還朝報循卓。

送沈譽生之任靖安

江西是我曾遊處。風土從君一一誇。郭外有山皆種竹。春來無路不迷花。商船晚鬧臨溪碓。官課先輸曬網家。此去始知魚米賤。十年應悔住京華。

寄壽潛江朱石戶先生

半肩華髮倚孤筇。萬卷奇書貯短篷。日出茶烟吟甫里。雨來巾角墊林宗。魚標隔竹參差見。酒旆穿花次第逢。如許風期誰獨占。白雲高護丈人峰。

桐城錢田間先生相遇都門出詩集見示中有丁酉寓長干寺投贈先君子七律一章距今已三十二年先君下世且十一年矣感而次韻

敵廬風雨十年局。南北身隨敗葉零。先爰漸如星落落。殘宵愁對火熒熒。詩貪記憶關心讀。話到蒼涼制淚聽。莫問生涯流轉跡。賤貧何事不曾經。

附田間先生原作

古寺秋聲夜不扃。客星幾點共飄零。鐘殘隔院禪香換。雨曉長廊塔火熒。市隱定從江左覓。雅歌還在

敬業堂詩集 卷八

越中聽道人入道無他術。只講床頭一卷經。

一五六

敬業堂詩集卷九

春帆集
盡
一
年
戊
辰
辰

客京師忽四年。戊辰二月。以外舅陸翁抱恙。扶持南歸。水程濡滯。凡四閱月。舟中多暇。以詩送日。翁雖手顫不能執筆。每口授余書。見余作又未嘗不色喜也。到家後周旋湯藥。余亦無詩矣。

將出都前輩及同學多有贈行之句。短章酬別。

朝市山林跡總賒。又扶病叟出京華。一卮北酒春傷別。幾度東風客負花。草色青回夾城路。凍痕白退隔年沙。多情通潞亭邊水。穩送歸航直到家。

衛凡夫郎中索題詩冊兼志別

雞鳴九衢曉。城角轉星斗。不忍去長安。此中多好友。友亦不在多。同心十八九。釀錢餞歸人。宴會連夕有。下車揖戴笠。古道君尤厚。君家好門庭。清不借箕帚。堂前兩株藤。植自相國手。凡夫所居。即文清公舊邸。春花紫蒂簇。秋實明珠剖。我來婁泐洄。晨對或終酉。有時咲捉鼻。隨意語脫口。纏綿示君真。坦率成我醜。如此兩換年。未覺日月久。君行入郎署。約略歲紀丑。風流白雲司。下視牛馬走。讀書兼讀律。楷摹等枷杻。賦性非所便。時時夢田畝。今春始轉秩。望出曹郎右。好理舊襟懷。依前向詩酒。我行惜薄遽。唱和少于喁。此地最難忘。

臨岐幾搔首

梁藥亭以端溪紫玉硯贈行

吾家老詩翁。家二瞻兄遠寄數挺墨。行裝無好硯。一試那易得。前年送君歸。許我端溪石。匆匆過三年。此語時在臆。夜聞君到京。壺漏下初刻。入門異彩發。君故不自匿。欣然咲相謂。前諾幸免食。開囊把贈余。理膩不容拭。何來琉璃匣。養此馬肝色。餘潤吐紫烟。燈光忽被蝕。吾弟尹德兩踰嶺。嗜好癡已極。曾拋金珠裝。蓄硯比封殖。窮搜願難滿。妍醜庶能識。亦云此石精。溫潤含玉德。忽然落吾手。旁睨三太息。物歸洵有數。在獲詎須弋。奈無十五城。豈易償拱璧。君才本間世。海嶽鍾奇特。仙人五色裙。來跨鳳皇翼。飄飄凌雲賦。一一好句逼。留以供濡毫。揮洒固其職。顧蒙謬許與。降氣自摧抑。我詩苦非豪。邊幅守封泚。近來尤懶惰。故步荒學植。得錢了應酬。例取加粉飾。詆媢人挾喙。描寫腕無力。徒然辱佳惠。胡取三百億。逝將返柴荆。稍稍關畛域。門前一溪水。潑眼清湜湜。洗硯先洗塵。有如苗去賊。學書兼學字。尙覬名副實。持君贈行具。寫我長相憶。因之謝吾宗。墨點漆光黑。

茨棘

牛李仇初作。張陳望苦深。全憑翻覆手。大負始終心。苑柳傷餘蔭。飛鴉誤好音。誰非門下客。茨棘莽成林。

曉出沙窩門

草綠國東門。舊來送行處。今朝一鞭出。喜赴歸人路。麥隴春未耕。杏園寒尚互。冰槽沮洳濕。鵝鴨各引喙。遠氣如湖光。蒸蒸動原樹。長空豁遐矚。變景失回顧。不復夢春明。三年墮雲霧。

張灣舟夜寄德尹都下

漁汀鳧渚夢依稀。長是思歸未得歸。底事得歸猶悵望。可憐倦羽又分飛。

發舟後連遇逆風間或阻淺兩日纔行十里許

遠歸決所從。筮易利涉川。意亦厭馳逐。捨車遂乘船。何期初放溜。斷渡春風顛。罟師邪許聲。蟻附百丈牽。進尺旋退咫。膠淺不得前。廢闌二十四。一一淤泥填。郵籤算南程。約略踰三千。一日行五里。到家須兩年。誰能侶鳧雁。久望烟波間。

曉起回望西山

好山隔黃沙。隱隱一重霧。霧斂日紅時。螺青出高樹。

潮縣晚泊

鷗鳥灣洄泊小舸。蘆溝西望樹周遭。殘冰裂石頽兼岸。春水如油滑上篙。老柳耐寒如許瘦。懷垣經久不多高。畫眉塚冷鷹臺塌。一片斜陽雁下壕。

舟夜書所見

月黑見漁燈。孤光一點螢。微微風簇浪。散作滿河星。

打魚莊遇西塞公歸舟述舊有作

長安棋局莫深論。秉燭依然近酒樽。烟火一帆春去國。關河雙鬢雪添痕。嘗醢宦味經調鼎。羅雀交情散

署門。記取故人垂老別。病歸猶感向時恩。時余同外舅附楊少司馬歸舟。

口占送陳仲夔舍人還都

別語無多別恨新。短橈明發指天津。殷勤百里猶相送。萬疊西山一故人。

亂鴉

白項非無種。烏頭亦有名。野田留點點。古墓去程程。陣忽遮天暗。貪因得食爭。君看稻梁雁。失次敢先行。

自王家浦晚至楊村驛

土屋多依堡。民屯半屬官。樹從王浦密。河過蔡村寬。鷗外新蘆茁。犂頭細麥攢。蒲溝行未到。月黑夜漫漫。

三月朔日先君子忌辰

昨夜還家夢。依依白髮親。覺來三月朔。又感一年春。窳窳悲何地。飄流愧此身。那堪寒食近。南望獨沾巾。

桃花寺

已過桃花口。再問桃花寺。獨客扣門來。老僧方罽睡。欲知春淺深。但看花開未。

掛帆行

船頭船尾收鐵貓。三尺五尺堆銀濤。弓張帆腹機激箭。原樹却走如奔逃。西山已沒烟霧裏。初日欲吐春雲高。須臾倏達直沽岸。風勢未已猶颼颼。當前有關敢飛渡。又向津頭卸帆住。

天津關用薛文清舊韻

地勢東來一掌平。忽開官閣起崢嶸。風腥曉市知魚賤。客過嚴關喜篋輕。暮雨暗添丁字水。春陰低壓直沽城。雲帆轉海非難事。誰念東南物力傾。

三月三日寒食舟中風雨感懷都下舊游寄朱公子恆齋比部三十六韻

愁中時序兼百六。又重三。客路流光感京華。節物諳尚書。期不遠。別墅興尤耽。憶昔春城外。陪遊小築南。年年修禊事。往往盍朋簪。土甌茶開箸。泥封酒拆壘。羽觴佳客泛。蠻榼小童擔。苞愛丁香破。梢宜豆蔻含。地衣紅匝匝。石髮翠毵毵。箏擘斜行雁。絲清獨繭蠶。隨方呈妙技。卽事借深談。雜座門生列。巾車野老參。幾家同上塚。隨意去停驂。一院鞦韆女。千場蹴鞠男。花遊聯竹橋。芳信簇筠籃。候煖鶯吭滑。烟濃蝶夢酣。種桃尋紫陌。看杏入茅菴。隔日頻相約。先期或預探。柳花登客饌。帶草拂僧龕。沙徑晴熏轉。澄波曉鏡涵。錫簫吹寂寂。粥鼓報儲儲。到必移吟笈。歸仍側帽簷。撲翻愁墮鞦。豪健喚驅驪。後輩忘形接。先生好士貪。清狂真辱愛。疎略總無慙。好會原難數。傷神忽不堪。東山俎謝傅。西路避羊曇。故業留桑梓。佳城閉栢楠。

詩曾傳魏野。曲忍聽何戡。只益窮途苦。寧知世味甘。無人臨曲水。有淚滴春潭。岸濕烏銜紙。船空鼠匿甌。風鷺行斷續。橋燕語黏繡。野意將舒綠。川光未放藍。離情風挾絮。往事霧沈嵐。此恨郎君識。緘題寄北函。

舟晚

晚色一天霞。空明炫眼花。濁流供飲犢。新月領歸鴉。野曠風長急。塘迴路向斜。兩三人待渡。此去必村家。

白廟

一院槎枒樹。居僧守鵲巢。俗貧稀養社。瓦缺只編茅。暗處蟲絲接。塵邊鼠迹交。漁人來寄網。時有一船梢。

泊頭鎮見杏花

澹烟消處日初銜。酒旆微風到布帆。我自偶從花底過。不勞蝴蝶上春衫。

交河道中聞人稱河間縣政績之美輒述其語寄彰椒岳明府

客經新橋驛。泊舟交河湄。偶逢垂白叟。借問邑宰誰。蒞茲凡幾年。當官何設施。叟置不一荅。別舉已所知。爲言河間府。畿南極衝疲。兩州十五縣。首縣又難治。黃昏簿書交。白晝羽檄馳。四野雜莊戶。著土留子遺。責之辦賦稅。肉盡空腔皮。可憐牧民官。往往猶鞭笞。追呼力不任。竄身并歸旗。方將計囊橐。焉問疾苦爲。前年來好官。忠信神明慈。聞官乃彰姓。門第江南推。祖父盡公卿。家業貧難支。到官但飲水。一意存撫綏。不承上司喜。不顧同列嗤。不假左右手。不煩誥誠辭。赤子視吾民。子忍父母欺。卽如春夏交。輸課有常期。

寥寥三堂鼓。出早退每遲。文書赴期會。閒暇無停披。木匭設中央。金錢隨所齎。吏前但執算。毋許參一詞。一日投百封。數計若察眉。半月率滿匭。封識宛不移。明朝上大府。手不沾毫釐。自餘了無事。止酒或賦詩。官清民力寬。漸漸歸流離。比來俗大變。迥絕非曩時。朝廷方勤民。下問旁諏咨。大府昨薦達。某官轉高資。分明馴雉歌。載在墨吏碑。坐令惠愛政。平平覺無奇。誰能持此情。流傳向京師。言罷歎息去。春風吹髮絲。

御莊舖

小縣他時號阜昌。近城曾築讀書堂。不須更睡劉郎面。豕欄牛欄是御莊。偽齊劉豫僭號。更阜城爲阜昌。郡城北有讀書堂。城南有御莊。

德州留別田雨來編修

帝里經年別。書來少北郵。故人多請假。游子暫稽留。風雨燈前話。江湖夢裏舟。一筇雙不借。行踏半塘秋。

戲惱德平令楊建垣

草接平橋水拍津。好風裙帶跨驢人。清狂幾許冶情在。惆悵自嫌官裏身。

四女祠

在恩縣西北四十里。土人云。漢景帝四年。貝州人傅清。字景山。妻羅氏。無子。生四女。守志養親。終身不嫁。各植一槐。以明己志。四女通釋氏書。日頌法華。其後拔宅昇天。云。按史周宇文氏。始置貝州。漢時未有此名。自是傳聞之。訛考唐人王建詩注云。宋氏五女。貝州宋處士之女也。曰若華。若昭。若倫。若憲。若茵。其父老病。誓不嫁。以奉事之云。按貝州乃今恩縣及清平。地疑此卽是矣。

何處著鶯花。春深孝女家。門前古槐樹。兩兩聽慈鴉。

夾馬營

櫪馬驚嘶嘶不止。紅光夜半熊熊起。男兒墮地稱英雄。檢校還朝作天子。陳橋草草被冕旒。版籍不登十六州。却將玉斧畫大渡。肯遣金戈踰白溝。隔河便是遼家地。鄉社枌榆委邊鄙。當時已少廓清功。莫怪犀孫主和議。君不見蛇分鹿死關西京。豐沛歸來燕代平。至今芒碭連雲氣。不似蕭蕭夾馬營。

月下聞吳歌

客愁今夜較偏多。歸路三千尙隔河。五十六回圓月底。南來初聽本鄉歌。

衛河四絕句

王弇州有衛河八絕多叙行役之苦于風俗有所未備輒隨所見補之。

河流千百曲。來往候風信。東南西北間。那得灣灣順。
微雨曉來霽。孤雲斷不還。黃沙千里道。何處著青山。
佳人跨驢去。隔岸是娘家。渡口風長好。吹開罩面紗。
茅屋罨邊市。蘆場柳外橋。誰知燕趙地。生計儘漁樵。

將至臨清州

小雨吹午晴。菜花黃被阪。方愁白日暮。又惜芳春晚。河流合汝衛。客路投東兗。樹杪見浮圖。去城應不遠。

夜泊南板閘

來從漱玉響滌滌。一枕神清靜聽中。只似秀林亭下宿。隔窗今夜雨兼風。北河紀。漱玉泉在州城內。秀林亭在州城外。

聞荊州兄聲山姪南宮捷音却寄一首

各有高堂奈老何。此情眞足慰蹉跎。到家鵲喜連朝有。照客燈花昨夜多。從此朋遊推二阮。向來場屋說三羅。壯心自倚消難盡。歸去羞爲伏櫪歌。

汶河阻牖少司馬楊公從陸路先歸余與外舅尙滯舟次詩以志別

昨歲春風記出京。再來何意得同行。熟經世路歸貧早。老念貧交別忍輕。水落汶河停去舫。花穠淮岸待行旌。竹萌怒長櫻珠綻。鄉味先輸一月程。

謝孔心一大參餉酒

城南高會已多時。曾和東風芍藥詩。賞到鶯花春爛熳。醉題襟袖夜淋漓。尙書沒後園空鎖。謂朱大司空。騎省歸來髮有絲。多謝故人猶念舊。一樽重對却成悲。

入牖

萬派東南傾。水勢本趨下。何年迴地脈。一股西北瀉。自從燕建都。饋饈吳楚藉。千艘萬艘尾。重載接春夏。黃河故道移。東向海門射。如轂水犀弩。潮汐俱退舍。支流導不得。脈絡乃近借。沂泗濟汶沔。橫洿孰分汜。

九十七名泉。會通河在濟寧州城南。南抵徐州。達清河。入淮北。經臨清州。合衛河入海。沂泗洩汶入漕之泉。九十有七。扼吭走一罇。綿綿數百里。寸寸阻成壩。層層板堵束。宛宛巨綆架。通透蟻穴穿。點滴糟床醲。一插守一官。役夫供咄咄。么騰成鬼怪。有若腐鼠嚇。毫釐日主進。傲慢禮無迓。糧船排幫來。客棹何從駕。汴堤鄭國渠。事往役隨罷。豈惟滋禾黍。兼可活桑柘。不聞溝洫成。止用通艍舫。奈何并梗塞。行旅見來乍。我生昧時向。永與捷徑謝。所遇總紆途。濡遲復奚訝。

閘口觀罾魚者

插河一綫才如溝。戢戢魚聚針千頭。其中巨者長二寸。領隊已足稱豪酋。爾生亦覺太局促。漂漚散沫沈還浮。不知世有海江闊。長養何異蒙拘囚。縱教族類繁。倏魴變化詎得同。蛟虬居民活計乃在此。勞不撒網逸不鈎。竹竿綳罾密作眼。駕以一葉無篷舟。朝來暮去尋丈內。細細粘取銀花稠。庖廚却緣瑣碎棄。曝向風日乾初收。微鯉苟適飼狸用。性命肯爲纖毫留。吾聞王政雖無澤。梁禁鯤鱉尚有洿池游。人窮微物必盡取。此事隱繫蒼生憂。一錢亦徵入市稅。末世往往多窮搜。

京城西南豐臺芍藥最盛。余未嘗一寓目也。今年與唐實君有約同賞。復匆匆出都。長途春杪。省記前言。時實君已捷南宮矣。作詩以寄。兼示梁藥亭、鄭禹梅、王后張、張寄亭、呂山劉、徐虞門、孫愷似、王令貽、陸冠周、湯西崖、吳元朗、陳仲夔、錢朗行。皆同年進士也。

四年騎馬客京華。不問豐臺賣酒家。已約同遊向春尾。獨憐回首又天涯。驩場易醒繁華夢。貧女羞簪富

貴花。但是成名寧論晚。少年能得幾人誇。

阻牓十日始得渡臨清關

明知前路方多牓。且喜今朝已渡關。薺菜花開春事了。荒城十日髮催斑。

晚抵梁家鄉牓

十里五里程。三板兩板水。遠寺有鐘聲。隴隴烟樹裏。隨風渡渚去。已斷還復起。獨客此時聽。孤燈壓篷底。

東昌道中

黃沙碧草兩無情。鷓鴣愁聞第一聲。辜負遺山詩句好。杏花開後過聊城。杏花尊酒記聊城元裕之詩語

聊城舟中再得荊州兄臚唱之信喜疊前韻

才藻稱量去幾何。有誰高占五經科。一名縱使輸人後。頭地終看讓爾多。逸足逢時爭築館。高鴻回首喚張羅。青山憔悴無如僕。破涕獨能擊楫歌。

登光嶽樓

聊攝城端萬木風。層樓高勢拓齊東。晴光過雨浮浮白。初日迎帆靄靄紅。汶水曲流荒甸北。泰山遙指亂雲中。綠蕪滿眼春垂盡。獨倚危欄看斷虹。

曉晴卽目二首

水潤沙田編棗犂。麩麩兩岸麥頭齊。柳綿已被風吹盡。不化浮萍但作泥。
灘平風軟出前津。畫舫南幫自作隣。一練波光如拭鏡。翠烟扶起柁樓人。

晚泊周店雷雨大作

已作迴風半日涼。忽聞雷雨洒淋浪。洪流赴牖增雷勢。一綫穿雲走電光。斑籀定抽苔徑筍。綠針初剪水田秧。喚醒孤客田園夢。剩有蛙聲似故鄉。

入兗州境望徂徠山

青山雅淡如故人。何可經時不相見。我行久與故人別。轉向青山增眷戀。來從燕趙歷齊邦。千里平沙黃一片。眼前俗物厭勃塞。物外心期失葱蘢。朝來雙眼豁然開。已報汶流通魯甸。日高螺髻蟲諸峰。天遠修眉浮半面。含姿獻態各自媚。一老峩峩聳冠弁。茲山洵屬魯之望。指點兒童悉能辨。猶傳有道石先生。六一垂銘抵佳傳。聖人已遠道僅存。此事終應賴狂狷。景行併作高山仰。恍惚風流覲前彥。白楊風急不少留。片帆忽過東阿縣。

南旺分水龍王廟

兩龍爭掉尾。萬馬各隨羣。勢自中流劈。聲猶隔岸聞。江河雖日下。南北竟平分。先寄歸心去。吾家傍海濱。

孫村

村繞河流一曲，路分湖面三叉。青蜓雨催麥秀，黃雀風開棗花。蘆邊橋影人影，林外漁家酒家。漸近南中土俗，居人多食蝦蟇。

過濟寧不及遊南池

人唉平生頗好奇，勝遊到處每差池。龜在武昌，不登黃鶴樓，過長沙不遊岳麓書院，故云。不才自信能藏拙，況有光芒李杜詩。

魚臺道中

一碧開平遠，居人就土泉。斷山連石麓，涸水益湖田。風俗佃漁地，菰蔣雁鷺天。自慙生理拙，飄泊過年年。

沛縣泗亭驛二首

萬乘還鄉父老迎，大風歌罷氣崢嶸。不知何事翻垂淚，方覺英雄別有情。
一劍親提帝業成，枌榆猶動布衣情。沐猴豈是真龍匹，富貴徒誇畫錦行。

出廂

烟波六十宿，淹泊情不洽。前途得通津，客況喜出廂。平流一川穩，叢葦兩岸夾。好風綠陰來，黃鳥啼恰恰。南船各相傍，北客焉得狎。蠻歌楚僮和，香稻吳娘舂。明知漸近家，畏路接眉睫。近聞黃河流，怒氣中尙挾。治河如築舍，國計司農乏。盡輸竹楫沈，更費柳帶壓。坐視淮泗民，爲魚鰲鵝鴨。餘生猶應役，婦女助舂鋤。廟堂宵旰憂，疏淪豈無法。九年始殛鯀，厥罪浮令甲。書生托空談，快意取一霎。作詩據憤懣，強韻苦難押。

宿遷

纔過桃花漲。沙痕嚼岸新。孤城依井底。三面轉河身。鼃黽居相雜。蛟龍性不馴。長聞淮泗滿。嗟爾一方民。

雨中渡黃河六韻

直放東南去。無風自作聲。中流帆影沒。遠樹浪頭生。雲與平蕪際。灣隨曲勢成。竟同浮世濁。待得幾時清。官柳行行密。閒鷗對對輕。空濛三十里。轉眼失孤城。

桃源縣

廢綠春荒瘠。土耕河壩小。縣併無城。武林雞犬應相咲。如此蒼涼浪得名。

清江浦

淮山浮遠翠。淮水漾深淥。倒影入樓臺。滿欄花撲撲。誰知闌闌外。依舊有蘆屋。時見淡粧人。青裙曳長幅。

漂母祠

慙愧恩叨一飯深。當時果否識淮陰。後來不却千金賜。難說初無望報心。

淮上曉發

欸如五鼓催船發。輪仄高城下弦月。已聞兩岸過鈴聲。燭燭曉星光未沒。依稀枕上續歸夢。尙隔江湖浩難越。起來照影向清淮。愁見塵顏映華髮。往還跨下橋邊路。萬事回頭總飄忽。只有年光不負人。鯨魚絮

煖蓴絲滑。

遊喬石林侍讀縱棹園出圖索題

海棠花紅紫藤紫。日日酣歌向燕市。別中兩度負春風。短棹來尋白蘋汜。奕棋時局經眼見。去國名高今有幾。先生一賦歸來辭。多少陰功被桑梓。朝廷已用當時議。海內方思正人起。那知一意方掉頭。風月無邊任驅使。別開小壑植籬椶。汀滢三鷓板橋水。水窮橋斷去無路。賴有輕船纜沙尾。迤邐初疑村落傍。灣環忽轉高城趾。蔣芽荻筍芰荷葉。淨綠澄鮮雨新洗。釣絲影裏亭榭開。萬瓦鱗鱗動波底。琴床旋傍曲檻設。門徑從教比隣徙。梅邊補種竹數竿。柳畔移栽花萬蕊。莫言此樂乃易得。拋却金龜纔換此。假公尙直蛾眉班。夜枕終當夢田里。斜街草堂縱峻絕。未免浮塵洒窗几。空看圖畫憶故鄉。何以收身圖畫裏。只今杖履歷真境。愛護猶珍一幀紙。經過不拒野人遊。敢惜留詩嘲鄙俚。水南地空多莎草。鷓鷯成羣占涯浹。許我閒撐放鴨船。與公唱和從茲始。余亦以放鴨圖索公題句

秦郵道中

高田半沒低田淤。小舟賣藕兼賣魚。可憐活計墮水底。盡是失業耕田夫。湖波怒嚙孤城口。一派萑苻萃淵藪。但望南風長黍苗。不須東岸栽楊柳。

紅橋卽事

對門楊柳慣藏鴉。斑竹籬前姊妹花。十里珠簾消不得。扇紈風起客思家。

敬業堂詩集卷十

獨吟集起已巳正
月盡九月

去夏到家外舅陸先生風轡漸減猶冀稍延歲月也乃今二月竟爾不起余既視含殮復徇故人之招匆匆北上關山獨往觸緒悲來不禁涕泪之橫集也

外舅陸射山先生挽歌二章

公亡先友盡孤露感吾生別有無窮泪非關兒女情破家緣結客玩世亦逃名不比陶元亮徒高處士聲吳天春夜月偏犯少微星昨去扶衰病今來失典刑履綦雖寂寞畫像儼精靈世乏中郎筆誰爲有道銘

重過聽鶯齋留別徐淮江二首

一度相過一愴神尙書宅畔老松筠年時地主無多在狼籍江關況酒人傷程禹聲家船荒也雁行啼過雨瀟瀟往事深燈又此宵記得小船秋港別韋花遮斷賀家橋

虎丘

又作山塘一日留相逢往往說宸遊朱欄路轉千人石黃瓦春開萬歲樓花柳時清無隙地管絃興盡有迴舟繁華何與閒僧事添炷香燈照白頭

吳門與惠研谿話舊

燕市歌狂散酒星。勞勞三百五長亭。桃花影裏抽帆路。流落江東剩兩萍。

京口遇朱悔人

丁卯橋荒感再經。勞人雙鬢各星星。一帆北固烟初暝。二月南徐草未青。京洛夢回同斷梗。江湖天闊但浮萍。春愁滿眼分襟路。怕上旗邊舊酒亭。

三月二日揚州作

鈔關門外綵層層。三月烟花見未曾。張得水嬉還望幸。船船絃索上紅燈。時傳大駕已幸淮陽。

上已過平山堂下

發軔維陽城。茗茗入塵陌。不逢湔裙女。但見騎驢客。平山平似岸。夾路植松柏。堂空感良遊。事往念前哲。當時手種柳。搖落那禁折。暨此駐征鞍。一宿風向夕。

晚宿大儀鎮

萬乘方南巡。孔道車湊輻。我行取紆折。路僻馬不熟。臨歧徘徊鳴。旅況愴孤獨。廣陵繁麗地。咫尺異風俗。沙田廢牛耕。灌莽抽新綠。人稀鳥巢小。鴉鵲爭一木。村童弛樵擔。古佛棲草屋。杳杳望炊煙。荒荒晚投宿。天長縣北郭。外垂柳夾隄。清渠一道土人云。卽汴河也。

萬葉千梢映碧波。一條虹影曳坡陀。天長縣北聞人說。此是隋家古汴河。

自盱眙北界沿洪澤湖西北行晚至高家堰

淮泗方合流。洪湖際溟漠。水所從來高。其勢建瓴若。長堤亘首尾。力敵萬鎖鑰。近傳泗州城。三板沒郭。澄波見井竈。了了魚蝦躍。淮陽地尤卑。東岸狂瀾劇。十年費國計。萬杵鳴橐橐。排椿內甃石。陡起堵牆削。禹功紀告成。注海有疏淪。不聞當橫流。扼吭恣噴薄。決口既須塞。減水孰開鑿。自唐堦以上。決口三十四。回河之讖。蘇頌濱云。回河雖罷。減水猶存。是也。九道湮成河。洪澤以下。向有成河九道。沙田梗流惡。放之使行地。汗漫無歸着。天下本一家。揚州忍爲壑。移亡及身事。丘墓傷淹泊。可憐水鄉民。不及鼉鼉樂。九重亟軫念。南幸求民莫。河嶽盡懷柔。淮神敢行虐。天功卽帝力。愚賤矧可度。我來愛漣漪。正值沙水涸。一程滌煩懣。清曠迥踰昨。夕陽射湖東。欲落尙未落。忽然得新句。放眼向寥廓。

黃河待渡

遠行疲長途。春晝赴急景。柅車柳陰下。稍覺白日永。黃埃渡河來。風氣變淒冷。奔湍怒流濁。拍岸高過頂。千檣萬檣形。倒視無一影。沙崩人跡散。月上波響靜。衆涉叩敢爭。及茲放孤艇。

澗橋

風色轉河壩。春光滿淮甸。阪被菜花黃。籬窺野桃萼。朝陽出疎樹。蘆屋烟中見。饌無登盤魚。戶有啣泥燕。

從人問前路。已近清河縣。

大霧新灘道中

陰霾忽交集。一氣吞平沙。如入大海中。瀾漫四無涯。前行泛孤鷺。後旅延修蛇。似密忽已疎。稍開旋復遮。大塊任勃塞。陽烏斂光華。朦朧一鏡懸。注視眼不花。方當掩靄際。正氣難勝邪。無何廣漠風。披豁青天霞。君子視洞達。毋令道里差。

次日發洙陽渡小溝河大霧復作次前韻

昨日如細雨。今晨同歎沙。廣川橫我前。截岸作兩涯。君如壯士劍。當道分長蛇。亂流苦無船。林黑影被遮。僕夫牽馬渡。閭闔迷春華。路旁玉瓏鬆。結作野草花。老農識占候。何笠歌汙邪。連霧知大風。暮雨看晴霞。人事難預測。物理永不差。

紅花埠至曹村四十里間桃李夾路

遙林春鳥啼。客枕促晨起。有村有園圃。無處無桃李。烟氣薄花光。迷濛四十里。方當鞍馬倦。忽值風日美。欲去轉躊躇。北行恐無此。

六風

新月夜生暈。朝來果作風。初聞響騷騷。停午聲蓬蓬。砂礫本附地。簸蕩忽向空。遙天失其青。皎日爲之紅。

憶昨衝霧雨。兀如醉夢中。行當快掃除。何復遮溟濛。勃蹊向六鑿。無地置我躬。有目欲使眯。有耳欲使聾。口鼻比山澤。呼吸恐不通。五官心則靈。獨覺非外蒙。涉川畏波浪。遵陸愁霾蒙。男兒歎失意。豈必皆途窮。平生塵土緣。鹵莽焉知終。去去洗垢濁。還君憔悴容。

寒食行

老鴉銜紙錢。飛上白楊樹。破廬誰氏子。挈榼上冢去。新鬼土作堆。堆平鬼亦故。百年過鼎鼎。孰者非朝露。安知今樓臺。不是昔墟墓。十年寒食節。九度他鄉路。看到野棠梨。荒山春又暮。

清明日蒙陰道上觀鞦韆戲作

隔牆聞笑聲。人在花枝下。花枝旋搖動。傍有秋千架。何人挾飛仙。天半飄裙衩。瀏灑俄頓挫。按抑還騰躡。力怯不自持。身輕若無藉。柳絲妬腰細。捲起向空掛。却下整雲鬢。神情自閒暇。魯邦喜遊冶。民俗廢桑柘。已經上巳辰。纔過百六夜。新粧與靚服。往往出茆舍。鄉風隨俗有。客路關心乍。未免憶江南。家家好亭榭。

新泰旅壁見故人周青士題詩愴然繼和

歎息溪南老。生涯詎忍論。有詩題壞壁。無計臥窮村。去作京華客。歸招旅櫬魂。乾坤吾哭汝。塵土上啼痕。過西嶺數里許。土岡微起道傍新。立木榜署古新甫山。五年前經此未嘗有也。

南眺東蒙峰。北瞻泰岱巔。相望三百里。徂徠處其間。新甫特土壤。居然亦名山。石老栢不生。荒榛互綿延。

文人好夸大。後世事或然。曼碩告寢成。煌煌郊廟篇。移風繼周頌。孔子經手刪。不應闕宮什。失實載簡編。魯邦岩岫多。高峙爭孱顏。今聞非昔指。彼此揣度懸。年往事易訛。況加附會牽。我欲正此謬。詩成恐難傳。
王伯厚困學紀聞云。魯頌徂徠之松。後漢注兗州博城縣有徂來山。新甫之栢。傳注不實所在。惟後魏地形志。魯郡汶陽縣有新甫山。通典漢汶陽故城在兗州泗水縣東南。

望岱

山形陡然來。其勢乃易量。孤根雖秀拔。羣岫或爭抗。泰岱四岳宗。宇宙虞隘妨。去聲大麓起沂州。鱗鱗疊巒嶂。客程窮五日。日日坡陀上。不知去平地。已是幾千丈。漸覺所歷高。縱眼快前嚮。昨經新泰郊。突兀方示象。將開意忽會。在遠神彌王。霞氣舉之升。隔天樹屏障。龜蒙挾冕繹。連絡走相傍。徂徠亦兒孫。未可儕輩行。其他況培塿。倚伏同一狀。今朝及山趾。耳目嗒焉喪。便思躡芒屨。去倚扶桑杖。天門沆寥開。萬里誅蕩蕩。仰瞻星漢逼。下掃雲海漲。雞鳴日觀峰。倒影出塵盪。惜哉身未到。祇用窮想像。秦松漢代栢。盤攖倘無恙。碑憶磨崖鏤。亭思駐蹕創。賢君七十二。踵事規樞壯。如何太史文。隱躍時近謗。誰陳封禪頌。體格要有當。游蹤觸覩記。卽事語敢放。覽眺存古懷。終期慰遐暢。

瘦俗戲和次谷兄

晨辭泰安州。午達長清境。石欹行礙步。土燥俗少井。木瓢酌山窪。歲久必生瘰。醜形婦女甚。戶戶裁闊領。
東坡詩。闊領先裁覆瘦衣。牛病垂老胡。豕肥縮短頸。苦開脹河豚。餘怒鼓蛙黽。兒郎打銀釵。亂髮時一整。野花插偏髻。

陋質寧自省。

開山廟

磽确苦厭山。出山愛蒼翠。迴看青蓮花。一一吐烟際。綿連魯齊界。豁達燕趙氣。黃塵有時開。白日曬平地。輪蹄倚空闕。所向莽無避。蹭蹬身已經。吾行方按轡。

曉過平原

宿醉兼殘夢。朦朧過幾村。明星天一角。紅日縣東門。四面柳陰合。千家烟氣昏。朝來好風色。躍馬過平原。重宿德州有懷研谿西厓。

德州城邊三月杪。桃李家家傍清沼。繫舩人見跨鞍人。一色春衫青鬪草。令君載酒遠見餉。去年春杪泊舟德平楊令

君攜酒相過

侍史求詩近相惱。風流學士田先生。

雨來編修

騎馬來尋苦不早。城端角聲門欲閉。話別匆匆語難了。

杯闌却記惠與湯。此地曾誇紅袖好。詞題裙帶付張態。曲記油車嫁蘇小。每攜行卷跨向人。不信裝囊易傾倒。爾來好事復誰繼。只有征埃催我老。春風兩鬢添幾絲。又是去歲看花時。

河間道中

沙路條條似。前行曉易迷。牛鳴新店火。月上阜城雞。古堠烽煙靜。遙天樹木低。數錢工姪女。詩囊夫空攜。

與彭椒昂

詩宰河間縣

別裏三年夢。初疑作吏難。衝繁畿輔地。辛苦牧民官。元結詩仍好。安仁髮未殘。合併無限喜。爲爾一加餐。

椒嶺座上喜晤王赤城兼讀集中見寄詩知與余神交有年矣短章奉酬

故人知我來。堠騎迎郊甸。相逢車笠間。尙作文酒讌。後堂出嘉賓。齒序列筵簞。爲言老兄弟。結契自少賤。我初熟君名。想像得君面。邂逅此會奇。心期慰依戀。酒酣出新句。唱和近成卷。語妙非俗觀。篇終有餘善。長歌謬見及。卒讀訝深眷。僕本田間人。無端去鄉縣。奔馳十年事。迅若釋絃箭。挾瑟與彈箏。隨時技羞變。重來有何趣。翼塌孤飛燕。猥蒙許與加。力薄已難踐。從君生感激。別淚爲一泫。

趙北口

燕南趙北際。地是古易州。兩淀亘一隄。隄南爲白洋淀。北爲黑洋淀。隄長若橋浮。前年驅車過。灣淖沒我軻。雨腳颯颯垂。心懷失足憂。至今旅枕夢。澁縮不敢投。茲來喜春霽。日色和且柔。晨餐且鮮鯽。門有曬網舟。飛沙隔岸來。風削墮浪頭。俯見夾岸柳。枝枝倒清流。人生各有營。偶過難久留。愧此千頃綠。一雙雪毛鷗。

自雄縣至白溝河感遼宋舊事慨然作

已割燕雲十六州。雄關形勢咲空留。兩河地與中原陷。三鎮兵誰一戰收。細草鳴駝非故壘。夕陽飲馬又中流。長江南北天難限。一綫何煩指白溝。

過涿州懷楊崑木

廟社樓桑跡僅留。城南緩轡記同遊。春風又送孤吟客。一背斜陽過涿州。

三月晦日飲朱十表兄槐樹斜街新寓同梁藥亭吳震一作三首

槐街舊與一峯隣。

一峯喬石林侍讀舊寓堂名

酒甕重開爲洗塵。最喜今年春帶閏。遲來猶作看花人。

兩株桃樹手親移。紅影紛紛落酒卮。特與幽庭添曲折。秣稭機綫縛笆籬。

古藤陰下三間屋。爛醉狂吟又一時。惆悵故人重會飲。小箋傳看洛中詩。

是日得家德尹洛中所寄絕句

豐臺看芍藥同家次谷兄陳元之甥四首

不用穿花坐竹兜。蹇驢馱客穩如舟。垂楊十里綠陰合。中有一雙黃栗留。

意外穠粧鬪眼新。無端一咲爲迷津。妬他誤馬隨車處。出色花枝不避人。

紅豔羣綺陌。遊春風繭栗憶揚州。十年一夢依稀似。老眼貪看分外羞。

孟公愛客不尋常。知我錢空買醉囊。特遣白衣迎半路。一壺重發少年狂。

時陳實齋遠致酒肴有餽

次韻送梁藥亭庶常請假歸南海

但使官情澹。何妨老耐貧。忍拋同醉伴。還對獨吟人。草色留書帶。槐陰借比隣。荔枝紅過嶺。一騎是歸塵。

夜聞孫愷似家絃索聲戲東索和

歌頭酒尾悒悒夜。懊惱燈光却被遮。畧似香風吹夢醒。一番芳事屬隣家。

合肥大司馬李公席上聽楊老彈琴

臥遊堂北夜悵悵。及記年時刻燭吟。別後人誰憐廢瑟。爨餘公自賞孤琴。衆山圖書聲相應。一技工夫老更深。慙愧重來聽雅奏。也應情感爲知音。

朱恒齋招余下榻齋中書此示意

君家春草堂。舊是讐書地。手澤尙如新。忍添遊子淚。

移寓次譚護城給諫韻二首

貪得槐街近作隣。舊寓去竹垞最近再遷吾意亦逡巡。無端併誤將雛燕。一月蘧廬認主人。

雁齒檐齊落井湄。清泉飛出起淪漪。轆轤本爲澆花設。一折流成洗硯池。病夫嫻惰朝貪睡。最怕車輪撼竹床。此地市聲來較遠。輕雷隱隱過隣牆。

移寓後喜魏禹平早過

莞枯庭幽愛客來。籬邊一徑恰新開。曾經昨日爭棋處。拾得花陰墮子回。

題蔡方麓修撰早朝圖二首

水精簾捲月如鈎。侍史粧成盡下樓。比似早朝還較早。不教君起看梳頭。花冠催曉漏聲微。樺燭光中翠袖圍。未拂御爐香已透。玉纖親捧上朝衣。

暑中坐敬如西齋竟日

蕉心展卷放高葉。藤蔓著花垂嫩梢。笛簾一床書萬卷。紙窗南北綠陰交。

西厓久患耳病詩以訊之

藥鑑烟氣散清晨。薄病風流又過春。街鼓不傳眠較穩。砌花貪看眼長新。對床尙憶聞雞伴。一震翻憐失箸人。好與繙書報方法。滿壺社酒乞比隣。

喜雨對榻有懷西厓聯句二十六韻

觸熱來京師。驕陽值乾嘆。平僑居隔隘巷。欲出愁喘汗。重濡髮頭濯冰。燎毛背灸炭。平爍爍火帝輪。赫赫炎官繖。重烏焚顛木巢。蠅嘍削瓜案。平居人苦燂灼。行者防糜爛。重側聆清禁中。一月做宵旰。平魯史陳舞雩。周詩誦雲漢。重不傳避暑銘。每廬當食嘆。平吏無酷可烹。禮有典乃按。重桐魚瘞壇圻。金雞釋狴犴。平天心倏已移。雲氣滂不散。重電雷震虩虩。溝水鳴灌灌。平急來扣扉聲。拉雜屋壁捍。重捲書君劇喜。踏屐我奚憚。平榴蕊紅洗粧。梧蔭翠流翰。重潤拈沾幔濕。密愛拓窗看。平投饑魚登杵。戶小杯舉觥。重鬱襟快哉披。短幘頽然岸。平雖當醉眼纈。未許鼻息鼾。重憶昔斜街西。吾友客僧館。平聯吟秋歷九。聽雨夜過半。重往事忽到心。暗嗟流景換。平虛名三子曾。失意二人但。重預憂燭見跋。冀聽響達旦。平凌晨過東隣。老樹恣所玩。重

古銅筆洗聯句狀如荷葉中有銀魚長半寸許三足皆作螺形

土花蝕已徧禹雅製近宣和夏片葉翠遮硯禹一珠圓滴荷夏露鱗沈白小禹烟殼帶青螺夏欲遣詩塵

滌禹濡毫墨幾多夏

集槐樹斜街苦熱聯句此首已刻曝書亭集今附見

苦熱今年甚幽州亦蘊蒸朱茂久無甘雨降惟見火雲升姜宸際夜焦烟合經天杲日恒徐高林枯白帶

淺汙露丹稜王最怕衝灰洞何須堰戾陵黃虞河流金口膩山翠畫眉層朱彝黑蜃潛難見商羊舞莫憑

萬斯同新畬荒黍稷遺種慮盍騰張零隊分行綴祠官典故徵譚力難驅早魃咒乃試番僧慎童女雙个髻

旂竿五色繒李澄新粧朱箔捲雜戲綠衣能魏虹霓羣情望塵埃萬目瞪龔疾雷無影響長轂但輪輶

釋淨憲銷夏愁無策聯吟喜得朋湯右盡諳微徑入不待小僮膺朱席帽人人脫亭欄處處恁鄭劇談多

野趣苛禮必深懲錢光旅跡頻年共鄉心觸緒增茂小航思劃漿精舍憶擔簦宸白剝烏頭茨青牽紫角

菱原夕風嘶麥蛭橫港沒魚鷹竹樹濃於畫籬密似罽尊千家花滿屋六月稻交塍右自失江村樂翻

憐毒暑仍斯同黃沙隨扇集白汗比漿凝遠易漬牀牀篔空支院院棚擔稀珠市果價倍玉河冰慎槁落含

香蕊擘拳裊格藤善暗窺蛛網縮乾拆燕泥崩翔戶撒垂簾額瓶添汲井繩嚴慵尋溫水浴只想冷礪登

瑄三葛衣猶重雙絲履不勝撥書嫌走蠹懸拂倦驅蠅坤祇覺挈拖便誰甘棹穢稱衰到門防客刺無地

曲肱膝尊。販買泉澆圃。同貪草藉芳茂。酒拚河朔飲。茶愛武夷秤宸英。返照斜初斂。微涼暮可乘。原分曹爭射覆。四座百觚騰。慎行。

醞舫消夏分賦涼蓬

平鋪一面蓆。高出四邊牆。雨似停舫聽。風宜露頂涼。片陰停卓午。返景入斜陽。轉憶臨溪宅。松毛透屋香。
次韻奉送大司空翁公請假歸虞山二首

特賜冬卿上冢還。履聲整許撤朝班。官情自領升沈外。物望同歸進退間。圖畫重開供帳路。雲山新署草堂顏。依稀文靖城南墅。只隔蒼烟水一灣。

布衣重上退賓堂。多愧南豐一瓣香。場屋感公憐被放。橋門回首憶分行。如蓬旅跡仍難定。似海恩門豈易量。不覺臨岐成雪涕。車輪那得比迴腸。公爲國子祭酒。余受知最深。

初秋同胡修予王令貽王文子林碧山程天石家荊州小飲雙林寺荷亭上次韻

共喜聯鞍去。精藍古堠邊。斷橋花底鷺。高岸柳陰蟬。野意迎涼爽。秋容得雨鮮。昔遊吾自記。塵土夢三年。丁卯春與時菴先生小憩於此。

題許壺山小影

共識丹徒一布衣。曾將健筆動宸扉。如今却伴梳翎鶴。縱有烟霄已倦飛。

牽牛花十二韻同竹垞兄賦

添得新秋意。幽芳豔一庭。開長先七夕。名許拆雙星。宿露涼初洗。朝陽夢乍醒。籬頭從點綴。竹尾借娉婷。徑淺疑妨帽。窗疎愛拂檣。蛛蜘蛛角網。蟋蟀草邊亭。垂處梢梢碧。分來朶朶青。有人簪綠髮。無分插花餅。輕較春天蝶。微黏雨夜螢。肖形嫌鼓子。妬鳥啄金鈴。榮落誰相惜。涼暄爾慣經。寫生煩妙手。渲染上圍屏。

贈如臯許嘿公

許工篆刻

曾摹一卷岐陽碣。只作西周舊本看。好古未妨生末世。成名終不藉微官。許曾宦閩中眼中識字如君少。老去知音較昔難。料合中原無手敵。莫教旗鼓更登壇。嘿公向受知於合肥龔尙書其贈詩有寄語揚州程穆倩中原旗鼓正相當之句

雨中同竹垞兄過恒齋飲次竹垞韻

傲居長喜接京坊。但約相過便對床。數點忽飄花外雨。十分初透竹間涼。詩貪老境甘如蔗。醉覺香醪味似糖。還有持螯餘興在。隔廚燈火聽鳴鴛。

西郊雜咏與竹垞水村分賦五首

三虎橋

狠石怒趨人。風聲挾秋雨。馬驚左右顧。橋滑路難取。誰呼北平守。三發三飲羽。我欲從之游。入山射真虎。

昌運宮

老鶴巢古枝。虛廊交冷翠。淒涼前代塚。傳是張常侍。煌煌元老文。苔蝕仆碑字。賜域滿西山。斯人或無愧。

松林院

珍果充尙方。嚴鐻守花木。今年上供缺。夏旱秋不熟。僧庖拾枯枿。客飯烹野蕨。莫怪鳥來稀。疎林葉俱禿。

摩訶菴

修竹如高人。閒花比靜女。移根入廟市。束縛吾憐汝。人生屬有役。物性便得所。及此憩茆菴。秋光媚孤旅。

元福宮

出屋聞遠籟。入門走長松。粘天百頃濤。下有掉尾龍。長養紀何朝。云自明武宗。迴鞭促斜照。紫翠凝西峯。

次韻送卓履齋

等輩風流滿座傾。不因入洛占時名。半年旅跡萍漂斷。八月邊塵雨洗清。家遠窮交愁易別。路難歸計羨先成。長橋兩岸蘆花雪。畫裏扁舟一纜橫。

次韻送周林於歸梅里二首

結客曾經汗漫遊。雁風吹落髮絲秋。誰憐豪氣除難盡。脫却征衫去叱牛。

燕昭臺側酒壚傍。別後親知半在亡。傷膏土分虎也重向溪南揮老淚。十年孤客始還鄉。

次韻送高念祖遊晉中

一天霜氣上征袍。獨雁離襟愛羽毛。惆悵黃花燕子酒。送君時節近登高。

天寧寺觀塔燈聯句同後一首亦刻曝書亭集

秋風鳴枯槐。斜日薄西崦。徐善並馬入寺門。客衣罽毼。朱茂于焉展嘉觀。一咲輟鉛槧。高佑巡檐禮紺塔。

卓立大且儼。朱彝尊陳丹和暗粉。古色剩渲染。坤魏蹟仍開皇舊。函并舍利崦。慎一十三重檐。檐檐風鐸颯。善

蟠楹蛟躩踞。負礎鬼瘠貶。茂飛梯絕階級。白石奪琬琰。佑鎔金范爲燈。設砌架成廣。彝尊壘壘仄蜂房。歷歷

覆蟹壓。坤怖鴿棲難安。一夫敢走險。慎綆缶挽膏油。豆火發星燄。善初如螢尾炫。忽若獸目睽。茂或如爐

杵炭。或如竈炊枯。佑須臾繞扶欄。散作四百點。彝尊虛堂鑿纖毫。老樹失掩冉。坤置身圓鏡中。交光不可掩。

行氛烟看直上。樓閣時一閃。善鼓鐘聲遠聞。來者紛襁褓。茂提攜及童嬰。羅拜雜寺閣。佑營營各有挾。邀

福得毋詔。彝尊禮義苟不愆。寸心又何慊。坤玩物隨所遭。誰能束崖檢。慎宵分梵放歇。漏轉人散漸。善茗椀

坐屢遷。松關啓還居。茂衰年疲倚徙。禪榻擁衾簟。佑弦月墮側輪。濕雲俄淅淅。彝尊驟驚山雨來。昏夢豁嚙

甃。坤晨興矚林端。餘爇尙未斂。慎

九日雨阻天寧寺聯句

仁王塔。祇樹林。客九日。期登臨。朱彝尊木蕭蕭。雨霏霏。泥滑滑。愁人心。慎馬毛縮。魚潦深。行躑躅。坐沈吟。魏

日月逝。年光侵。去者昔。來者今。徐善別苦易。思難任。樽有酒。且酌斟。高佑脫我帽。披我襟。折黃花。試共簪。朱

送次谷兄南歸次汪東川祭酒韻

覽來那得久淹留。八十高堂已白頭。布被一床空戀別。人門半刺肯輕投。黃沙草接新霜路。紅葉燈移古渡舟。算得過淮天氣好。初冬風日尙如秋。

送江補齋侍御巡鹺長蘆次禹平韻

析津脈絡聯神京。白河南注駛且清。天開地坼三百里。樓櫓突起高崢嶸。晴烟畫騰氣靄靄。刻漏夜下聲丁丁。雄關屹立當海口。鯨吐鯨擲誰敢撓。雲帆舊轉吳會粟。鎖鑰西北收專城。洪波浩漑百萬頃。坐令魚鮪無淪驚。設官豈徒重筦竿。畿輔要借桓隲行。我聞利藪俗爭驚。豪猾勢得操重輕。大賢當道積弊去。不貴鶯猛惟廉平。燕雲趙魏達齊魯。管內九月催王程。蘆花雪輕點別酒。柿葉霜染飄前旌。此時送君乘傳出。四境藹若春風生。鹽梅往往調鼎鼎。竚待妙手歸和羹。野人留眼望天際。法曜正傍台垣明。

王孟毅重至都門

我亦騎驢客。粗知行路難。六年三見汝。辛苦渡桑乾。

敬業堂詩集卷十一

竿木集

起己巳十月
盡庚午二月

飲酒得罪古亦有之。好事生風。芻加指斥。其擊而去之者。意雖不在蘇子美。而子美亦不免焉。禪家有云。竿木隨身。逢場作戲。聊用自解。云爾。非以解客嘲也。

送趙秋谷宮坊罷官歸益都四首

時秋谷與余
同被吏議

竿木逢場一咲成。酒徒作計太憨生。荆高市上重相見。搖手休呼舊姓名。劉魯封章指摘生。滄浪大可濯塵纓。肯言預會皆名士。誰似君家老叔平。君別蓬山作謫星。我從霧谷擬潛形。風波人海知多少。聚散何關兩葉萍。

南北分飛恨各天。輸他先我著歸鞭。欲逃世網無多語。莫遣詩名萬口傳。

秋谷贈余詩有與君南北馬
牛風一咲同逃世網中之句

初冬拜朱大司空墓感賦

城南舊是陪遊地。一片蒼涼野哭中。宿草墓門黃葉雨。亂鴉祠宇白楊風。餘生削跡誰知己。往事傷心我負公。肯信九原還有路。人間何處不途窮。

竹垞招遊白雲觀同錢鷗舫王令貽魏水村嚴寶仍吳震一分韻二首

沙晴冬候暖。古觀晚蒼涼。一徑踏殘葉。半庭餘夕陽。泥封丹竈合。石護醮壇方。華表依稀似。蓬萊是故鄉。

得方字

燕丘吾舊到。遂伴記新春。羽帳千年蛻。虛堂四壁塵。名山遊已晚。遺跡訪初真。欲補儒仙傳。欣逢好事人。

得春字

重宿傳經書屋與愷功話舊次唐實君留別四首韻

再來欣接席。昨去惜分襟。兩度平安字。三年聚散心。夢中追舊事。愁裏廢孤吟。豈意麻茶眼。重窺翰墨林。絕域身曾到。名駒小最能。膽教更事壯。詩喜逐年增。畏客門長閉。看山閣偶登。故知關性分。愛近讀書燈。款款留吾住。依依見汝情。硯冰融墨淡。燼火撥灰明。淺夜談難足。流年感易成。雞頭池上月。白髮照初生。易作匆匆別。華堂費夢思。暗鐘隨杵斷。殘燭得花遲。穎待囊錐脫。斑從管豹窺。出藍真屬望。慙媿我稱師。

恒齋邀嘗桑落酒同竹垞賦二首

哆口長餅壓。手杯隔簾鏘。器爲親開。不愁更欠尋常債。每過朱家醉始回。石湖詩句也風流。橘露松舫品最優。五斗蒲桃真濁味。肯將石室換涼州。

同竹垞水村步入一莖菴登妙光閣

偶然聯客袂。隨意叩禪關。門徑忽新改。居僧出未還。一尖城上塔。幾點樹頭山。此處宜看雪。危梯約再攀。

善果寺

高林鳴枯風，院淨如潑水。時有杖藜僧，下塔拾槐子。

歸義寺

中有遼初石幢

地作隣人業，苔侵破廟墀。兩三碑背字，猶記會同年。

冬菊聯句二十韻

猶剩籬邊朶，幽香伴小齋。坤祇緣開較晚，真與俗難諧。行憶植當松逕，分苗傍秫稽。坤一行頭並摘，幾稜

手親排。行未治鼃兼黽，先防虎似豺。坤栽培從老圃，束縛向斜街。行擔喜連泥買，僮噴冒雨差。坤素心邀

我賞，倦眼爲君措。行白酒重陽過，清吟十月偕。坤瘦窗圍竹几，涼路別樓鞵。行獵獵風捎幔，紛紛月浸塔。

坤稍應愁雪妬，幸不被塵埋。行采可葛新釀，響宜綴冷斂。坤葉經霜後斂，花比節前佳。行小塔燈雙影，低

屏水一涯。坤落隨騷客賦，淡入雅人懷。行寒色方疑斡，新芽已發荄。坤過時拋瓦缶，留種記牙牌。行按譜

名空羨，餐英願尙乖。坤明年須放早，吾欲返荆柴。行

呂灌園屬題小影二首

不知何處響淅淅，峭削藤蘿側面峯。喚起清風蒼清嘯，濤聲飛上最高松。
曾向山陰作寓公，一筇歸借白頭翁。跣趺消得幾多地，何必千岩萬壑中。

冬夜朱介垣給諫宅觀倒刺和竹垞兄絕句四首

樺燭枝枝細吐烟。曲屏影裏夜如年。索郎美酒耆婆舞。醉倒蘇家藥玉船。時介垣新得此杯。

雙燕身輕拂地迴。歌頭舞遍一回回。問渠從小誰傳得。似按西涼坐部來。
鐵撥檀槽急作聲。六么輓上一牀箏。忽驚雷雨簾前起。殘雪開窗月正晴。
薄薄粧梳楚楚伶。酒邊孤客對飄零。紅筵大有開元曲。別樣傷心已怕聽。

大司馬合肥李公見示遊盤山十律兼屬繼和敬題二章於後

泉石曾關十載心。勝遊徃徃疑朝簷。也知去郭無多遠。所喜探幽不在深。紫蓋自開蒼蘚路。紅紗長護碧山吟。滿空何限松篁韻。盡入鸞歌鳳舞音。

不教騶騎駭山僧。竹杖籃輿取次登。老樹傲霜還帶葉。細泉迎暖未成冰。盤來磴道雲千疊。遠處峯巒雪幾層。已失從遊吾自悔。得披高咏興偏增。

陸端轍索贈

五色邵平瓜。一口韓康價。古來高世士。亦在長安下。軟塵堆裏記相逢。歸夢時時寄短篷。筆床茶竈何年具。準擬尋君笠澤東。

讀張趾肇徐安序冬日感懷唱和詩次原韻二首

窗隙飛塵日易斜。忽披新句感尤加。路難不爲登樓賦。才盡非關入夢花。倚竹何心矜翠袖。聽歌有泪滴紅牙。斷蓬生事無聊極。不獨君悲我亦嗟。
小榻吟成膝自搖。一燈照影共淪飄。雪侵短髮雙雙換。寒入深杯九九消。得氣盆梅偏早綻。向陽籬菊未全凋。相期並了殘年課。添箇詩筒遣寂寥。

奉送玉峯尙書徐公南歸五十韻

大儒出處途。秉道貴得正。行藏旣自斷。進退詎關命。我公如星雲。一出朝野慶。臯夔奮事功。燕許嫺詔令。放之彌六合。鴻業豈易竟。立朝二十年。風節嚴且勁。高文藉討論。大禮資援證。以茲契聖情。題扁字輝映。交孚由一德。心愛非貌敬。國家有元氣。培養在交儆。儲材本報國。夾袋記名姓。必若入收羅。先須覈言行。春秋兩校士。冰鑒中外瑩。大匠洪陶鈞。劍光出磨鏗。別裁務去僞。崇雅自刪鄭。豈不歎才難。得人際斯盛。煌煌起衰手。草野議敢橫。中流砥狂瀾。公論翕然定。官雖謝執法。講每直崇政。休沐有常期。歲時奉朝請。從容大臣體。恬退君子性。朝來忽拜疏。辭切回天聽。帝曰卿往哉。疇爲執文柄。答云臣力憊。感激泪交迸。告歸適俶裝。首路春維孟。詔以書局隨。還家就參訂。牛腰一百車。多與二酉競。方輿廣樂史。續鑑改陳經。高館闢翹材。名流撤徵聘。謂姜西溟黃俞邵諸君。遇榮一時絕。典曠千古覓。樂天名位似。司馬聲華佻。鄴侯未足論。矧可儼張邴。平生釣游處。父老喜相迎。太湖洵幽絕。天水俱綠淨。七十二烟鬟。一一落明鏡。公將開書局於洞庭山

八窗陳鼎彝。四壁開畫幃。清音絲間竹。逸響鐘磬聲。鶯花晨赴社。魚稻晚報禁。暑衫便苧葛。臘釀雜賢聖。著書閒有餘。卽事樂難罄。小子學無成。風塵困趨趙。影慙舞袖短。顏讓時粧靚。餓朔行自嘲。寒郊語尤硬。迂疎頗知量。鬪捷肯爭徑。振翅無雲霄。觸藩有機穽。蹉跎曩悔失。鹵莽行恐更。世自傾波濤。吾方溷泥滓。重來仰翦拂。鬱抱實怲怲。公在士氣伸。公歸士氣病。從公願于邁。百感發孤咏。時相約同出都。

送許朔方之雲中

昔我未識子。先與錢生木菴友。亟言平生驢。三許不去口。陽谷詩絕倫。南交畫無偶。朔方年最少。蘊蓄靡不有。次第獲論交。前言果匪苟。燕臺昨于役。小許實先後。甲子夏與玉友朔方同入都。茫茫人海中。相左十八九。移時一把臂。款心互剖。吁嗟輕薄兒。覆雨數某某。勤拳托末契。所得良已厚。方知情親疎。不係交暫久。風塵有歧路。南北莽分手。錢生走從軍。余去扶病叟。重來會合地。驚顧各衰醜。慷慨倚和歌。淋漓藉杯酒。子仍青兩鬢。末座獨昂首。也復可憐生。雙顙削而黝。須臾雙耳熱。擊筑間鼓缶。疾風掃河梁。挽斷塞門柳。前歡今偶續。知有後期否。故人諸曹郎。出作雲中守。子行赴贊畫。側翅義奚取。行踪等飛蓬。離緒如剪韭。長亭七十五。山勢西北走。并州非故鄉。却立望南斗。

題許霜岩畫扇

風前撩亂萬梢柳。柳外天斜一扇篷。箇是儂家舊詩景。江湖回首畫圖中。

鳴鶴亭詩爲關中張鳳舉賦四首

不織筠籠但築亭。紅欄日日看梳翎。人間只有張公子。合向天河伴翼星。

隔窗長聽讀書聲。識字多來品倍清。金城衛氏鶴日飼以粥教之三年能識字應喚六郎才思劣。羽衣刻木坐吹笙。

飲啄依人不自持。卻緣骨瘦使稱奇。雲霄儘有孤飛處。偏愛亭亭獨立時。

丈八坡陀尺五天。侯門如故客如仙。憐他一片氎氎影。會上羊公舊舞筵。鳳舉爲靖逆侯少子

題沈客子寒郊調馬圖二首

以下庚午春初作

潑墨揮毫事事能。帶腰吟瘦沈吳興。如何却向漁陽道。毡帽茸裘學按鷹。
小益戎裝悔浪遊。不成投筆取封侯。殘年射虎非吾分。白石山南去飯牛。

西城別墅十三咏新城王清遠屬賦

雲氣朝出岩。亭陰滃然接。劃分一片影。側展屏風疊。浦口有漁榔。落帆如斷葉。石帆亭

戢戢犀角雛。斑斑鹿皮籜。春來頻改路。客過行長錯。欲斬又躊躇。萬竿殊不惡。徑竹

秦封五大夫。兩生獨不肯。托根此得地。雙榦鬪清迥。老鶴暮歸巢。殘陽在高頂。雙松書塢

虎目逃斧斤。輪囷誰惜汝。薰蕕自然別。靈蠢性所予。材與不材間。構兮知自處。軒大楮

九子得其三。五老失其二。一峯復一峯。峰峯不相似。雖非木假山。可少老蘇記。三峯

蝴蝶滿南園。風輕草初剪。林霏入烟霧。古洞春猶淺。好去向龍岩。築菴名碧蘚。小善卷洞

迥溪轉灣濃。滴翠如滴乳。岸容兼水色。遮斷橋西浦。一卷落床頭。春深夜來雨。綠蘿書屋

不離文字禪。半偈亦已多。何異百千萬。烝沙散恒河。蓮華清漏底。安坐夫云何。牛偈

蒼濤翻半空。清響一聲作。頑仙不耐聽。下有側頂鶴。夜深忽飛去。簌簌衆星落。壩

鷓山出林郭。高處割一拳。坐令諸兒孫。羅列丈人前。對之能下拜。米顛豈非仙。石丈

草外瑟瑟波。波平兩三頃。紅鱗尺半魚。倒嚼桃花影。西堂夢初覺。佳句時一警。春草池

仙犬吠靈根。鴉耨往堪馴。曾隨康樂屐。竟入麻源谷。一咲却歸來。披圖作橫幅。小華子岡

耕犁起同晨。牧笛行向晚。小庭閒倚杖。正值唱歌返。杳杳漸無聲。去村知近遠。樵唱軒

將出都門感懷述事上澤州家宰陳公一百韻

當代中天治。千秋一德期。大賢多間出。鴻業並昭垂。夫子金閨彥。名家玉樹枝。傅天飛鸞鷲。拔水出蛟螭。理學源流泝。文章談咲塵。巍科仍早掇。雅望迥標持。館閣迴翔地。風雲獻納資。居高懸藻鑑。集益藉論思。博物時無亞。多聞議必諮。六曹兼掌故。九列讓委蛇。共指文星煥。寧關好爵糜。綱維張有自。津涘挹無涯。湖厥流風遠。恭惟樹德滋。晉陽丁末季。漢澤徧瘡痍。團結因鄉社。招搖視義旗。千村同保障。一姓獨登陴。布置隨方略。分明受撫綏。險憑雙堠設。烟合萬家炊。寇至呼咸集。歸窮戒勿追。宗人全鐵軸。隣叟穩耕犁。

歲事重憂早。并民又阻飢。九重加軫念。百族尙庭羸。焚券情相卹。嗟來事可嗤。甫田憐士女。世祿散京坻。積貯崇朝盡。陰功里老知。當官嗟覆餗。扣戶仰由頤。及見家餘慶。方知善可爲。潤沾千里遠。力賑一方疲。地近瞻恒嶽。川長入晉祠。午園留獨樂。甲第拓前規。好古兼金石。搜奇及鼎彝。異香黎峒結。祕色汝州磁。畫幃多裝軸。書囊或借褰。筆馳中壘陣。墨洗右軍池。弟子河汾盛。宮牆魯國推。名爭歸夾袋。坐愛傍紗帷。手引烟霞上。情均雨露施。賢良承漢策。雅頌叶周詩。至化行如此。斯文儼在茲。升庸朝有道。羅致野靡遺。竊喜逢時泰。翻成歎數奇。異材胥奮發。蹇足獨顛危。詎敢誇華胄。聊因述鄙私。婺源分末派。海表發南支。大理賄封啓。中丞畫戟移。澤流京兆厚。禍發黨人奇。世廟當中葉。分宜位鼎司。彈章辭激烈。伏闕涕漣洏。嚴譴孤蹤逮。流官絕域羈。左垣言幸中。東市魄終褫。門子承堂構。文孫接履綦。謝宗經鼎盛。裴眷有中衰。五葉傳清白。全家際亂離。兵戈屯井閭。榛棘變堂基。春誤尋巢燕。秋荒插菊籬。先人旋遯跡。壯志局茅茨。比杜經天寶。如陶閱義熙。流光傷易邁。風木感先萎。小子真無似。孤懷忝自惟。墳篋借伯仲。弓冶學襄箕。蚤被儒冠誤。長遭俗目欺。升沈渾莫定。矩矱恐長墜。蕭瑟囚山計。荒唐捷戶貲。不成終泯沒。那得避嶽崎。會有從軍役。寧甘伏櫪悲。黔山峯蠱蠹。楚水浪差差。鉦鼓淵闐發。簫笳斷續吹。征夫攀塞柳。野客咏江蘺。戎事從人問。行間借馬騎。瘴林棲狒鷲。箐谷竄狐狸。耳聽鶉啼血。心驚觀築屍。晝紅烽乍舉。月黑路偏欹。短褐星埃入。遐陬露布馳。圖披新聚米。局按着殘棋。橫草名空挂。封侯望本癡。飄然辭幕府。遯矣走京師。

古有矜懷刺。時方薄處錐。姓名埋失路。出處謝端著。徒步親頑僕。低顏向細兒。幾逢收駿骨。深畏妬蛾眉。久抱違時性。兼無媚俗姿。泥深蹄躓躓。風逆羽攤攤。逐伴聽謠曲。無聊托酒卮。波瀾人海闊。竿木戲場隨。照壁寧防蠅。吹毛竟得疵。任安書未荅。朱穆論何疑。夢或驚沙蜮。歸將友澤麋。棄繻知昨失。鑄鐵悔今遲。不謂逢韓愈。猶煩說項斯。感公寬禮數。容我揖塔墀。未有阿房賦。徒懷北郭絲。迂疎疑寸管。許與到單詞。峭置千尋壁。弘開八達逵。春陽蒙煦燠。霽月睹光儀。款款憐才意。依依戀別時。爨薪餘樸檄。鍛竈仗鎚。鬢鬢雲敷土。微茫海測蠹。義高攀莫及。身賤語終卑。此去鞭重把。何年閣再窺。鷗波殊浩蕩。泛泛問何之。

送徐道勇宰順德

萬里驅車路。韓蘇蹟尙留。往時愁謫宦。今日羨吟游。邊海夏無瘴。看山朝有樓。感君懸榻意。謂我是詩流。
時相約同行。余迫歸計不及赴。

酬別許賜谷

男兒有才人見之。如眉在額指在掌。蘭若翡翠大海鯨。相去中間幾宵壤。天資必從學力到。拱把桐椅視培養。方今儕輩盛稱詩。萬口雷同和浮響。或模漢魏或唐宋。分道揚鑣胡不廣。何曾入室溯流源。未免窺樊借依傍。我持此論嗤者衆。同志吳中乃得兩。惠生元龍格律最謹嚴。錢子玉友才情殊倜儻。不知此外復誰敵。晉楚居然互雄長。得君忽訝鼎足成。一戰三分定擾攘。君才自是詩中虎。盡遣風雲歸俛仰。蜀江到解

一萬里。岱岳登峰八千丈。有時分派蓄烟波。間亦浮嵐瀕林莽。初看澹沲與神會。倏轉玲瓏非意想。書評取瘦嘲杜陵。畫品近肥关周昉。穠纖斟酌雅粧宜。骨肉停勻神駿賞。愛君此境口莫喻。俗手安能事撫仿。彼非識者勿浪傳。若有知音必弘獎。余雖好吟久成癖。所業未充終恹恍。邇來屬藁輒欲焚。偪仄無端撻世網。徒將字句供指摘。豈有聲華出標榜。此時披豁喜相從。乍挹西山朝氣爽。論卑引我爲同調。鳥爪時時發背癢。君辭愈降我愈慙。文繡飾犧毋乃枉。皇天老眼不到地。半世駢馳絆塵鞅。三間草屋百索田。願本非奢力難強。我今忍飢亦決去。麋鹿山林合長往。閉門更讀書十年。尙冀成章附吾黨。故人倘記臨別約。鬪鴨欄邊好相訪。數折溪橋蕩槳迎。歌聲正出蘋花港。

夜飲槐樹斜街花下酬別竹垞水村

丁子香邊欄檻。小桃花底杯槃。厨燈隔院人靜。社雨添衣夜寒。殊方賦別最苦。失路還家又難。懊惱鶯啼時節。相思多在春殘。時余將南歸

酬別譚護城都諫

知己無如我少。交情得似君難。獨留一榻相待。長把深杯對乾。宣武門南舊宅。虎坊橋畔扶欄。可惜手栽紅藥。花開又讓人看。虎坊橋東舊寓。去秋曾種芍藥。八本。余將歸。君又遷居。故末云然。

題壁集起庚午二月。終六月。

玉峯大司寇徐公。予告南歸。奉旨仍領書局。出都時。邀姜西溟及余偕行。兩人日有唱和。旗亭堠館。汗壁書牆。率多口占之作。本不足存。存之所以記行跡也。

早出彰儀門。魏禹平談震。方沈客子追。送於十里之外。馬上留別二首。

已着征衫上別羈。道傍何意復停鞭。人生聚散原難定。又算班荆一度緣。
杏蕊開時柳葉新。眼明差喜出紅塵。京華回首無多戀。萬疊西山幾故人。

長新店重別孫愷似王令詒嚴寶仍劉大山家荊州兄三首

尙書書局出隨身。供帳爭看祖道新。穀舄車輕脚尾去。可憐我亦一歸人。

壞壁尋詩又一回。殘尊重洗別時杯。不因此去添悵悵。輕跨征鞍自悔來。

別期長短路連綿。春淺漁陽二月天。却檢曆頭同此日。驚心南北忽三年。前年南還。去年北發。今東裝出。都俱二月二十一日。亦一奇也。

良鄉次西溟韻

乍來灰洞喜無風。馬足殘泥曉漸融。料石岡邊春雨晚。廢田無麥草蔥蔥。

琉璃河次湯西厓壁間韻

日痕紅曙露初晞。草色迎人欲上衣。頓覺水鄉風景好。一羣野鴨踏波飛。

寒食過涿州和西溟

柳色初濃凹字城。胡良河上值清明。故園三百長亭外。貪得花時一月晴。
清明新城中

縣南風颭酒帘多。澹澹新烟瑟瑟波。一路人家齊上塚。紙錢飛過白溝河。
白溝旅店見亡友鄭樊圃舊題愴然有感同西溟作

一鞭重度瓦橋關。落魄星埃髮各斑。忽見故人題壁在。轉憐爾我是生還。

過趙北口晨餐得魚戲和西溟

森森波光漾碧虛。中央一帶是民居。綠楊影裏罾竿起。彈鋏人歸食有魚。
任丘遇禹司賓尙基歸自閩南以蜜漬荔枝分餉

易栗寧桃已厭嘗。愛聽風味說南方。費他陸賈千金橐。與致紅綃十八娘。

商家林早發

村店荒荒殺漏遲。喚回殘夢眼迷離。曉星一箇明如月。及取朝陽未吐時。
冉家橋

楊椿夾岸草抽芽。一綫枯河萬斛沙。記得去年鞭馬渡。滿渠春漲拍桃花。

景州次西溟韻時畿輔苦旱

自從騎馬出春明，滿眼流移愴客情。此日畿南行向盡，喜逢田婦餉春耕。

平原口占戲示西溟二首

碌碌因人事竟成，當初原未識先生。處囊脫穎渾閒事，何苦區區自請行。若將毛遂比夸門，知己何人合感恩。却咲能詩李長吉，信陵不繡繡平原。

夜雨

倦枕更闌睡不成，白楊葉戰雨來聲。油燈欲滅尙未滅，睽電隔窗時一明。

從十里望抵晏城

春塍雨潤少飛沙，別取林坳一道斜。紅袖倚門桃傍井，又緣迷路得看花。

大清橋

風柔自覺輕衫便，山近微嫌濕翠多。日暮大清橋畔望，一叢春樹擁齊河。

崗山

古驛東來路一灣，萬枝翠栢護蒼顏。不知斤斧迹何幸，大似吾鄉近海山。

上巳泰安道中和西溟

平山堂畔忽經年，又是荒程上巳天。慙愧漿家供野味，樹頭小串摘榆錢。

欲登岱不果戲柬周通守燕客

潮白三更開島嶼。烟青九點散齊州。輸他監稅周簽判。日日肩輿到上頭。

羊流店

峴首沉碑事渺茫。空傳有淚墮襄陽。居人自重羊公里。未必英雄戀故鄉。

新秦城南望蒙山

翠岱孤抽碧玉簪。羣山餘勢失嶄嶄。晴雲忽斷東南角。又露東蒙一兩尖。

發蒙陰至青馳寺

桑邊棗下嶽崎路。亂石堆堆數驛亭。野草不知春意好。燒痕三月未全青。

渡沂水

白沙沒髀水平腰。舟子招人上小船。指似翠華南頓路。舊年此處有浮橋。

三月初九日自郟城看桃李至紅花埠二首

枝枝能白復能紅。光景年時約略同。行過曹村貪小住。雙禽對語百花中。
油菜花開十里黃。一村蜂蝶鬧斜陽。明知尙隔江淮岸。風物看看近故鄉。

官柳

種柳河干比伐檀。黃流今已報安瀾。可憐一路青青色。直到淮南總屬官。
大雨早發宿遷

淘淘波聲響濁流。疾風吹雨渡潮溝。眼前一事差強意。河北人家麥有秋。
晚晴入桃源界和西溟

鳴鳩聲裏發孤城。行到桃源落照明。一色東風占兩候。曉程催雨暮催晴。
渡河

沙雨晴來日氣和。漲痕連岸落帆多。春風吹過桃花信。啼鳩一聲人渡河。
淮安上船

厭聽鈴聲愛入舟。只應洗耳向清流。瓣香夜謁淮神廟。夢穩江南第一州。
過喬石林侍讀縱棹園

一天風雨禁茶蘼。紅藥空欄信尙遲。只道淮東春已盡。鴨桃猶剩兩三枝。
喬侍讀席上贈歌者六郎

欲顧曾無一字訛。子絃徐引曼聲歌。青衫憔悴無如我。酒綠燈紅奈爾何。
高郵舟中

蔣牙荻箏碧於天，涸水瀕湖出葑田。鷗鷺較多人較少，斷橋邊有賣魚船。

揚州遇杜蒼略

龍眠

方邵村侍御

又繼黃岡歿

謂令兄繼風先生

江左風流跡已陳，今日聽君談往事。如逢天寶舊宮人。

王義文閣復申招同西溟泛舟紅橋二首

誰家園子得春多，繡栗梢頭花信過。一曲紅欄隨棹轉，綠陰濃處忽笙歌。十里珠簾廿四橋，百年花月履綦銷。多情愛拂遊人面，尙有垂楊萬萬條。

西溟談及竹西舊事戲調之

綠楊書畫記停船，一夢揚州又十年。見說伎樓渾冷落，髻絲誰惜杜樊川。

阻風瓜洲望金山

狂飈高駕海聲開，雪浪千堆倒捲迴。霧氣欲吞吞不得，紺宮浮出小蓬萊。

月下渡揚子江次西溟韻

妙高峰下曉鐘撞，隔岸吳船正發幫。風霧一天人擁被，櫓枝搖夢過春江。

虎丘後山人家

築岸開池別有津，小橋低映碧鱗鱗。河豚上後魚花賤，多少山根種水人。

閩門卽事

穠花剛被樓遮却。又見隣牆出好枝。一種風光誰管領。金閩門外暮春時。

吳江

鱸鄉亭畔麥垂芒。水落潮田已半黃。曲折流通小港。家家門外有船坊。

禾中田家

到耳初聞鵲鶯啼。平疇小稜趁高低。茅針已老桑芽嫩。時節人家正簞泥。

過梅里訪朱西峻

也知陟岵意仍遠。纔得還家換袂衣。爲報而翁吟望久。白頭京國苦思歸。竹垞先生
尙留燕

題家保三兄小影

分無擁髻對伶玄。赤腳歸仍侍玉川。怪得披圖還一咲。破窗黶燭看神仙。

題西峻月波吹笛圖二首

苔樣蓑衣綠蓋蓬。輕篙閒插月明中。水禽兩兩背船去。獨倚寶洲一笛風。
一天雲細作魚鱗。千頃頗黎瀉濕銀。解聽鶴南飛曲好。不知誰是倚樓人。

柘湖感舊和徐淮江

滿湖輕浪綠差差。別樣風光兩度期。楊柳半帆春載酒。薔薇一硯雨催詩。未知此後花誰主。可惜重來髮已絲。早是驚心八年事。夢闌燈燧不多時。

齊門夜泊

扁舟蕩樣具區東。使盡西南一日風。到岸帆檣烟霧隔。隔河簾閣雨濛濛。忽來人語蛙聲外。亂颺燈光水氣中。也識去家今較近。酒闌依舊感飄蓬。

吳門喜遇田間先生

髮光如葆氣如虹。軀強人間八十翁。最喜塵埃經歲別。還看筋力舊時同。文章有品傳方遠。風雨藏山業未終。藏山集先生未刻詩文也。指與一星人盡識。少微今日客吳中。

崑山劉改之先生墓和顧伊人

哀壑無人叫杜鵑。馬鞍山麓古墳邊。東齋路沒荒榛雨。東齋先生祠堂也。今廢。北郭人犁斷碣烟。湖海尙疑豪氣在。姓名翻藉布衣傳。冬青種後諸陵廢。南渡君臣更可憐。

題沈石田秋江待渡畫卷

晶晶波明蟹舍。若若路轉漁灣。落葉聲中間渡。浮萍影裏看山。

題陸漢標墨菜圖

小圃朝來露未晞。早菘青脆晚菘肥。老饕不要園官送。直擬從君攫畫歸。

武林寓舍少司馬楊公以鮮荔分餉賦謝

絳囊移得洵仙才。珍重瓊漿贈十枚。不向紅塵馳驛到。却從碧海販鮮來。色香尙覺熏肌好。冰雪真隨咲口開。只是野人慙過分。恍疑身自雪峯回。范石湖集四明海州自福唐來順風三數日至得荔子色香都未減大勝戎涪間所產曾有詩云鄞松荔子如新摘行脚何須

更雪峯

四殤詩

家貧望多男。如農力菑畝。將期秀而實。焉得辭勤劬。吾家兄弟間。盛事傳鄉閭。仲氏艱舉子。前年獲騶虞。季子善生兒。爛熳引衆雛。我兒稍長成。次亦舞勺踰。豈不顧恩誼。未免督責俱。嬌穉尙無知。愛憐併屬渠。阿巢甫七齡。性慧早讀書。近尤喜作字。狼籍塗墨豬。騶虞頭角好。秀眉清兩矚。學語無不能。舌本驚老儒。阿載方斷乳。氣壓羣兒愚。家僮聽指麾。步步趨亦趨。最小名阿午。哇哇聲已殊。今年暮春杪。我歸自燕都。次第使來前。琳琅玉璫璵。排成一行雁。聚若同隊魚。公然嫌姆抱。見伯同爺呼。漸熟意轉親。競前爭挽鬚。無何捨之出。我又東遊吳。五月到崑山。梅雨蒸肌膚。去家五十日。頗怪一信無。濕螢照昏花。雙眼交模糊。羣來入我夢。繞膝形遽遽。明朝急買舟。冒暍返敝廬。到門天已黑。哭聲滿庭除。驚問哭何爲。痘瘍瘞泉壚。一哀吾欲絕。老泪沾襟裾。自惟世業荒。寶此七丈夫。半月奪其四。嗚呼彼奚辜。季子僅留一。芝焚蘭未枯。

仲氏一併亡。竟失掌上珠。矧乃客未返。在時德尹尚都下遠隔天北隅。便擬報杏殤。作書寄江湖。又恐傷汝父。臨
緘復躊躇。中腸集百念。沈痛肯暫攄。家門百年來。天闕代有諸。曾王父早世。我祖實少孤。兩叔及先君。長
短歲月徂。短者纔十九。長者五十餘。同祖凡八人。其三已丘墟。早衰我更甚。所歷多崎嶇。浮生知幾年。煎
迫非一途。傷哉感存歿。天意終何如。

苦雨聯句

風噫作欠伸。顧河圖天愁散咳唾。羃羃繭絲微。慎行捎捎箭鏃大。排欄挂水簾。河圖震瓦响雲磨。隙景列缺馳。慎行
潛蹤鬱儀過。衣纓黝黝醜。河圖扉履濺泥污。蝸蟻引長涎。慎行鼯怒鼓羣和。喙桉聚蠅饕。河圖瘁肌飽蚤餓。嘔噦
減食單。慎行撲緣廢書課。帖席惡膠粘。河圖歷階防跌蹉。遙岑窞如遁。慎行高浪騰誰斂。方當戒舟杭。河圖矧廼疲
鞍馱。溝凖齊腰。慎行田塍淖沒髀。落衣妥兩肩。河圖烟殼背一箇。栖畝占來車。慎行分秧滯杭稔。青葱卓針立。
河圖黃萎垂芒臥。造物有暴殄。慎行農功豈媮媮。乾土盡翻沈。河圖漏天難補破。餘飛遠乍散。慎行晚色晴微作。暑
濕旋復蒸。河圖壯陰那肯挫。走章牋碧翁。慎行苦雨毋受賀。河圖